

ليته ظل سرًا



#غرد_للعالم

عنوان الكتاب : ليته ظل سرّاً

الموضوع : رواية

التأليف : عمر ميالو

مراجعة لغوية : نادية محمود

الإخراج الفني : عمرو سالم سواح

تصميم الغلاف : عصام أمين

رقم الإيداع : 2018/ 20860

الترقيم الدوليّ : 978-977-6639-45-4

الناشر : دار تويته للنشر والتوزيع

tweetpublishing2017@gmail.com

www.facebook.com/Tweetforpublish

٧ش محمد أبوالعطا- محطة العريش- فيصل- الجيزة

رئيس مجلس الإدارة: م/ أحمد عبد العزيز

المدير العام: أ/ رشا العمري



٠١٠١٧٧٩٩٧٩٩/٠١٢٢٥٧٦٢.٦٦

جميع حقوق الطبع والنشر محفوظة

رواية

ليته ظل سرًا

عمر ميالو


Tweeta
للنشر و التوزيع

جلس في مكتبه الواسع يتأمل صفحات الجرائد، هي عاداته الصباحية اليومية، بالطبع مع كوب القهوة الذي أصبح يعتقد أن اليوم لن يمر من دونه، النصف ساعة الأولى من أي يوم عمل تضيع في هذه العادات التي واضب عليها منذ خمس وعشرين سنة. منذ أن كانت تلك المجموعة الكبيرة اليوم شركة صغيرة تعمل في مجال الاستيراد والتصدير، وكان هو نفسه شخصًا مغمورًا، لا يعرفه أحد، ويستطيع أن يجلس في أي مكان عام دون أن يلفت الأنظار، ولا تزين صورته الصفحة الأولى لأي صحيفة، ولا يذهب لأي مؤسسة خيرية فتتبعه العدسات، ولا يقيم الحفلات التي يحضرها أرقى طبقات المجتمع، ولا يتحدث مع هذا المسؤول بلطف وجمال زوجته، ولا يذهب لحفل تافه فقط لمجرد أن ابن رجل الأعمال الشهير قد نجح أخيرًا في الثانوية العامة.

كان كل ما يشغله حينها هو عمله البسيط، وأحلامه المستقبلية، وأسرته الصغيرة، أما اليوم ومع اتساع العمل، وضحامة الثروة، ومع وفاة زوجته، وزواج ابنته، وانشغال ابنه الوحيد بعمله في الجامعة، فأصبح لا يهتم إلا بالعمل، والتفكير في كيفية تطويره وتنميته، والأهم بالطبع حمايته.

أصبحت حياته روتين يومي اعتاد عليه، العمل ثم العمل ثم العمل، منذ فترة طويلة لم يجلس مع أسرته جلسة عائلية، لم يخالطهم، لم يتحدث معهم، لم يجلس حفيده على قدمه ويداعبه، ربما يندم الآن أنه أفنى عمره في جمع هذه الثروة الطائلة، أصبح يشعر أنه أفنى ما مضى من عمره في جمعها ولم يستمتع به، ويبدو أنه سيفني الباقي في حمايتها والحفاظ عليها.

كان من المنطقي أن يكون مكرم هنا الآن، يحمل عن كاهله هموم تلك المجموعة، يتيح له بعض الوقت لقضاء وقت لا يملأه العمل والكلام عنه، لكن

ليته ظل سرا

ولده الوحيد أصبح مدرسًا في الجامعة، هو نفسه يعلم أنه لو كان مكانه لفضل الجامعة على الجلوس بين جدران هذا المكتب الضخم، لكن ما يخشاه هو المصير المجهول الذي سيواجهه مكرم بعد وفاته، ماذا سيصنع ذلك الفقى الذي لم يدخل يوماً واحداً إلى دنيا المال والأعمال، وهل يمكن لرجل ذو طابع أكاديمي أن يكون رجل أعمال ناجح، ربما، لكن حتى إن كان مكرم فداً كما يعتقد فلن يخلو طريقه من المعاناة، هذا ما يحدث دائماً عندما تغير المياه مسارها، فإن اندفاعها يفقدتها من سرعتها، ويعكر من صفوها، حتى وإن سارت فيما بعد في مسارها الصحيح.

دق باب المكتب فقطع عليه هدوئه.

- ادخل

- صباح الخير يا فريد باشا.

قالتها سكرتيرة مكتبه وهي مقبلة عليه تحمل أوراقاً في يدها.

- صباح النور يا رحمة.

- اجتماع مجلس الإدارة اللي حضرتك طلبته هيكون جاهز بعد ساعة

اعتدل في جلسته ثم قال:

- جميل، في مواعيد تانية النهاردة

- أيوة يا فندم في معاد مع الأستاذ نادر المحامي كنت حضرتك طلبته

- طيب، كلنى نادر خليه ما يتأخرش على معاده.

- تمام.

سكتت قليلاً كأنها ترددت في أن تتكلم، لاحظ فريد ياسين أنها لازالت واقفة

رغم أنها لم تعتد على الوقوف دون سبب، فوجه كلامه اليها قائلاً بعد أن أمسك

بالصحيفة مرة أخرى.



ليته ظل سرا

- في حاجة ثانية يا رحمة
- في واحد قاعد برة يا فندم وعايز يقابل حضرتك.
- مين ده
- أنا معرفهوش ودي أول مرة أشوفه، بس هو بيقول إنه عارف حضرتك شخصيًا، ولما سألته عن اسمه قالي أنا مش هقوله إلا للباشا شخصيًا
- أنا مش فاضي للعب العيال ده هتلاقيه واحد جاي عايز شغل ولا حاجة اتصرفي أنتِ معاه وقولي له إن....
- صباح الخير يا فريد باشا.
- قاطع كلام فريد صوت غير صوت رحمة، فرفع نظره نحو باب المكتب، وكان صاحب الصوت رجل يبدو في الخمسينيات من عمره، قصير القامة نسبيًا، بدين بعض الشيء، الصلع منتشر في رأسه إلا في جزء قليل منها، ويرتدي بدلة رمادية اللون، وله شارب كبير.
- لم يكن فريد يعرف هذا الرجل، لكنه لا يبدو عليه أنه أحد هؤلاء الذين يطلبون عمل أو إعانات مادية، ولكنه بهذا لم يمنع فريد أن ينفعل ويقول وهو في حالة غضب.
- إيه ده.....أنت مين اللي أذن لك تدخل هنا.
- حاولت رحمة تدارك الموقف فقالت بتوتر:
- هو ده يا فندم ال...
- أستأذنك تسببينا لوحدنا شوية
- جاء صوت الرجل مرة ثانية، مما زاد من غضب فريد، وما زاد غضبه أكثر أن رحمة همت بالخروج فعلاً.

ليته ظل سرا

- جرى إليه يا رحمة، أنتِ شغالة عند مين بالطبط، وأنت رد عليّ مين اللي
سمح لك تدخل هنا.

قالها فريد وقد زادت حدة صوته وغضبه.

- أنا دخلت لأن الموضوع اللي أنا عايزك فيه مهم أوي.

يبدو أن هذا الرجل مصر على وفاته اليوم على يد فريد ياسين، أو أنه يريد
أن يراه في أعلى حالات استفزازه.

- وده يخليك تدخل المكتب زي الهمج.

الانفعال والغضب يزدادان في صوته، والرجل يزداد في صوته الهدوء والثقة.

- الله يسامحك، بس لما تعرف أنا مين أنت اللي هتعتذر لي بنفسك.

أحس فريد أنه تسرع في ردة فعله، لكن هذا المستفز هو من دفعه إلى ذلك،
فقرر أن يسمع، وأقسم في داخله لو كان هذا الرجل (من إياهم) فسوف تكون ردة
فعله قاسية جداً، فقال وقد نفذ صبره.

- اطلعي برة يا رحمة وسيبيننا لوحدنا.

- كده عين العقل يا باشا.

قالها الرجل وقد جلس على المكتب أمام فريد بعد خروج رحمة.

- اسمع لو كنت جاي تضيع وقتي، فأنا مش فاضي لك.

- اهدى بس عليّ شوية يا باشا.

قالها الرجل وقد زادت نبرة صوته حدة، قبل أن يردف:

- أنا جاي لك مجرد مرسال

- مرسال من مين

- ما عنديش أوامراني أقولك

انفعل فريد مرة أخرى
 - ما هو اسمع بقى يا تقول مين اللي باعتك وعايز إيه بسرعة يا إما فعلا
 هخلي الأمن يرموك برة
 عاد الرجل إلى هدوءه مجددًا
 - أنا جايلك في صفقة العمر يا باشا صفقة مكسبك فيها مايقفش عن ٥٠٠
 مليون جنيه.

- أنت جاي تهزر بقى
 - مش تستني أول لما تعرف إيه هي الصفقة الأول ومع مين.
 جلس فريد وقد بدأت أعصابه في الهدوء، إنه الآن على استعداد لأن يسمع
 هذا الرجل الغريب، فلا مانع من سماعه خاصة وأنه ليس لديه ما يشغله لحين
 موعد الاجتماع بعد أكثر من نصف ساعة
 - قول اللي عندك وخلصني.
 - (اللوم - المقارنة - النقد) التلات حاجات دول في علم النفس بنسميهم
 (القتلة الثلاث) وده لأن كل واحد فيهم فعلا كفيلا إنه يخلص عليك في أي لحظة لو
 اتمكن منك.

هكذا بدأ مكرم ياسين محاضرتة التي يلقيها على طلبة كلية الآداب قسم
 علم النفس والتي كانت محاضرتة الأولى بعد أن حصل على شهادة الدكتوراه.
 مكرم ياسين هو أصغر دكتور في كلية الآداب فقد تخرج منها قبل سبعة
 أعوام فقط وكان بالطبع (أول دفعته) بتقدير امتياز مع مرتبة الشرف وقد حصل
 على الماجستير في وقت قياسي والدكتوراه في وقت قياسي أكبر وهذا بالتأكيد ما
 جعل الكثير من زملاءه يغار منه كما يغار منه بعض أساتذته أيضًا فهم يرون أنه

ليته ظل سرا

حقق في وقت قصير ما حققوه هم في ضعف هذا الوقت ولكن بالطبع هناك القليل من زملاءه والكثير من أساتذته و الغالبية العظمى من تلاميذه من هم معجبون به. مكرم ياسين في التاسعة والعشرون من عمره وهو طويل القامة، وشعره أسود كثيف ناعم، وعينين عسليتين واسعتين، ووجه لشخص يحمل شخصية كاريزمية شديدة الذكاء، ولا يستطيع أحد أن ينكر حتى من كارهيه أنه شخص وسيم وجذاب، أضف إلى ذلك أنه مكرم (فريد) ياسين.

اتجه مكرم إلى السبورة وكتب بخط عريض (اللوم)

- اللوم مثلاً، كل واحد فينا عنده جزء من نفس لوامه، ولكن هي طبعاً بنسب بين البشر، في ناس لو غلظت غلظة واحدة ممكن تقعد شهر وربما سنين عشان تقدر تتخلص من لومها لنفسها عليها، وخاصة لو كانت الغلظة دي أثرها باقي، ومن وجهة نظري الشخصية إن الغلظة دي بتكون متوقفة على طبيعة الشخص، وعلى أكثر حاجة بيحبها، فمثلاً في ناس ممكن تنتحر عشان خسرت فلوس، لأن الفلوس بالنسبة لهم هي حياتهم، وفي ناس عاطفيين زيادة عن اللزوم ممكن يموتوا بسبب غلظة هما عملوها في حق حد بيحبوه وأذيته، وهكذا.

أكمل مكرم كلامه عن اللوم ثم اتجه إلى السبورة مرة أخرى وكتب بنفس الخط تقريباً وكأنه آلة (المقارنة).

- المقارنة وخاصة لو كانت مقترنة بالغيرة فدى بتكون سلاح أشد خطر على الإنسان من الرصاص والنار، لأن الغيرة في حد ذاتها نار، والمقارنة لو مش في محلها فهي بتأدي لحاجة من اثنين يا إما إحباط لو بتقارن نفسك بشخص أعلى منك بكثير، يا إما تخاذل لو بتقارن نفسك بشخص أقل منك بكثير، فلازم تكون عقلائي حتى في مقارنتك....

بعد أن أنهى مكرم كلامه عن المقارنة وبدأ أن كل من أمامه مقتنعين تمامًا بما قال.

اتجه إلى السبورة للمرة الثالثة، وبدأ يخط (النقد) بنفس الطريقة وكأنه يكتب على السبورة من خلال هاتفه
- النقد ده بقى كارثة اكب...

قاطع مكرم صوت هاتفه الذي انطلق فجأة.
بالطبع لن يرد فهو قد تعود على هذا منذ أن كان معيدًا وليس معنى أنه قد صار (دكتور) أن يرد على الهاتف في المحاضرة.

جميع أساتذته الذين درسوا له وهو طالب كانوا لا يلقون بالأل لهذا الأمر، فكان إذا دق هاتف أحدهم ترك المحاضرة وربما ترك المدرج كله وخرج ليتكلم في الهاتف، وربما أخذ نصف ساعة أو أكثر أو حتى إلى آخر المحاضرة، ثم يعود ليللم أوراقه وينظر إليهم بابتسامة ويقول بكل هدوء (أشوفكم الأسبوع الجاي) وكأنه لم يفعل شيئًا وكأن الرد على الهاتف أو حتى إهدار وقت المحاضرة صار حقًا أصيلاً له، كما صار رسوب الطلبة الذين لا يشترون كتابه ولو حتى من باب العجز المادي، وكما صار رمى التقارير التي يقدمها الطلبة في صناديق القمامة دون حتى النظر فيها، وطرده أي طالب من المحاضرة لمجرد أن شكله لا يعجبه!

لكن بالنسبة لمكرم كان هناك ثلاث استثناءات، فهو يرد على الهاتف إذا كان المتصل أحد هؤلاء الثلاثة.

١- والده (بابا)

٢- شقيقته الكبرى (ليلي)

٣- زوجته (روح قلبي)

ليته ظل سرا

- هذه المرة كانت ليلى، إذا صار خرق القانون الذي وضعه حلالاً -
 - ثانية واحدة من فضلكم
 قالها مكرم وهو يتجه خارج المدرج، فهو بالتأكيد لا يريد هم أن يسمعو ما
 يدور بينه وبين أخته فيصير حديث الطلبة بعد المحاضرة.
 - لولا...وحشاني أوي أوي أوي
 - هتفضل طول عمرك بكاش...لما أنا واحشاك أوي كده ما بتسألش عليّ ليه
 - أنتِ عارفة بقي كنت مشغول شوية الفترة اللي فاتت
 - أيوة طبعًا ومين قدك يا دكتور
 - طب أنا دكتور بعد ٤ سنين دراسة و٧ زيهم بعد الدراسة، انما أنتم يا بتوع
 طب دكاترة من أول يوم في الكلية
 أطلقت ليلى ضحكة خفيفة ثم أردفت
 - ماشي يا عم...ما تتأخرش بقي عشان أنا بدأت أجوع و ما فطرتش كويس
 في المستشفى
 - أفهم من كده إنك عندنا في البيت
 - من زمان و خالد هيخلص و هيجي على هنا.
 - سيبك منك أنتِ وخالد، أحمد حبيب خالوجه من المدرسة ولا لسه
 - هي بقت كده، لا يا سيدى لسه ما جاش، بابا بس هو اللي جه
 رد مكرم باندهاش
 - بابا!!!!...وايه اللي جابه بدرى كده، ده قالي إمبراح إن عنده اجتماع مجلس
 إدارة وممكن يتأخر
 - مش عارفة أنا لقيته جاي و شكله متغير، حتى سلم علينا وطلع على

أوضته على طول وقال لنا هغير هدومي و جاي، ولحد دلوقتي لسه ما نزلش

- أنا لما أجي هشوفه ماله.

- هو بقى له كده كتير ولا إيه

- لا، وعموما ما تشغليش نفسك، تلاقيه مرهق شوية ولا حاجة

- يمكن

- الله أعلم، وعموما أنا لما أجي هنقعد معاه ونفهم، سلام بقى دلوقتي يا لولا

عشان أنا عندي محاضرة هخلصها وأجي على طول .

- ماشي يا حبيبي ..سلام

عاد مكرم إلى المدرج وهو لا يستطيع إخفاء ملامح التوتر على وجهه

- وقفنا لحد فين.

جاء الرد سريعاً وجماعياً

- النقد يا دكتور.

- أه...بالنسبة بقى للنقد.

يجلس فريد ياسين في غرفته وحيدا، ولو كان معه الآن ألف شخص في ذات

الغرفة سوف يكون وحيدا، فالوحدة هي أن تكون رأسك مشغولة بما لا يمكن أن

تنشغل به غيرها من الرؤوس، وتكون في عالمك الخاص الذي ليس له حدود، ولا

يخضع لقوانين الكرة الأرضية .

ماذا عساه أن يفعل فيما عرضه عليه ذلك الرجل، وإن لم يفعل فما هو

الحل للخروج من هذا المأزق، هذا هو الشيء المطلوب حسمه خلال الايام القليلة

القادمة.

قاطع تفكيره طرقات على باب غرفته

- مين
- أنا ليلي يا بابا
- تعالي يا ليلي
- تقدمت ليلي وابتسامتها تعلو وجهها
- إيه بقى يا بابا كل ده وكمان لسه ما غيرتش هدومك
- علت على وجه فريد ابتسامة باهتة.
- برتاح شوية يا ليلي من ضغط الشغل
- لم تبدو ليلي مقتنعة.
- شغل إيه يا بابا أنت لحتت تقعد في الشركة
- فهم فريد أنها تحاول استدراجه ليخبرها عن سبب عودته مبكرًا اليوم فرد

بهدوء:

- وهو الشغل في الشركة بس.
- أحست ليلي انه لا مفر من السؤال المباشر
- آمال إيه اللي رجعت بدرى
- العصفورة قالتلى إنك جيت
- يا سلام
- شوية مشاكل في الشغل يا ليلي ما تشغيلش بالك
- أهم حاجة ما تكونش اتخانقت مع حد أو حد مزعلك.
- لحد دلوقتي لا
- قال فريد جملته الأخيرة، وأراد أن يغير مجرى الموضوع
- هو خالد لسه ماجاش

- لا لسه ورنيت عليه ما ر دش عليّ.
- يمكن مشغول، لو مار دش عليك لحد معاد خروج أحمد من المدرسة ابعتي له رسالة قولي له فيها اننا هنبعت السواق يجيبه.
- حاضر، قوم بقى غير هدومك و أنا هسبقك على تحت.
- ماشي
- قامت ليلى واتجهت إلى باب الغرفة وداعت والدها بابتسامه خفيفة قبل أن تغلق باب الغرفة.
- قام فريد لتغيير ملابسه واللحاق بليلى، وعندما نزل وجد مكرم قد عاد من الجامعة وتجلس نهلة (زوجة مكرم) تتوسطه هو وليلى.
- وبعدما جلس فريد طلب من الطباخ ان يبدأ في التجهيز للغداء وطلب من السائق أن يذهب إلى المدرسة ليحضر أحمد، ثم بدأ الكلام قائلاً
- إيه الأخبار يا دكتور مكرم
- الحمد لله يا بابا
- قالت ليلى بلهجة قد غلب السرور عليها
- لوما عندكش مانع يا مكرم نخرج نتعشى برة النهاردة.
- لم تكذ ليلى تنهي كلامها حتى قالت نهلة
- أه ياريت يا مكرم حتى نغير جو
- سكت مكرم قليلاً قبل أن يرد
- في الحقيقة مش هقدر يا ليلى، أنا النهاردة مرتبط بميعاد بالليل.
- ردت نهلة متعجبة
- معاد إيه يا مكرم، أنت ما قتلتيش عليه

ليته ظل سرا

- مفيش يا نهلة رايح قراية الفاتحة بتعت معيد زميلي
- زفرت نهلة في ضيق، ثم أردفت
- طيب ممكن أجي معاك الفاتحة دي.
- جاء رد مكرم حاسمًا و سريعًا
- لا مش ممكن
- ليه
- دي حاجة على الضيق وكل الزملاء هيبجولوحدهم وكده يعني.
- أحست نهلة أن مكرم لا يريدنا معه، ولولا أنها تثق فيه ثقة عمياء لظننت
- أنه يخونها.
- ماشي يا حبيبي
- أنهت نهلة كلامها بالجملة الأخيرة، وحينها قال مكرم في رأسه (أنتِ بالذات ما
- ينفعش تيجي معايا المشوار ده).
- تدخلت ليلى لإيهام الموقف
- خلاص يا مكرم أي يوم تاني تكون فاضي فيه.
- إن شاء الله
- في تلك اللحظة دق هاتف ليلى، وقد كان المتصل هو زوجها خالد.
- إيه يا خالد ما كنتش بترد ليه على موبايلك
- معلش يا حبيبي حصلت حاجة غريبة جدًا النهاردة لما أجي هبقى أحكي لك
- عليها، أنا دلوقتي رايح أجييب أحمد من المدرسة.
- لا خلاص إحنا بعتنا السواق يجيبه، بس أنا نسيت أبعت لك رسالة، تعالي
- على طول

- اوكي يا حبيبتي، مسافة السكة وأكون عندك
بالفعل لم يتأخر خالد أكثر من ربع ساعة، وما إن وصل حتى جلسوا جميعاً
على مائدة الطعام وبدأوا يتبادلون أطراف الحديث.

وجهت ليلى سؤالها إلى خالد

- قولي بقى يا خالد إيه اللي حصل

- حاجة عجيبة جداً، بعد ما خلصت الكشوفات في العيادة الخارجية،
ولسه همشى فوجئت بضابط شرطة جايلي وبيقولي (حضرتك دكتور خالد سلطان)
قتله أيوا قالي (طب اتفضل معايا) قتلته طيب أنا عملت إيه قالي (اتفضل معايا)
قتله طيب أنا عملت إيه قالي (اتفضل معايا وبتعرف كل حاجة في القسم)

قاطعه مكرم مستنكراً

- كالعادة

ولكن ما لفت انتباه مكرم هو أنه لاحظ أن ملامح وجه والده قد تغيرت منذ
أن بدأ خالد الحديث.

أردف خالد:

- روجت القسم وفضلوا لاطعني ساعة في أوضة كده لوحدي لحد ما دخلت
للضابط وفوجئت بالضابط يسألني عن واحد مريض مات بعد جراحة عملتها له
وحسيت كده من طريقة كلامه إنه عاوز يوجه لي اتهام.

شهقت ليلى قبل أن تنطق في دعر

- وعملت إيه؟

- قلت له يا فندم دي حاجة عادية وبتحصل لأي حد، والعملية دي أصلاً
نسبة نجاحها مش كبيرة لقيته بيقولي (يعنى أنت مش شايف فيها أي شبهة جنائية)

ليته ظل سرا

قلت له لا طبعاً اللي حصل إحنا كنا متوقعينه والحالة ماتت بشكل طبيعي جداً، هو في حاجة حصلت جديدة قالي (أيوا يا سيدي أهل الميت قدموا بلاغ بيطلبوا فيه استخراج الجثة وتشريحها، بس طبعاً دي حاجة مش سهلة لازم يبقى في أي قرينة على أساسها يتم استخراج الجثة) قتلته وأنا بأكد لحضرتك إن الوفاة طبيعية قالي (جميل جداً، حضرتك أمضي على أقوالك، وتقدر تتفضل) بس أنا حسيت بحاجة غريبة ومش طبيعية في الموضوع.

رد مكرم

عادي يا خالد، يمكن أهل المريض عندهم وسواس وعازين يتأكدوا.
- لا يا مكرم، الكلام ده صعب جداً، لأن أهل المريض كانوا مدركين الحالة كويس وعارفين إن الوفاة كانت متوقعة.
- عموماً يا سيدي مش الموضوع عدى، ما تشغلش بالك بقى.

- على رأيك

قال خالد جملته الأخيرة وهو ينظر إلى طعامه ويبدأ في الاهتمام بالأكل، بعدها ساد الصمت إلى أن انتهوا من الطعام، ثم ذهبوا جميعاً للجلوس في جنيحة الفيلا، وبدأوا يتبادلون أطراف الحديث، لكن مكرم كان منشغل أكثر باللعب مع أحمد، وفريد كان كما لاحظ الجميع في عالم آخر.

إنها التاسعة ليلاً، الشوارع في وسط البلد لا زالت مزدحمة، لا زال هناك مجموعة من الأصدقاء يمشون ويعلو صوت ضحكاتهم، وهذا الشاب يمسك بيد تلك الفتاة ليعبر بها الشارع، ما زال هذا البائع يحلم ببيع ما تبقى لديه من بضاعة، وهذا الفتى يكتب على الحائط، وما زال هذا الرجل يتسول، وذاك الرجل يتشاجر مع الآخر منذ ساعة تقريباً من أجل أن يعترف أحدهم أنه مخطئ في الحادثة "التي

كادت أن تقع"، ومازال مكرم ياسين يسير بسيارته في وسط هذا الزحام، هو تقريبا لا يراه ففي مثل هذه الليلة المصيرية، لا يرى الإنسان ما يدور حوله ولا يشعر به، هو فقط يفكر، ثم يفكر، حتى وجد نفسه أمام ذلك المبنى العملاق الذي هو قاصده

نزل مكرم من سيارته، واتجه إلى باب العمارة

- مساء الفل يا باشا

قاطععه صوت "الركين" الذي يقف أمام العمارة

- مساء النور

قالها له مكرم وهو يلقي له بمفتاح السيارة

- إن شاء الله هخليها لك بتبرق

ابتسم مكرم ابتسامة خفيفة، فهذا الفتى يستحق الأموال التي يأخذها، فهو يقوم بغسل السيارة، ويقوم بحراستها أيضًا إلى أن يأتي صاحبها، صحيح أنه في بعض الأحيان يشعر أنه فرض عليه أن يدفع لهذا الفتى ولكن لا بأس فعلى الأقل هو فرض مقابل عمل يقوم به، هناك أشخاص كثيرين يعتبر الدفع إليهم فرض ولكن من دون أدنى مقابل!!

توقف المصعد في الطابق العاشر، فتح مكرم الباب و خرج من المصعد

متجها إلى الشقة التي يريدتها، دخل مكرم الشقة، توجد فوق الشقة لافتة مضيئة كتب عليها اسم أحد المعامل الشهيرة.

- مساء الخير

- مساء النور يا فندم

- من فضلك عايز التحليل ده

ليته ظل سرا

- ثواني يا فندم

انتظر مكرم قليلاً حتى قامت موظفة الاستقبال بطباعة التحليل.

- افضل

- شكراً

نزل مكرم سريعاً من البناية، وخرج متجهاً إلى باب سيارته، ناوله "الركين"

المفتاح، وناوله مكرم النقود في المقابل

- بس أنا ما لحقتش أعمل حاجة يا باشا

- مش مشكلة حلال عليك

- ربنا يخليك يا باشا

لم يجد "الركين" رد لأن مكرم قد انطلق بالسيارة مسرعاً فهو في الغالب لم

يسمع كلامه أصلاً.

في بعض الأحيان يتمنى الإنسان لو تقمص شخصيات أخرى لدقائق معدودة

لفعل شيء ما يتقنه هذا الشخص.

يتمنى مكرم الآن لو كان طبيباً حتى يستطيع قراءة هذا التحليل دون اللجوء

إلى الطبيب، من المؤكد أنه ليس من العيب أن يعلم أحدهم بمرضك خاصة إن كان

الطبيب، لكن في مثل حالة مكرم، فيتمنى الإنسان لو كان هذا سرّاً يقوله لسانه فلا

تسمعه إلا أذنه ولا يشعر به إلا قلبه.

وصل مكرم إلى بناية أخرى، وقف بسيارته أمامها وانطلق مسرعاً نحو باب

المصعد حتى وصل إلى الدور الخامس، دخل إلى العيادة التي يقصدها

نظر مكرم إلى السكرتيرة، وقال في عجلة

- لو سمحتي بلغي دكتور أسامة إن أنا موجود

ردت السكرتيرة في هدوء

- من غير ما أبلغه يا فندم، هو طلب مني إن حضرتك أول ما تيجي تدخل

على طول، أول ما الحالة اللي جوة تخرج هدخل حضرتك على طول

- تمام

جلس مكرم على مقاعد الأنتظار وقد بدا عليه التوتر، أخذ ينظر حوله في

ارتباك، ينظر في أعين المرضى، هذا الشاب الذي يبدو أن عمره قريب من عمر مكرم

ويحمل في يده تحليلاً يبدو أنه جاء لنفس الغرض، وهذه المرأة المسنة التي تجلس

هناك ولا يبدو عليها أي نوع من أنواع التعب وقد وجهت رأسها إلى التلفاز بكل تركيز

مع الفيلم الذي يعرض للمرة العشرين بعد المليون وهي تعرف كل كلمة قيلت فيه،

وهذا الطفل الذي يجري ويداعب المرضى ثم يأتي صوت أمه من وراء خطواته

"عيب كده يا ميدو".

انفتح باب غرفة الكشف وخرج منها المريض وقبل أن تنطق السكرتيرة كان

مكرم قد غادر مقعده

- افضل يا دكتور مكرم.

دخل مكرم إلى غرفة الكشف فوجد أسامة صديقه من أيام الجامعة يجلس

خلف المكتب، ويرتدي نظارته التي اعتاد أن يرتديها أثناء الكشف

- مكرم أنت فين يا ندل.

قالها أسامة معاتباً ثم أردف:

- يعنى أنا ما أشوفكش إلا لما تكون جاي تكشف

- يعنى أنت فاضي أوي يا أس، العيادة ما شاء الله ما فيهاش مكان برة

قالها مكرم وهو يجلس أمام أسامة
 - الله أكبر أنت جاي تقرر
 - لا يا عم ربنا يزيدك، المهم شوفلي التحليل ده بسرعة وحياة أبوك عشان
 أنا خلاص جبت أخرى
 أطلق أسامة ضحكة خفيفة
 - حاضر حاضر يا عم، ما تقلقش أوي كده
 قالها أسامة وهو يلتقط التحليل من يد مكرم
 - لا قلقان والله يا أس
 - ما تقلقش إن شاء الله خير.
 نظر أسامة في ورقة التحليل لثواني، ثوان مرت قبل أن يتغير لون وجهه،
 عرف مكرم نتيجة التحليل من عينيه
 من نظرات عيني أسامة فهم مكرم أنه لا يقرأ التحليل وإنما يفكر في
 الطريقة التي سيقول بها النتيجة.
 أنزل أسامة التحليل من أمام عينيه وهو يحاول الابتسام
 - شوف يا مكرم..
 - حالتي لها علاج ولا لا يا أسامة
 جاء الرد صاعقًا بالنسبة لأسامة.
 - الطب بيتقدم كل يوم وطبع...
 - لها علاج ولا لا يا أسامة
 لم يجد أسامة مفرًا، هو يعلم مكرم جيدًا، ويعلم أن الآن لا مجال لأي
 مواسة أو تجميل للكلام

- للأسف يا مكرم
 - ما تكلمش يا أسامة، تقدر تشوف شغلك
 قالها مكرم وقد قام من على مقعده
 - استني بس يا مكرم
 - أسامة أنا عارف أي كلام أنت ممكن تقوله، بس صدقني أنا محتاج أقعد
 مع نفسى شوية دلوقتي
 - بس يا مكرم أنا ما أقدرش أسيبك في الحالة دي
 - ما تقلقش، أنا هبقى كويس، يومين كده وهفوت عليك.
 خرج مكرم من غرفة الكشف، وكان كل شيء في قاعة الانتظار كما كان، لا
 زال الشاب يمسك التحاليل، ومازالت المرأة متجهة إلى التلفاز بكل تركيز رغم أنها
 تشاهد الفواصل الإعلانية، ومازال ميدو يداعب المرضى، ومازالت أمه تناديه "بس
 يا ميدو"
 لكن مكرم لم يركل هذا، ولم يسمع حتى صوت السكرتيرة التي قالت له (مع
 السلامة يا دكتور مكرم).
 خرج مسرعاً، ركب سيارته، وأخذ يتجول بها في شوارع القاهرة، دون أن
 يقصد أي وجهة، هو فقط يتجول بالسيارة، لا يريد الذهاب للمنزل، فقط يتجول
 بالسيارة، لا يرى أي شيء من حوله، فقط يتجول بالسيارة، لا يعلم كم السرعة
 التي يسير عليها، هو فقط يتجول بالسيارة، لا ينتبه إلى أي إعلانات تلقى عليه، هو
 يتجول بالسيارة، لا يلتفت إلى أي متسول يناديه في الإشارات، هو فقط....
 مر أكثر من شهرين بعد أن علم مكرم الخبر الأسوأ في حياته على الإطلاق، لم
 يكن يفكر سوى في هذا الأمر، كانت كل حياته تسير بشكل طبيعي في ظاهرها، لكن

ليته ظل سرا

قلبه كان يحترق كل يوم، تمامًا كما تغلى الحمم البركانية في باطن الأرض، لا حظ الجميع حوله أنه ليس طبيعيًا والده، زوجته، أخته، حتى تلاميذه لا حظوا أنه يبدو غير مستقر في تلك الفترة، كان يومه يسير بشكل طبيعي ولكن كالألة، جسد بلا روح، قلب بدون وجدان، عقل بدون أفكار، كان يذهب إلى الجامعة بشكل طبيعي حتى أنه لم يتغيب لمرة واحدة، كان يلقي المحاضرة كشريط مسجل، لا يتقبل الأسئلة، ولا يسمح بأي تعقيب على كلامه، ويغادر المدرج دون أن يطلب من تلاميذه أي شيء .

ها هو ذا يجلس في حديقة الفيلا، يمسك كتابًا من كتب علم النفس المقربة إلى قلبه، يقرأه بتمعن وكأنه يريد أن يخرج كل طاقاته فيه، يريد أن ينسى الحياة بين يدي هذا الكتاب، يريد أن يسبح في بحر صفحاته وليته يستطيع الغرق فيها.

- مالك يا حبيبي

جاءه صوت نهلة ليقطع حبل الأفكار الممتد بينه وبين صفحات الكتاب، حاول الابتسام قبل أن يقول:

- مفيش، مركز مع الكتاب شوية.

ردت نهلة في ضيق:

- أنا مش قصدي مالك دلوقتي أكيد، أنا حاسة يا مكرم إنك متغير، من

يوم قراية الفاتحة بتاعت صاحبك وأنت مش طبيعي

زفر مكرم:

- مفيش يا حبيبي، أنت عارفة الجامعة وضغط الشغل والم....

- لا يا مكرم

جاء صوت نهلة في حزم قبل أن تكمل بنفس النبوة:

- أنا اول مرة في حياتي أشوفك كده، عدت علينا ضغوطات كتير من يوم ما اتجوزنا وحتى واحنا مخطوبين، لكن عمرى ما شفتك كده.

ساد الصمت قليلاً قبل أن يقول مكرم:

- نهلة، في موضوع خطير يخص واحد صاحبي، هو شاغلني شوية اليومين دول، بس ما أقدرش أقولك عليه.

ردت نهلة وهي تعلم أنه يكذب

- صاحبك مين، أساساً أنت..

في هذه اللحظة جاء صوت هاتفه المحمول، فنظر مكرم إلى الهاتف ثم أردف - ثواني بس هرد على (مراد):

قالت نهلة بعد أن قامت من على مقعدها

- لا رد عليه براحتك، ونبقى نكمل كلامنا بعدين

أحس مكرم بالضيق من أسلوب نهلة، لكنه في ذات الوقت يعذرها، كما يعذر نفسه في عدم الإفصاح لها عن الحقيقة، رغم أن الأمر يخصها، لكنها الوحيدة التي ينبغي ألا تعلم

- ألو

- ألو إيه يا ميكو، واحشني يا حبيب قلبي

كان مراد صديق مكرم المقرب أيام الدراسة، وهو لا يزال إلى الآن، كان مراد سر مكرم الأمين، شريكه في لحظات فرحه، كما كان يقاسمه لحظات حزنه، وكما كان نفسه التي يتحدث إليها في أوقات ضيقه، وهل للصدقة معنى أسى من ذلك.

- والله أنت الي وحشاني أكثر يا مراد، إيه يا ابني، مش هتيجي بقى من شرم

الشيخ.

ليته ظل سرا

- هانت كلها يومين أو ثلاثة بالكثير وأكون عندك، المهم سيبك منى أنا أنت مالك الأيام دي مش مضطرب ليه.
- وأنت مين اللي قالك إني مش مضطرب!!
- يا ابني أنت ناسي إن أختي في أولى علم نفس السنة دي.
- أه ده أنا متراقب بقى وأنا ما أعرفش
- طبعا، واعمل حسابك إن كل خطوة هتخطيها في الكلية هعرفها، والأخبار اللي وصلاني إنك مكشرف في المحاضرات وما بتسمحش بالأسئلة، ومودك مش مضبوط خالص.
- دي حكاية طويلة يا مراد لما أشوفك هبقى أقولها لك.
- يعنى في سبب
- ومن إمتى أنا بزعل من غير سبب.
- انا قلت برضو إن مكرم ياسين ما يعملش فيه كده غير الشديد القوي.
- أوي يا مراد.
- رد مراد وقد بدأ القلق يسيطر على صوته
- أنا كده قلقت أكثر يا مكرم، في حاجة بينك وبين نهلة
- هو لحد دلوقتي مفيش، ولما تيجى محكيك كل حاجة.
- ماشي، كلها يومين واللي بفلوس يبقى ببلاش
- بطل لغتك المعفنة دي
- أطلق مراد ضحكة خفيفة
- سيينا لك اللغة الراقية يا ابن الباشا
- ماشي يا عم، أول ما توصل مطار شرم الشيخ كلمني وأنا هستناك هنا في

المطار.

- اتفقنا يا غالي يلا سلام

أغلق مكرم الهاتف وعاد من جديد ليُرسل عقله ليغوص بين صفحات هذا الكتاب، مر أكثر من نصف ساعة ولم تأتي نهلة من جديد، لا يهم الحمد لله أنها لم تأتي، فهو لا يملك أي إجابات لإقناعها بالسبب الحقيقي وراء تغييره، وفجأة رن الهاتف من جديد، ولكن هذه المرة رقم لا يعرفه، لا بأس فقد إعتاد مكرم الرد على الأرقام الغريبة ما دام لا يقف أمام السبورة

- ألو

- دكتور مكرم ياسين معايا

- أيوا يا فندم، مين معايا

- أنا دكتور سعيد من مستشفى التاج

- خير يا دكتور

صمت الدكتور قليلاً قبل أن ينطق بجملته واحدة لا تحتل التأويل.

- البقاء لله يا دكتور.

وصل مكرم ياسين إلى مستشفى التاج، يريد التقدم أكثر، قدماه لا تحمله، عيناه لا تكفان عن البكاء، ضلوعه لا تكف عن الارتجاف، صوته لا يستطيع المغادرة من بين شفتيه، عقله لا يتوقف عن التفكير

بالكاد وصل أخيراً إلى الموظفين الجالسين في الاستقبال، تكلم بصوت لا يكاد

يسمع.

- غرفة فريد باشا ياسين.

أجاب موظف الاستقبال

- أوضة ١٠٤ الدور الأول، البقاء لله يا فندم
حاول الموظف تعزية مكرم لكنه هز رأسه دون أن يرد أو بالأحرى لا يقوى
على الكلام.

انطلق مكرم إلى الغرفة المحددة، كل ما صعدت قدمه درجة من درجات
السلم، يرى ذكرى بينه وبين أبيه، وحينما يصعد أخرى يسمع ضحكته تملأ أرجاء
المنزل، والدرجة التي تليها يحس بيده تربت على كتفه، وكلما صعده أكثر كلما تذكر
أكثر، عندما كنت صغيرا، عندما أهداني أول دراجة في حياتي، عندما أحضر لي ما
أريد لمجرد أنه سمعني أشتهي، عندما ذبح الذبائح بعد نجاحي في الثانوية، عندما
غمرني يوم زفافي، عندما، عندما، عندما،.....

وعندما وصل مكرم إلى الغرفة، وجد ليلي قد وصلت، فمزلها أقرب إلى

المستشفى

رأته ليلي فقامت من مكانها وجرت نحوه، غمرته غمرة تغنى عن أي كلام،
كان مكرم يقف كبناء صلب، لا يتحرك فيه أي شيء، لم يرفع حتى يديه ليضم
شقيقته، عيناه ثابتتان في موضعهما كجثة محنطة، ولو وقف هكذا لمدة طويلة
لتركت أثار أقدامه حفرة في الأرض من شدة ثباتها

- بابا مات يااا مكرم

صرخت ليلي بين أحضان مكرم

- بابا مات وسابني لوحدي

معتش ليا غيرك يا مكرم

أنت الوحيد اللي فاضل لي.

لم يتمالك مكرم نفسه في هذه اللحظة، فكلمات ليلي قد فتحت جرحًا

قديمًا غائرًا في صدره، للحظات أحس بالوحدة، تذكر أمه التي رحلت في اليوم الأخير من أيام امتحانات شهادته الثانوية، واليوم قد رحل أبوه كذلك، أحس بما تعنيه ليلى، أحس بالخطر الحقيقي الآن فقط.

اليوم أيها المدلل قد مات والداك
 قد تركت اليوم وحدك في صراع
 اليوم أيها المدلل تجنى ما تزرع يداك
 لم تعد طفلاً لأي احد في البقاع
 اليوم يا ولدى وحيدا في الهلاك
 قد عرفت اليوم حقًا معنى أوقات الوداع

غمر مكرم ليلى في هذه اللحظة، تحركت مشاعره، تسمع ليلى صوت زفيره العالي، تحس بصدره يعلو ويهبط بسرعة غريبة، وأخيرًا تحرك لسانه.
 - أمر الله يا ليلى، أمر الله ولازم يتنفذ، اللهم إني لا أسألك رد القضاء، ولكن أسألك اللطف فيه

- يا رب أموت قبلك يا مكرم، عشان مش هستحمل أنت كمان تروح مني.

كانت الجملة الأخيرة بمثابة الصدمة لمكرم

- أنت مش هستحملي، وأنا اللي هستحمل

لو أنا موتت قبلك هبقى ميت، ولو أنت موتى أول هبقى برضو ميت.

كلمات قالها مكرم لم يعد بعدها مجالاً للكلام، عرف كل منهما في هذه اللحظة أنه لم يعد له من الدنيا إلا الآخر، ربما كان كلامهما فيه نوع من المبالغة،

إلا إنه يعبر عن جزء كبير من الواقع.

في اللحظات الصادمة يقول الإنسان كلامًا غريبًا، أو حتى يمكن أن يتخذ قرارًا طائشًا لا يفهم معناه، لكن المشاعر الصادقة لا تتجلى بكامل بهائها إلا في تلك اللحظات.

- دكتور مكرم

هذه المرة كان صوت الطبيب

التفت مكرم إلى الطبيب، وبوجه شاحب أجابه

- أيوا يا دكتور

- حضرتك ممكن تدخل تبص على المتوفي مرة اخيرة قبل تجهيزه، مدام ليلى

رفضت تدخل إلا في وجود حضرتك.

هز مكرم رأسه بالإيجاب، واصطحب ليلى إلى الغرفة التي كان فيها والده.

بعد قليل خرج كليهما من الغرفة، لم يرو مكرم لأي شخص ما حدث

بالداخل، هي الذكرى الأخيرة له مع والده، بالتأكيد لن ينساها، ولكنه أيضًا لا يريد

أن يتذكر والده في تلك اللحظة، تبا للمشاعر المختلطة عندما تتصارع في صدر

الإنسان.

توجه مكرم ناحية الطبيب وسأله

- عم بهيج السواق أخباره إيه

- ادعوا له بالرحمة

هز مكرم رأسه حزنا

- مين اللي جا بهم المستشفى؟

- الناس اللي كانوا على الطريق وقت الحادثة

- والحادثة حصلت إزاي

- اللي شافوا الحادثة بيقولوا إنهم كانوا ماشيين على الطريق عادى وفجأة فقدوا السيطرة على العربية واتقلبوا بيها.

هز مكرم رأسه ثانية

- دكتور، أرجو من حضرتك إن محدش من الإعلام يأخذ خبر عن أي

تفاصيل

- تحت أمرك يا دكتور مكرم، بعد إذنك

بعد الانتهاء من تجهيز الميت، خرج مكرم من المستشفى، وفي هذه اللحظة وجد جمعا غفيرا من الصحفيين في انتظاره، استوقفوه، وتوالت عليه الأسئلة.

(دكتور مكرم ايه ملابسات الحادثة بالتفصيل؟)

(دكتور مكرم حضرتك بتشكك إن الحادث مدبر؟)

(دكتور مكرم هل المرحوم كان له أعداء؟)

(دكتور مكرم إيه مصير المجموعة بعد وفاة والدك؟)

لكن مكرم لم يجب عن أي أسئلة وشق الصفوف باتجاه سيارته، وانطلق

سريعًا نحو المنزل.

أقيم العزاء في الفيلا لمدة ثلاثة أيام، حضر كثير من رجال الأعمال، والشخصيات العامة، لتقديم واجب العزاء، نشرت عشرات العزاءات في الجرائد، أما بالنسبة لعائلة ياسين فجاءة منها الكثير لكن مكرم لم يكن يعرف منهم سوى عمته نادية وولداها حميد و محمود.

بعد يومين من انتهاء العزاء وبينما كان مكرم يطالع إحدى الكتب في غرفته،

جاءه عم محروس

ليته ظل سرا

- مكرم باشا، الرائد حسن اللي ماسك قضية فريد باشا الله يرحمه طالب يقابل حضرتك ومستني حضرتك تحت.

- طب روح أنت، وأنا هغير هدومي، وأنزل له، وشوفه يشرب إيه.

بعد خمس دقائق نزل مكرم من غرفته، كان الضابط ينتظر في بهو الفيلا، تقدم إليه مكرم وسلم عليه، وبالطبع لم ينسى الضابط تقديم واجب العزاء بكلمات سمعتها أذن مكرم ألف مرة في الخمس أيام الماضية.

- خير يا فندم

- الحقيقة يا دكتور مكرم مش عارف هو خير ولا شر

- يعنى إيه

- يعنى فرامل عربية والد حضرتك كانت مفكوكة بفعل فاعل

اتسعت عينا مكرم من الاندهاش

- معنى كده إن الحادث كان مدبرًا!!!

- بالظبط كده يا دكتور.

- بيقولوا هيجي النهارده

هكذا ردت دينا على سؤال صديقتها وزميلتها في العمل منار عندما سألتها

- هو مكرم ياسين هيستلم الشركة امتي

وهكذا كان تساؤل كل العاملين في الشركة، بل وفي مجموعة ياسين كلها،

بالطبع تساؤلات وشكوك تحوم في نفس كل شخص فيهم، كيف سيدير مكرم

المجموعة، كيف ستكون معاملته مع موظفيه، كيف سيتمكن من التصدي

للعقبات التي ستواجهه في البداية

لم يكن العاملين في مجموعة ياسين وحدهم من ينتظرون، بل الشركات

المنافسة أيضاً، والسوق بشكل عام، واحدة من أكبر المجموعات في مصر عندما تتعرض لتغيير في الإدارة، خاصة و أنهم يعلمون جيداً أن مكرم كان خارج ذمام المجموعة بالكامل، فبالتأكيد أن الأمر لن يخرج عن شيئين إما ان تكمل الادارة الجديدة بنفس مبدأ الادارة القديمة وبالتالي ستسير الأمور كما كانت، وبالتأكيد إن كنت من معسكر الخصوم فستمنى أن يكون عامل خبرة مواجهة الأزمات هو الفيصل، وإما أن يتم تطبيق فكر جديد وهنا إما أن ترتفع المجموعة وتصعد كالصاروخ، وإما أن يكون فكر جديد متهور فيجهز على المجموعة .

على كل حال الجميع ينتظر...

وصل مكرم ياسين إلى مقر المجموعة، دخل فوقف الموظفون جميعاً لتحيته وتقدير العزاء له، وكان بجانبه بعض من أعضاء مجلس الادارة، وعندما وصل إلى مكتب والده، الذي أصبح من الآن مكتبه ومقر عمله، وجد رحمة أمام الباب، فتحت رحمة الباب عند وصول مكرم وبالطبع لم تنسى تحيته وتقدير واجب العزاء للجميع

دخل مكرم إلى مكتب والده ثم توقف فجأة، وأخذ يتجول ببصره في أنحاء المكتب، ويتذكر والده وذكرياته معه في هذا المكتب.

لم يطل الوقوف وتقدم وجلس على المكتب، فجلس أمامه أعضاء مجلس الادارة المرافقين وقال أحدهم:

- نورت المجموعة يا دكتور مكرم

رد مكرم وقد بدا عليه الضيق

- والله يا أستاذ ياسر خايف أضلمها ما أنورهاش

- لا ما تقولش كده يا دكتور، أنت بس قلقان عشان لسه في البداية، لكن

- مع الوقت، هتقدر تواكب الوضع
 - عموما يا أستاذ ياسر، أنا عايز اجتماع عاجل لمجلس الادارة، عشان
 نشوف هنعمل إيه في المرحلة الجاية، أنا عايز الأمور تمشى بشكل طبيعي، وكأن بابا
 الله يرحمه لسه موجود.
 - أكيد يا دكتور .



- حضرتك تحب أروح لمكرم امتي
 قالها الرجل البدين ذو الشارب الكبير لآخر يجلس خلف المكتب
 - استني شوية، سيبه لما يستقر و الأمور تمشى معه، وبعد كده ابقى روح له
 - ما ندق ع الحديد وهو سخن يا باشا
 - غبي
 قالها الرجل خلف المكتب وهو يضرب بيده على المكتب.
 - أنا قلت سيبه لما يستقر، وبعد كده اللي أقولك عليه تنفذه وأنت ساكت
 - حاضر، حاضر يا باشا.



ليته ظل سرا

- دخلت رحمة على مكرم وهو جالس على مكتبه
 - دكتور مكرم
 - خير يا رحمة
 - أستاذ مراد مستني حضرتك برة
 - خليه يدخل فوراً
 خرجت رحمة، فوقف مكرم وتقدم باتجاه الباب لاستقبال مراد، وما إن
 دخل مراد إلى المكتب، حتى غمر مكرم بشدة.
 - البقاء لله يا مكرم
 - الدوام لله
 - سامحني ما قدرتش أجي الجنازة، الشغل بقى زي ما أنت عارف
 - أنا مقدر يا مراد ومش زعلان منك
 جلس الاثنان على المكتب، فبدأ مراد بالحديث
 - المهم أنت أخبارك إيه دلوقتي.
 - الحمد لله، أهو شغل المجموعة هنا، مع شغل الجامعة، خلوني أنسى
 شوية.
 - إن شاء الله تكون آخر الأحزان يا مكرم
 ابتسم مكرم ابتسامة خفيفة.
 - يا أخي نفسى إحنا كمصريين نبطل نقول الكلام الأهيل ده، آخر الأحزان
 إزاي يا مراد، عشان تكون آخر الأحزان لازم أنا أموت قريب، لأن طول ما الحياة
 مستمرة في أفراح وطبعاً في احزان
 - يا عم أهو أي كلام بنصبر بيه نفسنا

ليته ظل سرا

- على رأيك، المهم دلوقتي أنا عايزك في حاجة مهمة.
- حاجة إيه؟
- عايزك معايا
- فين
- أكيد مش في البيت، عايزك معايا هنا في الشركة
- أجاب مراد باندهاش
- يا ابني أنا مهندس نظم وحاسبات أعمل إيه هنا
- عارف إنك مهندس، بس أنا عايزك معايا عضو مجلس إدارة.
- زاد اندهاش مراد
- مكرم أنا عمري ما كنت بفهم في الإدارة
- يا أخي هي كيميا، هت حضر معانا كام اجتماع في الاول، وهتفهم القصة
- بتمشي إزاي .
- صمت مكرم قليلاً ثم أردف
- وكمان في حاجة تانية
- في إيه تاني
- أنا هنزل رحمة تحت في العلاقات العامة. وعايزك تبقى مكانها. وتعمل
- شغلها.
- نعم!!!!، هت شغلني سكرتير كمان.
- ما تاخدهاش كده، قول مدير مكتب
- مكرم أنت بتهزر صح
- ما بهزرش ولا حاجة، أنت عارف إني ما بحبش أشغل مع ستات،

وبصراحة ده مكان حساس وعاييز حد ثقة.

صمت مكرم مرة أخرى قبل أن ينظر في عيني مراد ويردف بنبرة تحمل شيئاً من الرجاء.

- مراد ..أقف جنبي

ساد الصمت للحظات قبل أن يقول مراد

- طب اديني فرصة أفكر

- ماشي، معاك أسبوع من دلوقتي، وكمان أنا عارف إن أنت لسه جاي من

شرم ومحتاج إجازة

- والله عندك حق، أنا فعلا محتاج إجازة.

- خد يا عم أجازتك براحتك وفكر براحتك، وأنا مستني موافقتك بعد

أسبوع.

أطلق مراد ضحكة خفيفة قبل أن يردف

- ماشي

اليوم مليء بالأشياء الواجب فعلها، لبت الأعمال تأخذ الأحكام الشرعية الخمسة، فيكون هناك أعمال واجبة النفاذ، وغيرها حرام فعلها، وأخرى مكروهة، ويكون هناك الأعمال المندوبة، أما بالنسبة لفكرة الأعمال المباحة فهذه موجودة بالفعل، ولكنها تختلف من شخص لآخر أو من عقل لآخر أو لأكون دقيقا تختلف من فكر لآخر

جلس مكرم يفكر في حجم الأعمال التي أمامه، وحينها تذكر والده، كيف كان يحمل كل هذا العبا وحده، لماذا لم يطلب منه مساعدته يوما ما، بحجم الأعمال التي يراها أمامه الآن فقد كان في احتياج من يحمل معه، لذا فكر مكرم في مراد،

ليته ظل سرا

ربما فكر والده فيه كما يفكر هو في ليلي الآن، فهو لا يريد أن يشغلها عن عملها، أو يكبدها ما لا تطيق.

قاطعت رحمة تفكيره عندما دقت الباب لتستأذن في الدخول

- ادخل

دخلت رحمة وتقدمت نحو مكرم

- أستاذ ياسر مدير الحسابات بعث لحضرتك الورق ده عشان تراجعه

- ماشي، شكرًا يا رحمة

- أه وفي واحد جه سأل على حضرتك بعد ما حضرتك مشيت إمبارح

رد مكرم باندهاش

- واحد مين ده

- مش عارفة اسمه بصراحة، بس هو رجل قصير شوية و تخين و عنده

شنب كبير، جه هنا لفريد باشا حوالى ٣ مرات قبل كده.

ازداد اندهاش مكرم فسأل

- وقالك ايه الراجل ده

- ما قالش اكر من "مكرم باشا موجود " قتلته "لا" قالي " خلاص أنا هبقى

أفوت عليه وقت تاني"

- بس كده

- أيوا يا فندم

بدأ الشك يساور مكرم حول هذا الرجل، كيف يفكر في أن يأتي إلى هنا

لمجرد أن يسأل عن وجودي، كان يمكنه الاتصال قبل المجيء، وطالما لم تكن هذه

زيارته الأولى فبالتأكيد هو يعلم كيف يمكنه معرفة وجودي من عدمه، في حقيقة

الأمر هذا الرجل يراقبني، هو يريدني أن أسعى خلفه و اتقصى حقيقته، وطالما هو يريد هذا، فلن أفعله

- بصي يا رحمة، لو الراجل ده جه تاني وأنا موجود سيبيه ملطوع عندك شوية قبل ما يدخلي، ولو جه وأنا مش هنا اسألبيه عازوني في ايه، أو على الأقل خدى منه الكارت بتاعه.

- مفهوم يا فندم

قالتها رحمة، وبعدها خرجت من المكتب.

أخذ مكرم يتذكر الأوصاف التي ذكرتها رحمة، رجع بذاكرته إلى الورااء قليلاً، إلى يوم العزاء، لقد رأى مكرم هذا الرجل من قبل، أو ربما لا يكون هو، الأوصاف التي ذكرتها تنطبق على نصف الشعب المصري تقريباً، جاء ليقدم واجب العزاء، لم يره مكرم قبل هذا اليوم، ترى ماذا يريد منه هذا الرجل هذا لا يهم الآن، فهناك الكثير من العمل يجب إنهاءه.

استيقظ مكرم من نومه مبكراً كعادته، هو دائماً ما يعتقد أن النوم خلق من أجل أن يكون عاملاً مساعداً على الراحة، ومن ثم الاستيقاظ لبداية يوم جديد والاستمتاع به، ليس كما تعتقد نهلة أن النوم متعة في حد ذاته، هكذا اختلفا على ماهية النوم، ولم يكن الشيء الوحيد الذي اختلفوا عليه، فبالفعل هم يختلفون في أشياء كثيرة، لكنهما الآن زوجان وهذا ما يهم مكرم.

لم يكن زواجهما سهلاً، فمكرم قد جذبته تلك الفتاة بشدة في الأسبوع الأول بين أسوار الجامعة، لم يكن مكرم قد قرر أن يغوص في بحر حبه منذ البداية، لكنه كان يحب رؤيتها، يحب سماع صوتها، كان يحب ابتسامتها وغضبها، يحب ألوان ملابسها، ولا يدرى ما الذي يصيبه في اليوم الذي لا تتشرف الجامعة

بحضورها فيه، لكنه لم يعترف بحمها.

حتى جاء ذلك اليوم الذي طرقت فيه ليلى باب غرفته وهو منهمك في

مذاكرته

سمع مكرم الطريقة الثالثة ظنا منه أنها الأولى

- تعالى يا ليلى

دخلت ليلى إلى الغرفة فاستقبلها صوت العندليب (حرام نسكت على قلوبنا

حرام الشوق يدوبنا)

- كل ده عشان ترد، ده أنا فكرتك نمت

قام مكرم بإيقاف الأغنية

- أنت بتخبطي بقى لك كثير.

- أنت ما رديتش إلا بعد تالت مرة

ثم أردفت بلهجة ماكرة:

اللي واخذ عقلك

رد مكرم مبتسما

- واخذ عقلي مرة واحدة

ضحكت ليلى بصوت عالي هذه المرة ثم أردفت:

- يعنى قافل على نفسك ومشغل عبد الحليم و سرحان وترد عليّ بعد تلت

خبطات وعازيز تقنعني مثلاً إنك سرحان في مبادئ علم النفس

لم يستطع مكرم أن يدارى ابتسامته

- هتخي على لولا.

- يا سلام دلوقتي بقيت لولا في ثانية، لما تكوني عازيزه تعرفي حاجة لو هتعيدي

ليته ظل سرا

البحر عشان تعرفيها هتعدديه.

- أنا كده يا ميكو

رد بلهجة ساخرة

- لا خالص طبعًا، وأولًا أنا اسى مكرم مش ميكو، ثانيًا أنتِ لو ذكائك قد

فضولك كنت عدلتي على نظرية النسبية.

ضحكت ليلي مرة أخرى ثم أردفت

- مش هتقولي بقى

- أقولك إيه

- تقولي أنت بتفكر في مين

صمت مكرم قليلًا قبل أن يردف

- والله هو مش بفكر أوي يعنى، يعنى، بصي يا ليلي

- بصيت

- هو أنا بحب أشوفها، وبحب أسمع صوتها، وبتحجج بأي حجة عشان أروح

المكان اللي هي بتبقي موجودة فيه، ومشيت وراها بالعربية لحد ما عرفت هي ساكنة

فين:

ردت ليلي بلهجة ساخرة

- وإيه كمان

- ولقيت أبوها عنده محل قماش، فاتحه تحت العمارة اللي هي ساكنة فيها،

واتلككت مرتين عشان أتكلم معاه

- بس كده

- لا، وأي حاجة عايز أعملها في شئون الطلبة بستنى لما هي تروح عشان

ليته ظل سرا

أعملها، وأي مجموعة في أي حاجة هي بتشترك فيها أنا بتشترك فيها

ثم صمت قليلاً:

- ليلي هو أنا كده بحبها

- لا خالص

قالتها ليلي ثم انفجرت من الضحك، الغريب في الأمر أن مكرم كان مندهشا

- أنتِ بتضحكي على إيه

قالت وهي ما زالت تواصل الضحك

- على عبطك، أنت كل ده ولسه بتسأل أنتِ بتحبها ولا لا، ده أنت واقع

ومحدث مسعى عليك

- مش للدرجة دي يعنى

- يا ابني أنت بتستهبل، ده أنت ما بتعملش حاجة واحدة إلا ومعناها إنك

بتحبها

زفر مكرم زفرة خفيفة

- تفتكري أعمل إيه يا ليلي

- بص، لولا إن أنا عارفك كويس وعارفة إنك مش بتاع كلام من ده كنت

قلتلك قولها إنك بتحبها

ابتسم مكرم ابتسامة خفيفة:

- كويس إنك عارفاني

- خلاص يبقى مفيش قدامك غير حل واحد

فهم مكرم ما ترمي ليلي إليه

- أنتِ عارفة إن لسه بدرى على الخطوبة.

- ولا بدرى ولا حاجة
- طب ما أنا كمان عايز أتأكد من مشاعرها نحيتي
- خلاص اتقدم لها، ولو وافقت يبقى بتبادلك نفس الشعور.
- طب ولورفضت يا ناصحة:
- خلاص، يبقى مفيش نصيب.
- نعم!، (مفيش نصيب) لا يجسر إنسان أن يعترض على تلك الجملة، فمجرد اعتراضك عليها يعنى اعتراضاً على إرادة الله، كلنا نقولها في مختلف الأوقات، لكننا تكثر في الحزين منها، جملة المواساة الأشهر في مواقف الخيبة لم يستسيغها مكرم، هو لم يتمتع، لكنه حقاً لا يتخيل العيش بدون هذه الفتاة.
- ساد الصمت قليلاً، وغاص مكرم في خيالاته قليلاً
- طب تفتكري هي خدت بالها منى
- انفجرت ليلي من الضحك مرة اخرى
- ده اللي أنت قلتة ده مش زمانها خدت بالها منك دي زمانها شردتك وسط صحباتها.

- قالتها ليلي وهي تضحك وواصلت الضحك
- نظر إليها مكرم وهو يحاول أن يضحك ولكنه لا يستطيع
- طيب على أوضتك يا أم دم خفيف
- زادت نبرة ضحك ليلي
- ليه يا ميكو، أنت زعلت
- جذبها مكرم من ذراعها وهو يقول
- لا ما زعلتس ولا حاجة، أنا بس عندي مذاكرة كتير قد الخفة اللي في دمك

ليته ظل سرا

خرجت ليلي من باب الغرفة وهي ما زالت تواصل الضحك

- تصبح على خير يا روميو

- ماشي يا زينبات يا صديقي

قالها مكرم ثم أغلق باب الغرفة، جلس على سريره، ثم أعاد تشغيل الأغنية

(حرام نسكت على قلوبنا، حرام الشوق يدوبنا)

بعد مرور أكثر من شهرين على تواجد أي شخص في مكان معين أو في منصب

معين يفهم الشخص نفسية هذا المكان.

هذا ما كان يفكر فيه مكرم وهو يجلس في مكتبه وحيدا وسط الأوراق، لا

يكسر ملله إلا قراءتها، ولا يداعب أذنه سوى صوت تقليبيها.

يحاول مكرم فرض أسلوبه على الشركة، على العاملين فيها، حتى على

المتعاملين معها، رؤيته ووجهة نظره قد تختلف كثيرا عن والده، لكنه مقتنع بها

تماماً ولا يريد التعامل إلا بها.

حتى الآن لم يتأخر مكرم في أي صفقة قد تعاقدها عليها والده، ولا في ميعاد

دفع أي أموال لأصحابها، كل شيء يسير كما لو كان فريد ياسين نفسه هو القائم

بتلك الأعمال، لا ينكر مكرم أن الفضل في ذلك بعد الله - سبحانه وتعالى - لا

يعود إليه أولاً وإنما إلى ياسر ورحمة و غيرهم من العاملين في المجموعة، فهم

يعرفون ما يجب عليهم فعله، أو ما الذي كان سيطلبه والده منهم في كل المواقف

التي مرت خلال الشهرين الماضيين، لكنه يرى أن الوقت قد حان لفرض أسلوبه

على كل شيء في هذا المكان.

حتى على من ينفذون طريقة وفكر والده

لكن لكي تفرض هيمنتك الفكرية على مكان معين لا بد وأن يكون هناك أشخاص تحت قيادتك يفكرون بنفس الطريقة، أو على الأقل مؤمنين بما تفعله، لهذا فكر مكرم في الاستعانة بصديقه مراد، فهو يعرفه من أيام الجامعة، ويعلم أنهما متشابهان في التفكير.

قام مكرم من على مكتبه واستعد للذهاب للجامعة، فرغم انشغاله الكبير بالمجموعة إلا أنه لم يترك محاضرة واحدة لم يذهب إليها، فهو يحب عمله في الجامعة كثيرًا، ولا يوجد لديه نية للتفريط فيه، فهو لم يصل إليه بسهولة أو عن طريق الوساطة كما يفعل الكثيرون.



بعد أن أنهى مكرم محاضرتة، ركب سيارته متجهًا إلى الشركة.

أخرج هاتفه المحمول من جيبه وقام بالاتصال بمراد.

- ألو -

- أيوا يا مراد

- أيوا يا مكرم

- إيه يا عم هو الأسبوع بتاعك كام يوم.

أطلق مراد ضحكة خفيفة

- تصدق بالله أنا كنت بالبس عشان جاي لك الشركة دلوقتي حالا

- أفهم من كده إنك وافقت

- هو معنى إني أجي لك الشركة إني كده وافقت

رد مكرم مازحًا

- أmaal معناه إيه، إن إحنا أصحاب مثلا وجاي تقعد معايا

ضحك مراد مجددًا

- ماشي يا عم، عموما لينا كلام تاني لما نتقابل في الشركة.

- أو ك هستنك

- أنت صوتك برة أصلًا

- أه، ما أنا لسه مخلص المحاضرة ورايح الشركة دلوقتي

- يبقى أنا اللي هستنك بقى

- مش عارف....احتمال، أصل أنا كمان ممكن أشتري شوية حاجات في

طريقي.

- حاجات إيه، لو هتجيب أكل هاتلى معاك

في تلك اللحظة شعر مكرم بشيء غريب، فهناك سيارة تتبعه منذ أن خرج

من الجامعة، هو يراها منذ البداية، لكنه عندما غير طريقه تبعته، وعندما غيره

للمرة الثانية كانت ورائه أيضًا.

هذا الأسلوب القديم في التتبع الذي كان يستخدمه فريد شوقي عندما يبعثه

زكى رستم (رئيس العصابة) لمراقبة أحدهم، فيتبعه بالسيارة إلى أن يكتشف

المراقب، ويهرب منه، هذا الشخص يتبع نفس الأسلوب مع مكرم، لماذا لم تتعلم

من فريد شوقي.

- مراد في عربية ما شية ورايا من ساعة ما طلعت من الجامعة

- عربية.....شكلها إيه العربية دي

- عربية ملاكي لونها فضي، بس طبعًا مش قادر أشوف الأرقام من هنا، ده

غير كمان إني مش متأكد إنها ماشية ورايا.

- طب وبعدين

- اقبل دلوقتي ونتقابل في الشركة

انطلق مكرم بسيارته ليغير طريقة للمرة الثالثة، هذه المرة أيضًا السيارة

خلفه

- كده بقى الحكاية بقت واضحة

قالها مكرم في نفسه

توقف مكرم عند أحد المتاجر الكبيرة ليرى رد فعل السيارة الفضية، لم

يتردد سائق السيارة أن ينطلق بجوار سيارة مكرم من دون حتى أن يهدئ من

سرعته.

- لا ناصح.

الرجل فهم أن مكرم كشف مراقبته له، فلم يتوقف حتى لا يحول الشكوك

إلى يقين، وحتى لا يتمكن مكرم من قراءة لوحة السيارة، وحتى لا يرى مكرم وجهه

فلا يتمكن من مراقبته في أي مكان آخر.

بالفعل نجح الرجل في كل هذه الأمور إلا في أمر واحد.

أخرج مكرم هاتفه المحمول وسجل رقم السيارة بسرعة، ثم دخل إلى

المتجر، واشترى ما يريد، ثم اتجه إلى الشركة لكن هذه المرة من دون سيارة فضية

حمقاء تسير خلفه.

وجد مراد ينتظره فور دخوله إلى مكتبه

- إيه بقى لك كتير مستني

- لا خالص، ده حتى القهوة اللي طلبتها لسه ما وصلتش

ليته ظل سرا

جلس مكرم على مكتبه، تهدت تهيدة خفيفة ثم بدأ بالكلام.

- أنا جبت رقم العربية

- إزاي!

- لما وقفت عند السوبر ماركت، لقيته جرى من جنبى، بس الحمد لله قدرت

أخذ الرقم

- وهتعمل إيه دلوقتي

- أنا ليا ناس في المرور وهعرف دي عربية مين

- حاجة غريبة فعلا مين اللي بيراقبك، وبيراقبك ليه.

- عموماً كل حاجة هتبان لما نعرف مين صاحب العربية، المهم طمني عليك

- أنا الحمد لله كويس

سكت مكرم قليلاً، ثم ابتسم

- خدت قرارك

هز مراد رأسه بالإيجاب

- شوف يا مراد قبل ما تقول قرارك لازم تبقى عارف إني مش هزعل منك لو

رفضت، في النهاية دي حياتك وأنت حر

- وأنا من امتي رفضت لك أي طلب عشان أرفض المرة دي

ابتسم مكرم من جديد

- يعنى أنت وافقت

- أنا موافق من أول لحظة

- أمال إيه ادبني فرصة أفكر، وعملتلي فيها عم المهم

- يا أخي بتراخم عليك شوية.

- ماشي يا عم الرخم، أنت بقى هتبتدي الشغل من دلوقتي، رخامة بقى
ضحك مراد ضحكة طويلة
- أمال أنا جاي ليه
- ماشي
- قالها مكرم ثم رفع سماعة الهاتف وطلب رحمة
- تعالى يا رحمة
- قالها مكرم بعد أن دخلت رحمة إلى المكتب
- رحمة أنا عارف إن أنت مخلصه جدًا للشركة، ومقدرش أنكر لولا وقفك
جنبي كان هيبقى ناقصني حاجات كتير
- ميرسى يا دكتور، بس ليه الكلام ده
- رحمة أنا هرقيكى، هخليكى في العلاقات العامة في الشركة، وهخلي مرتبك
الضعف
- اندهشت رحمة من هذا القرار، لم تستطع أن تخفى فرحتها، لكنها أيضًا لا
تفهم ما سبب هذا القرار
- المهندس مراد هيشغل مكانك، وتقدرى تستلمى شغلك الجديد من
دلوقتي لو حابة
- صمتت رحمة قليلاً قبل أن تجيب
- من دلوقتي صعب، لكن ممكن من بكرة
- جميل، دلوقتي تقدرى ترجعى لمكتبك لأخر مرة
- ابتسمت رحمة قبل أن تقول
- بعد إذنك يا دكتور

ليته ظل سرا

خرجت رحمة من المكتب، وما إن أغلقت الباب ورائها حتى خرج صوت مراد
الخافت قليلاً

- شكلها زعلت

رد مكرم في هدوء شديد

- وتزعل ليه، بالعكس هي فرحت جدًّا، في العلاقات العامة يعني شغلها

هيبقى أسهل، ده غير إن مرتبها هيزيد، يبقى إيه اللي يزعل في كده

- يعني أنت شايف إنها ما زعلتش

- طبعًا لا، المهم دلوقتي سيبك منها، أنت من بكرة هتستلم مكتبها

- طب والنهارة

- هتقعد معايا هنا

- هقعد أعمل إيه

- هتعمل الشغل اللي هديهولك

- هو أنا عارف حاجة

- ما أنا هعلمك

قاطع حديثهما صوت هاتف مكرم، إنها نعمة خاصة قد خصصها لنهلة.

- ألو

فاجأته النبذة التي تتحدث بها نهلة

- مكرم حبيبي

كان صوتها وكأنه يحمل كثيرًا من الفرح

- أيوا يا قلبي

- قلبك جامد

- حديد

سكنت نهلة قليلاً قبل ان تنطق بأسعد ما سمع مكرم في حياته

- أنا حامل.

انتفض مكرم من مكانه، وقف ودار حول المكتب دون أن ينطق بكلمة،

ساوره الشك للحظات، كيف...و التحاليل التي تقول أنني لا أنجب...لا بد أن هناك

خطأ ما، الواقع يتكلم الآن و الحقائق هي التي تحكم، فنهلة بالفعل...حامل

- أنتِ بتتكلمي جد، أنتِ روحي للدكتور و أكد لك.

- أيوا أكد لي وقالي إني حامل في تلت شهور

تنهد مكرم عدة تنهيدات متتالية

- الحمد لله، الحمد لله، نهلة....ما تتعيش نفسك خالص، ارتاحي على

الأخر

لا يستطيع الكلام من كثرة التنهيد من شدة الفرح، ومراد قد فهم الآن بعد

جملة مكرم الأخيرة

- أنا هجيلك دلوقتي على طول...سلام

أغلق مكرم الهاتف، وأخذ مفاتيحه من على مكتبه ونظر لمراد

- ياللا أنا لازم أمشى دلوقتي

ابتسم مراد ثم قال

- ألف مبروك يا مكرم

- الله يبارك فيك، هتيجي معايا ولا هتروح

- لا أجي معاك فين، أنا هروح ومن بكرة الصبح هكون على مكتب رحمة.

خرج الاثنان من الشركة معاً ركب كل منهما سيارته واتجه إلى منزله أخرج

مكرم هاتفه المحمول.

- عم محروس، كلم الجزار قوله يجهز أكبر عجلين عنده ويجيهم ويجي على

الفيلا.

أغلق مكرم الهاتف، وأكمل طريقه وكأنه لا يعرف القيادة، وكأنها أول مرة يقود فيها سيارة، مشاعر الفرح تملأه، لكن هناك شيء ما يشغله في وسط هذه الفرحة، ويجعل فرحته منقوصة

- أنا لازم أروح للأسامة تاني

قالها في نفسه وهو يكمل طريقه الذي يشعر أنه طويل جداً هذا اليوم.

ما أجمل أن تسيطر الفرحة على مكان ما، أن تكون روح المكان إيجابية بالقدر الذي يجعل أشد الناس يئسًا تبث فيه روح الأمل من جديد، ما أجمل ان تشاهد كل من حولك يبتسم، حتى الأشجار والزهور تبتسم، ولكن الأجمل أن تكون أنت صاحب هذه الفرحة، خاصة ولو كانت فرحة قد انتظرتها طويلاً.

يستحق مكرم كل هذه الفرحة فقد تمنى هذا لسنين، بات يحلم بتلك اللحظة، دعا الله في كل سجدة سجدها من أجل ذلك اليوم، كان يحس بالانكسار كلما رأى طفلاً، كلما علم أن أحد أصدقائه قد رزق بمولود جديد، اليوم فقط هو يشعر أنه ملك الدنيا بما عليها، يشعر أنه أسعد مخلوق على وجه الأرض

بات مكرم ليلته يصلى، ذبح الذبائح، تصدق بمبلغ كبير، أعطى لكل موظفي المجموعة زيادة على مرتباتهم فرحاً بتلك المناسبة، متمنياً أن يديم الله عليه هذه الفرحة إلى الأبد.

على الجانب الآخر كانت نهلة لا تملك عقلها من الفرح، فتحت صفحتها على موقع التواصل الاجتماعي (فيس بوك) وكتبت " إحساس الأمومة أجمل إحساس في

الدنيا، يا رب كمل فرحتنا وواعد كل مشتاق" بعد دقائق قليلة كانت الإعجابات قد انهالت على هذا المنشور كالسيل وأتت التعليقات كلها تحمل التهاني والمباركات. نزلت نهلة إلى السوق لشراء ملابس للأمير المنتظر، ذهبت إلى أحد المولات، ولم تترك فيه محلا إلا وقد دخلته بحثًا عن ما سيتحلى به ولي العهد، كانت لا تبقى ولا تذر في أي متجر تدخله فبداية من أغطية الرأس حتى الشرابات ولم تترك لونا ولا تصميمًا الا وقد اشترت منه، كانت بالنسبة لأصحاب محلات ملابس الأطفال في هذا اليوم بمثابة كنز.

وبينما كانت نهلة تجوب المحلات بحثًا عما سيرتديه الحفيد الثاني لعائلة ياسين، كان مكرم لازال يشغله شيء ما، إنه السر الذي لا يعلمه أحد على وجه الأرض سواه وأسماءه، والطبيب الذي أجرى التحليل، حمل مكرم هذا السر داخله لشهور، لم يبيع به لأي احد، لكنه يشعر الآن أنه يريد أن يتكلم، يريد أن يتحدث عن هذا السر، يريد أن يطلقه من صدره كأنما يطلق إحدى الرصاصات من سلاحه.

رفع سماعة هاتف مكتبه

- مراد تعالى لي لو سمحت عايزك

دخل مراد إلى المكتب وجلس أمام مكرم وبدأ الحديث.

- خير يا مكرم

- مراد أنا كان في حاجة حصلت من كام شهر كده، وكنت مخيبها عن كل

الناس، لكن أنا حاسس إنني عايز أفضفض وخصوصًا إن السر ده دلوقتي أصبح ملوش معنى

رد مراد باستغراب

- مش فاهم أي حاجة
- ما أنا هقولك، أنا من كام شهر كده روحت لأسامة عشان حكاية الخلفة
وكده، وطلب مني إني أعمل تحليل.

- وبعدين

- وبعدين لما روحت له بنتيجة التحليل قالي إني ما بخلفش وإن حالتي
صعبة جدًا ومستحيل أخلف
أطلق مراد ضحكة خفيفة:

- مكرم يا حبيبي أنت مراتك حامل

ضحك مكرم هو الآخر

- أه ما أنا عارف، ما أنا عشان كده قتلتك اللي أنا كاتمه جوايا بقالي شهر،
سبحان الله يا مراد ﴿لِلَّهِ مُلْكُ السَّمَوَاتِ وَالْأَرْضِ يَخْلُقُ مَا يَشَاءُ يَهَبُ لِمَن يَشَاءُ
إِنثًا وَيَهَبُ لِمَن يَشَاءُ الذُّكُورَ ﴿٤٩﴾ أَوْ يُزَوِّجُهُمْ ذُكْرَانًا وَإِنثًا وَيَجْعَلُ مَن يَشَاءُ
عَقِيمًا إِنَّهُ عَلِيمٌ قَدِيرٌ ﴿٥٠﴾﴾ الشورى: ٤٩ - ٥٠ تخيل العلم يقول إني ما بخلفش،
واني حالتي ميؤوس منها، لكن رحمة ربك وحكمته فوق كل شيء.

ساد الصمت للحظات قبل أن ينطق مراد

- الحمد لله، سيبك بقى من الموضوع ده، وخليك في الواقع، وافرح، أنت

تستاهل إنك تفرح

قالها مراد وهو يضع يده على يد مكرم

هز مكرم رأسه إيجابًا

- عندك حق، أنا بقالي كتير معرفتش طعم الفرحه

- افرح، وسيبها على الله

- ونعم بالله.

قال مكرم جملته الأخيرة، فقام مراد وخرج من المكتب متجهاً إلى مكتبه، لكنه يشعر بشيء غريب يشعر أن مكرم فرحته منقوصة، أن هناك شيئاً ما يشغل رأسه، إنه قلق، إنه مشتت، إنه مضطرب بعض الشيء، ترى في ماذا يفكر بعد انتهاء العمل خرج مكرم ومراد معاً من الشركة.

- حاول ما تتأخرش بكرة على اجتماع مجلس الإدارة

قالها مكرم:

- حاضر، إن شاء الله مش هتأخر، بقولك إيه ما تيجي نروح نتعشى في أي

حثة

- لا، أنا تعبان شوية النهارده خليها يوم تاني

رد مراد وقد بدا عليه الضيق

- خلاص نخليها يوم تاني

ركب كلا منهما سيارته متجهاً إلى منزله، لكن مكرم لم يكن يخطط للذهاب إلى المنزل، فقد سلك طريقه باتجاه عيادة صديقه أسامة، لم يكن يريد أن يعلم مراد أنه ذاهب إلى هناك، ولو كان يريد أن يعلم لكان بالأحرى طلب منه أن يرافقه إلى هناك، معنى زيارته لأسامة مرة أخرى أنه يشك في نهلة، حتى وإن كانت تلك الحقيقة، فلا ينبغي أن يعلمها أحد حتى أسامه نفسه.

صعد مكرم إلى الطابق المطلوب، دخل إلى العيادة، كان الوقت متأخراً بعض

الشيء، صالة الانتظار خالية إلا من شخصين، أحدهما ينظر إلى التلفاز بشغف كالسيدة العجوز التي كانت هنا في المرة الماضية، والآخر ينظر في هاتفه وبين كل حين

ليته ظل سرا

وأخر تسمع صوت رسائل وسائل التواصل الاجتماعي، يبدو أن هذا الشخص من مدمني مواقع التواصل الاجتماعي، ليته يذهب إلى الصين فهناك مدينة صينية بها مائتان وخمسون مركز لعلاج إدمان مواقع التواصل الاجتماعي، تمامًا كمراكز علاج إدمان المخدرات، جلس مكرم إلى جانب المدمن بعد أن أخبر السكرتيرة أنه يود أن يكون مسك الختام للعيادة اليوم، دخل الرجل شبيه العجوز أولًا، ثم تبعه صاحب الهاتف الملتصق باليد، حتى إذا خرج أخيرًا دخل مكرم إلى العيادة، فوجد أسامة يجلس على مكتبه وقد بدا عليه أن التعب تمكن منه بعد هذا اليوم الطويل، بدأ مكرم بالحديث:

- إيه يا أس مالك كده زي اللي خارج من مطش كورة.

- أه طبعًا يا عم ما أنتم رجال الأعمال بتصحوا براحتكم وتروحووا براحتكم، ولا عندكم مستشفى بتصحوا لها بدرى وتروح تكشف على حوالى ٥٠ عيان، وبعدين يدوب تروح ع العيادة عشان تلحق الفترة الصباحية، ويدوب على ما تلحق تخلص وتروح تأكل وتريح شوية يكون معاد الفترة المسائية، تنزل تجرى ع العيادة، عشان ما تأخرش العيانيين المستنيين، وبعد ده كله تقولي مطش كورة، ده ولا كاس العالم بحاله

أطلق مكرم ضحكة خفيفة ثم أردف

- ماشي يا عم، عرفنا إنكم أكثر ناس بتتعب في شغلها

- لا طبعًا، في ناس بتتعب أكثر بكتير

- طبعًا رجال الأعمال، اللي بيدرسوا في الجامعة

نظر أسامة إلى مكرم، قبل أن يطلق ضحكة ويقول ساخرا

- بالظبط.....بدليل إنك دلوقتي عندك استعداد تسهر للصبح وأنا مش قادر

أفتح عينيا.

أطلق مكرم ضحكة خفيفة من جديد

- المهم يا أس، أنا كنت جايلك النهارده عشان تقولي حالي بالتفصيل

تغير لون وجه أسامة فجأة، وصمت قليلاً قبل أن يبدأ كلامه متردداً.

- شوف يا مكرم، أنا المرة اللي فاتت مقدرتش أقولك كل حاجة، عشان أنت

طبعاً كنت في حالة نفسية مكنتش أقدر أقولك أي حاجة ده غير إن أنت أصلاً ما سمحتليش إني أتكلم

توتر مكرم قليلاً، بدأت دقات قلبه تتسارع، فسارع بسؤال أسامة

- ولو كنت سمحت لك كنت هتقول إيه؟

- كنت هقولك الصراحة طبعاً، ده من شرف مهنتي، وحتى يوم ما أحب

أجمل الحقائق، أكيد ما هجملهاش عليك

- ده علشان إحنا أصحاب

- دي حاجة، والحاجة الثانية إنك راجل متعلم ومعاك دكتوراه، غير كل ده

إنك مؤمن بالله

ساد الصمت للحظات، تنهد مكرم فيها بشيء من الضيق، نظر لأسامة نظرة

معبرة، فأكمل أسامة

- التحليل بتاعك يا مكرم كان خالي تمامًا من الحيوانات المنوية.

اتسعت عيننا مكرم واحمر وجهه بشدة بعد أن سمع جملة أسامة الأخيرة،

فقد درس الأحياء في المرحلة الثانوية، غير أنه اطلع على بعض الكتب الطبية،
ويدري ما معنى هذا الكلام.

- وده طبعاً معناه...

قاطعہ أسامة

- وده طبعًا معناه إنك مستحيل تخلف يا مكرم، أنا آسف إنني بقولك الحالة بالطريقة دي، بس دي حاجة بتاعت ربنا سبحانه وتعالى، ربنا خلقك و أراد أن أنت ما يكونش ليك ذرية، معنى التحليل بتاعك إن الخلايا المولدة عندك مش موجودة أصلاً، ودى حالة نادرة، لكن الطب ما يقدرش يعمل فيها حاجة ولا هيقدر. ازداد احمرار وجه مكرم أكثر، وزاد توتره أكثر، وظهرت رعشة خفيفة على يديه، ثم خرج صوته منخفا

- مش يمكن غلطة في التحليل

أغمض أسامة عينيه، ثم زفر زفرة حارة

- ممكن، بس ده احتمال ضعيف جدًا مش عايزك تحط أملك عليه.

هز مكرم رأسه في حيرة، لا يدرى ماذا يقول، لا يعرف ماذا يفعل، حمد الله أن أسامة لم يعلم بحمل نهلة بعد، كادت دموعه أن تنزل لكننه تماسك، ضغط على نفسه كثيرًا، فهو لا يحب أن يبكى أمام أحد، دقيقة ونصف تقريبًا مرت ولا يوجد صوت مسموع سوى صوت أنفاس مكرم التي تغادر صدره بصعوبة، قطع أسامة هذا الصوت

- لو عايز تعيد التحليل عشان تطمن، مفيش مشكلة

- أكيد.....أكيد هعيده

- مكرم دي حكمة ربنا ﴿يَهَبُ لِمَن يَشَاءُ إِنثًا وَنَهَبُ لِمَن يَشَاءُ الذَّكَورَ﴾ (٤١)

أَوْ يُزَوِّجُهُمْ ذُكْرَانًا وَإِنثًا وَيَجْعَلُ مَن يَشَاءُ عَقِيمًا إِنَّهُ عَلِيمٌ قَدِيرٌ ﴿٥٠﴾

هز مكرم رأسه، في إشارة منه إلى أنه يعرف هذا ويعلمه جيدًا، بل ويؤمن به، وقاله لمراد قبل قدومه إلى هذه العيادة (التي بدأ يكرهها) لكن الموقف الآن أصعب

من أن يدرك، وأكبر من أن يسيطر عليه
عاد الصمت مرة أخرى، قبل أن يقطعه مكرم هذه المرة، بدأ الحديث
والدموع واللون الأحمر يغزوان عينيه

- عارف يا أسامة، كان في مرة راجل عجوز ماشي في الغابة لوحده، الراجل
ده كان أعزل تمامًا من أي سلاح، وفعجأة طلع للراجل ده نمر، ولما النمر حاول يهجم
عليه والراجل العجوز تقريبا إستسلم للموت، النمر ده إضرب بالرصاص ومات،
عارف ده معناه إيه يا أسامة

لم يفهم أسامة ماذا يقصد مكرم لكنه أجاب
- معناه إن في حد تاني هو اللي ضرب النمر بالرصاص
- بالظبط

بدت الحيرة على وجه أسامة
- أيوا بس ده ايه علاقته بالموضوع أنا مش فاهم حاجة
ابتسم مكرم ابتسامة حزينة
- بس أنا فهمت
قال مكرم جملته الأخيرة قبل أن يتوجه إلى باب العيادة، توقف عند الباب
ثم إلتفت إلى أسامة

- ياريت محدش يعرف الموضوع ده غيرى أنا وأنت
- موضوع النمر
- لا، موضوع التحليل بتاعى، ولحد ما أجيبك التحليل الجديد، إنسي
التحليل القديم تمامًا

هز أسامة رأسه بالإيجاب، فخرج مكرم من العيادة، استقل سيارته متجهًا

والشمس لا يريد لهذه النبتة أن تخرج.

يجلس مكرم في غرفته وحيداً، يغلق باب الغرفة كما يغلق نوافذها، يسدل الستائر على النوافذ حتى لا يدع أي أمل لضوء الشمس أن يغازل تلك الغرفة. فهو لا يريد أن يرى شيئاً، ولا حتى الأشياء المحيطة به، حتى نهلة لا يريد أن يراها، بل لا يريد أن يسمع صوتها، عانى كثيراً من أجل كتم مشاعره، جاهد كثيراً من أجل أن يبدو طبيعياً في الأيام الماضية، من أجل ألا يشاهد أحد الانكسار في عينيه، من أجل ألا يظهر مهزوزاً ومهزوماً، يجلس مع نهلة على مائدة واحدة، وينام بجوارها، تحدثه هاتفياً ما لا يقل عن ثلاث مرات يومياً.

يبغي الانفجار في وجهها، يريد أن يسألها فتجيب، من أين جئت بهذا الطفل، أهولي، أم أن آخر ألقى به على، هل صنتِ حبي لك و حفظتيه، أم أنك ألقيت به في صندوق قمامة من نافذة سيارتك.

ثلاثة أيام مرت منذ أن زار عيادة أسامة، في اليوم التالي، شهدت ثلاث معامل مختلفة كتابة اسمه في ملفاتها، حدد الثلاث أطباء بالفعل، بالتأكيد أسامة واحد منهم، والدكتور الذي تقبع عيادته بجوار الجامعة هو الثاني، والثالثة ستكون ليلى، لا لا لا لن تكون ليلى، فلو كان التحليل الأول صحيحاً فستنهاري ليلى عند رؤيتها هذه النتيجة ولن تستطيع أن تتمالك نفسها ثم أن هذا خارج تخصصها، هل يكون خالد، لا لا خالد كالكتاب المفتوح أمام ليلى وسيحكى لها كل شيء، الطبيب الثالث ينبغي أن يكون طبيباً لا أعرفه، نعم.

قطع حبل أفكاره متتالية على باب الغرفة، هذه دقائق ليلى إنه يعرفها ولم تتغير منذ طفولتها، لن يجيب سيتركها تظن أنه سابع في بحر أحلامه، لكنها ما زالت تدق، حسنا لا بد أنها ستتكلم الآن، إنها ليلى وهو يحفظها تماماً.

ليته ظل سرا

- افتح يا مكرم أنا عارفة إنك صاحي.

لم يرد عليها، فعادت إلى الكلام مرة أخرى

- افتح بطل حركاتك دي.

لا يريد مكرم أن يرد، يريد أن يخبر ليلي دون أن يتكلم أن الوقت غير مناسب، يريد أن يخبر ليلي دون أن يتكلم أن وقت الكلام قد انتهى، يريد أن يشكو لليلى عما حل به في الثلاث أيام الماضية، يريد أن يخبر ليلي ماذا فعل أحفاد إبليس برأسه، يريد أن يخبر ليلي عن تلك الخائنة (مع إيقاف التنفيذ) حتى اللحظة نهلة، يريد أن يبكي بين أحضان ليلي، يريد أن يشعر بيدها تحنو على رأسه، يريد أن تقبل رأسه، لكنه الآن يعلم ما يجب عليه فعله، يعلم أن التماسك هو سلاحه الذي سيحميه، يعلم أن كل هذا قد يكون شكوكاً في رأس تدحرج بين الأفكار الشيطانية، يعلم أنه لو أفصح عما في قلبه بصدق ربما أحرق هذه الغرفة بل هذا القصر كله لشدة ما يكتم بداخله.

قلبي تشبع بالعريق دمائه وروى اللبنان بكل ما له من قوة.

ليته العريق بماء دمع ينطفئ..... وليأوي قلبي المرء قلباً قد هوى.

- مكرم لو ما فتحتش دلوقتي هزعل منك فعلاً ومش هجيلك تاني.

يعلم مكرم أن كل هذا لن يحدث، وأنها ستأتي حتى لو أخرجها من المنزل

بقوة الشرطة، كما يعلم تمام العلم أن الجملة الأخيرة لن تكون الأخيرة

- يعنى أنت مش هتفتح برضو

هنا ابتسم مكرم للمرة الأولى منذ ثلاثة أيام، لكنها ابتسامة زائفة، يعيش في

كواليسها كل ما حوت الأرض من ألم ومرارة.

- يا أخي افتح بقى

نهض مكرم بعد الجملة الأخيرة وقد قرر أن يفتح الباب.

دخلت ليلي إلى الغرفة، جلس مكرم وجلست بجواره، وضعت يديها على رأسه كأنما تدلل ولدها الصغير، ثم بدأت بالكلام.

- مش تقولي بقى إيه اللي مخليك في الحالة دي

نظر إليها مكرم في صمت دام لمدة دقيقة، ثم خفض رأسه وذلك رأسه بيديه

في توتر ملحوظ، ثم رفع رأسه بهدوء ناظرًا إلى ليلي مرة أخرى

- لو كان ينفع أقولك كنت قلت من بدرى وأنت عارفة كدة كويس.

- هي مشاكل في الشغل

- ومن امتى الشغل بيعمل فيا كده.

- مكرم أنا أول مرة في حياتي أشوفك كده، طول عمرى متعودة عليك قوى،

طول عمرى شايفاك حمايا وسندى وضهري، وبعد ما بابا مات الشعور ده اترسخ

جوايا أكثر، فلما تشوف حمايتك والشخص اللي أنت بتعتمد عليه منهار تقريبا،

فاهم ده معناه إيه.

هز مكرم رأسه إيجابًا.

- لكل جواد كبوة يا ليلي، مهما كان الإنسان قوي ففي لحظات ما يقدرش

يقاوم فيها، لازم ينهار حتى لو مؤقتا، بس القوى بس هو اللي بيرجع يقف و يواجه و

ينتصر على كبوته.

- وأنا عارفة إن أنت هتواجه، بس ما أخبش عليك أنا بدات أشك في كدة.

- ده بس عشان أول مرة تشوفيني كده

- بس دي مش أول كبوة تعدى عليك، ماما ماتت ومكنتش كده، بابا مات

ليته ظل سرا

وبرضو مكنتش كده، كنت دايمًا بتعرف تتغلب على الحزن وتعدى من أصعب الظروف، بس واضح إن الظروف المرة دي أقوى من موت أبوك وأمك!!
 - شوفي يا ليلي، موت أبوك وأمك ده حدث طبيعي وكده كده كان هيجصل طالما ربنا كاتب لى أموت بعدهم، والموت عموماً أمر الله، ومتوقع يجصل لأي حد في أي وقت، أنت عارفة بقى الأصعب منه ايه.
 ردت ليلي في اندهاش من طريقة مكرم
 - ايه

- إن يجصل حاجة عمرك ما كنت تتخيلي إنها تحصل لك في حياتك، دي بتبقى ضربة صعبة أوي، ممكن تقتل.

ساد الصمت قليلاً، ليلي لا تدرى ماذا تقول، فوضع مكرم الحالي يضايقها كثيراً، كما يضايقها أيضاً أنه لا يريد أن يخبرها ما به، هي تعلم أن الحمل ثقيل، وأن مكرم اختار أن يحمله وحده، ربما نهلة تحمل معه، لكنها لا يبدو عليها، وحينما سألتها بدا عليها أنها لا تعلم فعلاً، لكن ربما مراد يعلم، ولكن إذا كان مكرم لا يريد أن يخبرني فهل سيخبر مراد!!!!

قامت من مكانها واتجهت نحو باب الغرفة
 - لما تبقى تتخلص من مشكلتك وحابب تحكى فأنا عمرى ما إتأخرت عنك، ولو مش حابب تحكى خالص فأنا هقدر ده رغم إن دي حاجة عمرى ما كنت أتوقع إنها تحصل في حياتي زي ما أنت قلت
 رد مكرم في صرامة:

- أكيد عمرى ما هحكي لك
 أصابت الجملة الأخيرة ليلي بالصدمة، وربما بعض الغضب، ما نوع هذا

السر الذي يخفيه مكرم، حتى الأسرار العسكرية التي تشكل مصير بلدان يعلمها أكثر من شخص، لم تنطق بعدها بكلمة وأغلقت الباب وانصرفت ليعود مكرم إلى عالم أفكاره من جديد، إلى الظلام والهدوء والصمت.

تمضى الأيام وتمر الليالي ليلة وراء ليلة، وكأنها سكين تتلوها سكين، تمر على رقبة واحدة، لا تجد من يدافع عنها، بل بالأحرى لا تريد أن تجد من يدافع عنها، الدفاع هذه المرة قد يجلب الهجوم بعد ذلك.

هكذا فكر مكرم في الأمر، فلو أخبر مراد بالأمر وبعد ذلك ثبتت خيانة نهلة فسيكون هذا بعد ذلك بمثابة السيف الذي يهدده به في حالة حدوث خلاف بينهما، ولو أخبر ليلى و ثبتت براءة نهلة، فسيكون مكرم وحده في مرمى سهام نقد ليلى دون أي درع أو وقاية.

الآن الأمور أصعب، أن تتحمل عبئا ثقيلا وحدك أمر ليس باليسير، لكن فيما بعد ستكون الأمور أسير، المهم في هذه المرحلة هو الصبر، الصبر فقط، إنه كأس تكسوه المرارة، لكن لا بد من شرابه.

تحصل مكرم على التحاليل بالفعل منذ عدة أيام، لكنها كما هي مودعة في خزانة مكتبه، إنه ينتظر شيء ما قبل الذهاب إلى الأطباء، وربما هذا الشيء.....نعم إنه يحدث الآن.

أخرج مكرم هاتفه من جيبه بعد أن سمع صوت دقاته، وقد أظهرت شاشته الاسم الذي ينتظره (سامح شبكة الموبايل).

- ألو

جاء الصوت على الجانب الآخر

- مكرم باشا

ليته ظل سرا

- أهلا يا أستاذ سامح....أتمنى يكون اللي أنا طلبته إتنفذ
- تنفذ يا باشا. وزى ما حضرتك أمرت بالظبط...وطبعًا محدش هياخد خبر
- لا أنا متأكد من كده...لأن لو حد خد خبر أنت اللي هتتأذي..أولا الشركة هترفدك لعدم أمانتك وإفشائك لأسرار العملاء...ثانيا أنا هقتلك لو ده حصل.
- صمت سامح قليلاً بعد أن سمع الجملة الأخيرة
- لا يا باشا ربنا ما يجيب بيننا زعل
- ده لمصلحتك أنت بس، المهم دلوقتي تيجي لي بكرة الصبح الشركة في نفس معاد المرة اللي فاتت.
- تمام يا باشا
- سلام
- أغلق مكرم هاتفه وبدأ يكمل ما كان قد بدأه من عمل، وبعد قليل دخل مراد عليه المكتب
- مكرم في واحد برة عايز يقابلك
- واحد مين ده
- واحد معروفش، تخين وقصير وبشنب
- ابتسم مكرم ابتسامة خفيفة يبدو أن هذا هو الرجل الذي حدثته عنه
- رحمة ويبدو أنه حان موعد اللقاء بينهما
- ما تقلقش هو هيدخل لوحده دلو...
- صباح الخير يا مكرم باشا
- قاطع كلام مكرم صوت غير صوت مراد، فرفع نظره نحو باب المكتب، وكان صاحب الصوت رجل يبدو في الخمسينيات من عمره، قصير القامة نسبياً، بدين

بعض الشيء، ويرتدى نظارة شمسية، وله شارب كبير.
نظر مكرم إلى مراد وابتسم و أشار بيده نحو الرجل في إشارة بمعنى (مش
قلتلك)

هز مكرم رأسه لمراد، خرج على إثرها مراد مغادرا المكتب، قبل أن يجلس
الرجل ويبدأ في الكلام
- إزيك يا مكرم
صمت مكرم لبرهة تمهد تهيدة خفيفة ثم بدأ الحديث في هدوء وثقة
معتادين.

- مبدئيا في حاجات عايزين نتفق عليها
أولا إسمى دكتور مكرم
ثانيا لو دخلت عليّ المكتب بالطريقة دي تاني بصراحة مش ضامن ردة فعلى
ابتسم الرجل ابتسامة تحمل بين طياتها سخرية
- هعتبر نفسى ما سمعتش حاجة وده لمصلحتك
كان ما قاله الرجل مستفزا لدرجة كبيرة، لكن جاء رد مكرم أيضًا بثقة
وهدوء.

- أوك، جرب تدخل عليّ المرة الجاية بالطريقة دي وأنا أوعدك إنك بعد كده
هتسمع كويس.

لم يتحرك الرجل من مكانه ولم تبدو عليه أي علامات غضب، ولم ينظر إلى
مكرم منذ بداية الحديث، في المقابل كان مكرم ينظر إليه في حدة، ساد الصمت
للحظات قبل أن يردف مكرم
- خير

ليته ظل سرا

- كل خير، أنا جاي لك النهارده لأن كان في صفقة بيننا وبين المرحوم ولازم

تخلص

- اممم... أنت مين بقى

- اسمي مش هيفرق، المهم الصفقة تتم

يحاول مكرم أن يسيطر على نفسه أمام تلك الكتلة من الثلج، وهو يقول في

نفسه أن هذا الرجل هو النموذج الحقيقي للشخص متبلد الاحساس

- يعنى أنت جاي لي بعد ٦ شهور من وفاة والدى، وعازب تقنعني إن كان في

بينكم شغل وإني المفروض أكمله.

- بالظبط كده

- أه، بس أنا تممت كل الصفقات اللي كان المرحوم متعاقد عليها قبل وفاته

والحقيقة الصفقة بتاعتك ما ظهرتش ولو كنت لقيتها، أكيد كنت هتواصل معاك،

فأعذرني...مفيش بيننا شغل

- لا في

لا إنه ليس كتلة جليد إنه القطب الشمالي كاملاً، ما هذا الكائن.

رد مكرم بعصبية هذه المرة

- لا مفيش، وقول أنت عازب إيه واخلص لأن جملة كمان من جملك دي

وهخلهم يرموك برة

- هدى نفسك شوية يا مكرم

- دكتور مكرم

- طب يا دكتور مكرم أنا عازب الصفقة تتم

- قلتلك ما لكش صفقات عندي أنا راجعت كل الملفات وتممت كل

الصفقات و التعاقبات

- بس الصفقة اللي بيننا وبين المرحوم مش مجرد عقود.
- زفر مكرم في ضيق
- أمال إيه
- دي عهود
- واللي يخالف العهود
- يموت
- وصل مكرم إلى قمة عصبتيه ولو أخرجها في هذا الرجل الآن لربما تناثرت
أشلاءه في هذه الغرفة.
- طيب أنا مستغنى عن عمري، واطلع برة
- ما تقولش كلام أنت مش قده
- لا أنا قده، وأكبر منه ومن اللي بقوله ليه
- ابتسم الرجل مرة أخرى، ونظر إلى مكرم لأول مرة منذ بداية الحديث.
- بس مش تعرف ايه هي الصفقة
- مش عايز أعرف
- بس أنا لازم أقولك
- وأنا مش مضطر أسمعك
- لا مضطر، لأن ده عهد
- بص، أنت راجل كبير وأنا في سن ولادك، و ما أحبش إني أهينك فما
تضطرنيش لكده
- أنا هقولك إيه هي الصفقة و همشى على طول

- وأنا مش هنفذها
 - أنا هقولها، ولو ما نفذتش....يبقى أنت اللي اختارت
 - تقول وتمشى من غير ما تنطق ولا كلمة
 قام الرجل من مقعده، أقفل معطفه في هدوء، تقدم ناحية الباب، التفت
 إلى مكرم
 - في شحنة هيروين جاية على مركب كمان ٥ شهور، الشحنة دي هتيجي
 ضمن البضاعة اللي أنت طلبت تستوردها من إسبانيا بنفسك، الشحنة هتوصل
 مصر وأنت هتستلمها وهدخلها مخازنك، وهتسلمها لنا في المعاد اللي إحنا نحدده
 صمت الرجل فجأة
 كانت عينا مكرم متجمدة تمامًا من شدة الصدمة، قلبه يخفق لا يدري
 بسرعة أم ببطء، لسانه يعجز عن الكلام كأن أثقل حجر من الهرم الأكبر قد وضع
 فوقه
 - هديك أسبوعين تفكر، وأنا هتواصل معاك بطريقتي، بس صدقني القرار
 معتش في إيدك.
 قال الرجل هذا الكلام وهم بالانصراف، وفجأة انطلق لسان مكرم صارخا
 في الرجل.
 - أنت كذاب، أبويا عمره ما يعمل كده، لو شفتك هنا تاني همسحك من
 على وش الأرض.
 ضحك الرجل ضحكة طويلة ثم قال
 - أبوك عمره ما يعمل كده، أمال الثروة دي كلها من إيه، من الاستيراد و
 التصدير، أنا قلت اللي عندي يا ... يا دكتور، مات الكلام، معادنا بعد أسبوعين.

- لو جيت الشركة تاني أو حاولت تتصل بيا، هبلغ عنك مفهوم، وتاني مرة لما تبعت عربية تراقبني ما تبقاش تبعت عربية مسروقة
- أكيد عمرى ما هغلط غلطة زي دي.
قالها الرجل ثم انصرف، وترك مكرم وحيدا في مكتبه، الذي شعر فجأة أنه ضاق عليه كضيق القبر، وأظلم بشدة رغم عدد اللمبات غير القليل، وارتفعت حرارته كساونا رغم مكيف الهواء الذي يعمل منذ الصباح.
لا يمكن، لا يمكن، هذا الرجل يكذب، إنه مجرد (تاجر صنف) خبيث جاء ليتلاعب بى لتنفيذ رغباته

والدى لم يأكل قرشًا حرامًا في حياته، والدى كان رجلا شريفا، والدى ذمته أنقى من المياح بعد تنقيتها في سبعين مرحلة، والدى كان غنيا، لكنه كان نزيها والدى.....هل اتفق معهم فعلا على هذه الصفقة؟
فاضل حركة ع الإنجاز

هكذا قال مراد وهو يجلس أمام مكرم في أحد المقاهي الفخمة في وسط البلد، ويتوسطهما رقعة الشطرنج، القطع السوداء مرصوصة أمام مراد، أما القطع البيضاء فلا يوجد منها الكثير أمام مكرم الذي يبدو أن هذه اللعبة لا تعنيه تمامًا، وأن الأمر قد بلغ متناه معه، وحتى محاولات مراد الجسيمة للتخفيف عنه أو حتى معرفة حقيقة ذلك الحمل الثقيل الذي يصبر مكرم أن يحمله وحده بائث بالفشل.
- كش ملك يا مكرم.

رد مكرم بوجه جامد عشب فيه الكرب والضيق منذ أيام.

- مبروك

- يا اااااااااا...أخيراً كسبتك مرة في حياتي
 - ياللا من نفسك
 - بس أنت عارف إيه اللي خلاني أكسب
 لم يرد مكرم، أوريما لم يسمع
 - إن الوزير بتاعك خرج بدرى وأنت من غير الوزير ما تقدرش تغلب حتى
 واحد لسه بيتعلم
 انتبه مكرم فجأة
 - ودي حاجة وحشة مش كده
 اندهش مراد من ردة فعله
 - والله مش عارف، أنت دايمًا كنت بتحافظ عليه و بتسخر كل قطعك
 لحمايته، النهارده أنت غفلت عنه، فضاع منك بدرى وأنا كسبت
 ابتسم مكرم ابتسامه ساخرة
 - عرفت نقطة ضعفي ولعبت عليها، دي أسوأ حاجة ممكن تحصل، إن
 خصمك يبقى عارف نقطة ضعفك
 - يا سلام ما أنت عارف نقطة ضعفي ودايمًا كنت بتلعب عليها، ورغم إني
 عارف نقطة ضعفك من زمان إلا إني برضو عمري ما كسبتك، وده لأنك دايمًا كنت
 بتبقى مركز وكنت بتحمي نقطة قوتك بكل الطرق وأي قطعة ما بتخسرهاش غير
 بطلوع الروح.
 صمت مراد قليلاً ثم أردف:
 - بس النهارده مش عارف مالك كل تحركاتك من غير تركيز، وبصراحة بقي
 حياتك كلها بقيت من غير تركيز، أنت بقي لك فترة متغير وعصي ومش طبيعي ولما

الراجل ده جالك، بقيت عصبي أكثر وتركيزك قل أكثر حتى في الشغل، وكل ما أجي أسألك مالك، مش عايز تقولي، ورغم إني محترم خصوصياتك، بس أنا مش قادر أشوفك في الحالة دي وأسكت

ساد الصمت بعد آخر ما نطق به مراد، صمت مكرم وهو يفكر، هو فعلا طيلة حياته لم يكتف سرًا أمام مراد، فهناك أشياء في حياته لا يعلمها إلا الله ثم مراد، أما هذه المرة فلا يدرى ماذا يخبره، أو كيف يخبره، هل يخبره أن زوجته التي أحبها و حارب كثيرًا من أجلها ومن أجل أن يجمعهما منزل واحد خانتته وهي الآن تحمل بين أضلعها طفلا لا يعرف مكرم من هو والده، أو يقول له أن أسامة أخبره لما رأى تحليله أنه لا يحمل بين أظهره مكانا لذرية وأن الله قد نزع منه هذا الفضل، أم يخبره أن قدوته طيلة حياته، ومن كان يتحاكى بزاهته وشرفه وقصة كفاحه وكيف كان عصاميا وبنى نفسه بنفسه، وكان يفخر أن اسمه تلى اسمه في بطاقته الشخصية، وقد جاء أحدهم ليخبره أنه اتفق على توريد شحنة كبيرة من المخدرات تدخل في الحاويات القادمة للشركة من أوروبا.

ماذا أخبرك يا مراد، وماذا أقول لك، على الرغم أن التحاليل الثلاثة الأخيرة لا زالت في خزانة المكتب، ولم يثبت ما بها قطعيا حتى الآن إلا أن الاحتمال الأكبر هو صحتها ولذلك أخشى أن أخرجها للنور حتى لا تصيب حياتي بالظلام، وعلى الرغم إني أثق بوالدي إلا أن الشيطان تمكن منى، وجعلني أتمعن في الثروة الضخمة التي تركها أبى هل كانت فعلا نتاج جهد وعرق أم أنها سرقة واختلاس وتزوير وتجارة مشبوهة.

أين الحقيقة هل أنا ابن رجل عصامي وعلى موعد مع مولودي الأول، أم أن والدي هو رأس الأفعى وعلى موعد مع مخلفات جريمة زنا...هل ورثت مالا حلالاً

ليته ظل سرا

سيرته بعد موتى من لا يستحقه، أم أن ولدى القادم إلى الدنيا جاء ليحمل عار جده الذي مات قبل أن يراه.

لا يعلم أجوبة تلك الأسئلة إلا الله، وربما يعرف مكرم إجابة أحدهما غداً عندما يقابل موظف شركة المحمول، وإذا ثبتت ظنونه ستخرج الثلاث تحاليل من تلك الخزنة الحديدية لتكشف ما تبقى من فصول اللعبة التي كان مكرم هو الوحيد بداخلها وكانت مهلة أحد أبطالها مع طرف آخر سيكشف القناع عن وجهه عاجلاً كان أم أجلاً، سوف يرفع الستار اليوم، ويخرج إلى المسرح من جلسوا خلف الكواليس لسنوات.

- مراد كفاية كده أنا عايز أروح

لم ينطق مراد بكلمة فالموقف كان لا يستدعي الكلام وإنما يستدعي أن ينفذ

ما يطلبه مكرم بهدوء

- ماشي...ياللا بيننا

ركب مراد إلى جانب مكرم، وانطلقا في اتجاه منزل مراد.

- في واحد هيجي لي بكرة الصبح أول ما ييجي تدخله على طول، وما تخليش

حد يدخل علينا مهما حصل.

- الراجل القصير ده

رد مكرم بعصبية:

- لا...الراجل ده مش هيجي تاني ولو جه تاني أطرده على طول

- ليه هو عمل إيه

ازداد كلام مكرم حدة

- راجل حيوان

ليته ظل سرا

- عمل إيه يعنى؟
- أهو قال كلمتين تخاريف كده ومشى.
- لم يصبر مراد أكثر على معرفة ما قاله الرجل فمن الواضح أن مكرم لا يريد الحديث حول هذا الأمر
- خلاص ماشي
- بعد ذلك صمت الاثنان طيلة الطريق إلى أن وصلا إلى منزل مراد، نزل مراد من السيارة، فأطرد مكرم في الكلام.
- ما تنساش اللي قلتك عليه
- هز مراد رأسه مجيبًا دون أن ينطق، وهو يقول في رأسه.
- لو مكنتش مكرم ياسين، وأنا عارف إن اللي أنت شايله جواك أكبر من أنه يتحكي، ولولا إني مش عايز أكون عبئ عليك، ما كنتش عتبت الشركة تاني.
- انطلق مكرم بالسيارة حتى وصل إلى منزله، وما إن دخل من باب الفيلا حتى أخرج هاتفه المحمول، وقام بطلب ليلي.
- ألو
- أيوا يا ليلي، كويس إني لقيتك صاحبة
- خير يا مكرم في إيه
- أنت مش كنتي عايزة تعرفي مالى
- أكيد
- خلاص هستناك بكرة الساعة ٨، بس تيجي لوحداك، وطبعًا خالد هيبقى في العيادة في الوقت ده، وأحمد ما يجيش معاك، عشان اللي هقوله لك ما ينفعش حد يسمعه غيرى أنا وأنت

- للدرجة دي
- وأكثر من كده
- طب ونهلة
- لا هي بكرة عندها فرح واحدة صاحبتهما فبرضو مش هتبقى موجودة، حتى الشغالين أنا إديتهم إجازة.
- صمتت ليلي وهي تفكر فيما يقوله مكرم، فلو كان ما سيخبرها به معلومات تتعلق بالأمن القومي لما احاطها بهذه السرية.
- خلاص... ماشي، هكون عندك بكرة في المعاد
- هستناك
- خلاص أوكي
- أغلق مكرم هاتفه، ثم نزل من السيارة وصعد باتجاه غرفته.
- ترى ماذا سيقول لليلي غدا، عن أي موضوع سيتحدث معها، هل سيكشف لها كلاهما، أم سيكشف لها ما يخص نهلة فقط حتى لا يحطم صورة أبوها أمامها، أم سيكشف لها ما يخص والدها فقط لأن هذا ما يعينها وما هي جزء منه بالفعل، ولماذا اختار هذا التوقيت بالذات، وماذا ستفيده ليلي عندما يخبرها غير أنها ستصدم وربما تنهار.
- أصعب شيء في الحياة هو الانتظار، ولا سيما انتظار ما يتوقع أن يكون سيئا، يقول المثل الشعبي (وقوع البلى ولا انتظاره) ورغم بساطة هذا المثل إلا أنه يحمل بين طياته معاني كثيرة، فعند انتظارك خبر ليس ساراً، أو تتوقع حدوث حادث أليم، يجول الشيطان في رأسك ويفعل بك الأفاعيل، حتى يتمكن منك، وينسج الخطوط السوداء على جدار خيالك، ويمثل أمامك عدة سيناريوهات، في

أغلبها أسوأ بكثير مما قد يحدث، وفي معظم الأحيان لا تحدث بالكيفية التي تتصورها، لذلك يكون أهون على النفس أن ترى المصيبة ما دام حدوثها أصبح واقعا بنسبة كبيرة، ولكن ماذا لو اتجه الإنسان إلى ربه فسأله كشف الغم، وسأله عبور المحنة، أليس أفضل من الانهيار والعيول على شيء لو أراد الله عدم حدوثه لما استطاع مخلوق على وجه الأرض أن يمنعه .

يحتسى مكرم كوب القهوة الصباحى المعتاد، و يتصفح مواقع الأخبار على الإنترنت، و فجأة تشتت ذهنه، و غاص في بحر خيالاته، ماذا لو كان هذا خبرًا يومًا ما (القبض على رجل الأعمال مكرم ياسين متلبسًا بتهريب كمية كبيرة من الهيروين) وبالتأكيد سيتبعه بعد عدة أشهر (محكمة الجنايات تحيل أوراق مكرم ياسين إلى المفتي في قضية الاتجار الشهرية)، لا لا هذا هين على الأقل سأموت و أرتاح من هذا العناء في غضون أشهر، أما المصيبة الحقيقية (مفاجأة.... ابن مكرم ياسين ليس ابنًا شرعياً)

ياله من عنوان يتمنى المرء موته قبل أن يراه.

قطع تفكير مكرم صوت دقات على الباب

- أدخل

- صباح الخير يا دكتور مكرم

- صباح النور.... أهلا يا أستاذ سامح

دخل الرجل موظف شركة المحمول وجلس أمام مكرم

- تشرب إيه يا أستاذ سامح

- لا لا خيرك سابق يا باشا

رفع مكرم الهاتف وضغط على أحد أزراره

- بتشرها سادة ولا مضبوط
- إذا كان كده يبقى...زيادة
- قهوة زيادة عندي في المكتب لو سمحت
- أغلق مكرم سماعه الهاتف ثم بدأ بالحديث
- ها.. يا أستاذ سامح، قولي المختصر المفيد
- أخرج الرجل من حقيبته أوراقا وأعطاهها لمكرم
- ده يا باشا كل المكالمات بتاعت الأسبوع اللي فات
- تمام
- طبعًا الرقم مسجل باسم واحدة اسمها نهلة على حسان
- نظر مكرم إلى الرجل نظرة حادة، ثم تكلم بأسلوب غلفه العنف
- أنا ما طلبتتش منك تعرف الرقم باسم مين، والاسم اللي أنت قلتة دلوقتي
- تنساه...أحسن لك، ولو قلتة تاني حتى لو بينك وبين نفسك همحك...أنت فاهم
- ارتبك الرجل و حاول أن يهدأ من حدة توتر الموقف
- أنا يا باشا حاولت أجمع كل المعلومات الل..
- وانا ما طلبتتش منك أي حاجة غير لسته المكالمات....مضبوط
- مضبوط يا باشا
- يبقى تنفذ اللي أقول لك عليه وبس
- عاد مكرم إلى هدونه مجددًا، أسند ظهره إلى كرسيه وبدأ بتصفح الأوراق
- ما شاء الله كاتب قدام كل رقم اسمه.
- طبعًا يا باشا...الأهم من الشغل تطبيط الشغل
- تمام يا أستاذ سامح...بس في رقم مش مكتوب قدامه اسم

- أه يا باشا، الخط ده مش متسجل

- اممممم...مش متسجل

أخرج مكرم هاتفه من جيبه، ودخل إلى تطبيق (true caller) وأدخل الرقم غير المسجل، فوجد أن صاحب الرقم (أم على حجامه) هنا تذكر مكرم تلك المرأة التي تذهب إليها نهلة كل فترة لعمل الحجامه، وفيما عدا هذا الرقم كانت كل الأرقام في الورق الذي أحضره موظف شركة المحمول مسجلة، ولم يكن أحدها غير عادى، فكل الذين في الورق أشخاص من الطبيعي أن تتواصل نهلة معهم كمكرم نفسه، ووالدها ووالدتها، وأخواتها، وأصدقائها، يبدو أن هذه الطريقة لن تنفع، وربما نهلة بريئة، وكل هذه ظنون سيتم تحطيمها على صخرة الخطأ الطبي في التحليل الأول الذي قرأه أسامة

- ماشى يا أستاذ سامح، اتفضل ده المبلغ اللي أنت طلبته وزيادة شوية، وطبعًا زي ما اتفقت معاك أول مرة، أنا عايز التقرير ده لمدة شهر، يعنى عايز منك تقرير للتلت أسابيع الجاية

- أجيها لحضرتك برضو هنا

- لا، إحنا مش هنتقابل تاني، التقارير الجاية هتبعتهالي ع الواتس

- اللي تشوفه يا دكتور

- شرفت يا أستاذ سامح

خرج الرجل من مكتب مكرم، وأغلق الباب.

جلس مكرم بعد خروج الرجل يقلب الأفكار في رأسه، إذا كانت نتيجة التحليل الأول صحيحة، ونهلة لا يوجد في سجل مكالماتها ما يثير الشك، فكيف تتواصل مع ذلك الشخص، وكيف تقابله، أم أن كل هذه شكوك لا أكثر، الليلة

ليته ظل سرا

سيظهر كل شيء، سوف تتكشف كل الأوراق، سوف يفتح الستار ليكشف عن جريمة خيانة كبرى، أو جريمة شك ارتكبتها مكرم في حق نهلة، كل الحكاية مسألة وقت.

عاد مكرم إلى المنزل في السابعة مساءً، فوجد نهلة في أبيي صورها استعدادًا للذهاب لحفل زفاف صديقتها، فهي لا تحب إضاعة مثل تلك الفرص للخروج لتعيش أجواء الفرح، ولترى صديقاتها القدامى.

ولكن ربما لا يوجد فرح، ولكنها ستخرج لتقابل من أودع فيها تلك النطفة الخبيثة، وربما يكون هناك فرح وسيتقابلون هناك، وربما كل هذه ظنون في حق امرأة شريفة، كل الاحتمالات واردة، ولا يستطيع مكرم أن يبعث من يراقبها لأنها لو كانت تخونه فعلاً فسيكون الذي يراقبها قد علم بالأمر وربما يكون هذا سيفاً على عنق مكرم حتى آخر حياته، ولو أنها بريئة فسيكون هذا خطأ جسيم، ولا يستطيع أن يراقبها بنفسه بسبب مواعده مع ليلى، ولا يمكن تأجيل الموعد أكثر من ذلك

- أنا خارجة يا حبيبي

قالتها نهلة وهي تحمل حقيبتها وتهم بالانصراف

- مع السلامة يا حبيبتي ماتت خريش وخلي بالك من نفسك

خرجت نهلة وقام مكرم ليغير ملابسه ويستعد للقاء المنتظر بينه وبين ليلى

وعندما دقت الساعة الثامنة تمامًا كانت ليلى قد حضرت

دخلت إلى غرفة مكتب مكرم وجلست أمامه وبدأت الحديث

- في إيه يا مكرم

نظر لها مكرم نظرة تحمل بعض العتاب

- مفيش إزيك حتى

- مكرم ماتلعبش بأعصابي، انا من إمبارح مش عارفة أنام بسبب اللي أنت

قلته

- وأنا بقى لى شهر مش عارف أنام بسبب اللي أنا هقوله لك دلوقتي

لم تحتمل ليلى أكثر من ذلك فتكلمت وقد علا صوتها

- طب قول ياللا أنا على أعصابي

- من كام يوم كده جالي واحد على المكتب، والحقيقة الراجل ده مش أول

مرة يبجي لى، جالي قبلها بس أنا ما كنتش موجود، وبعد كده بعث ورايا عربية

مسروقة تراقبني، ده غير إنه كان موجود يوم العزا

- ومين الراجل ده

- الراجل ده واحد مندوب لناس بيقولوا إن بابا الله يرحمه كان بيشتغل

معاهم، وإن هو اتفق معاهم على صفقة وطالبين منى إني أكملها

- صفقة إيه؟

صمت مكرم قليلاً، فعاودت ليلى السؤال بلهجة أكثر حدة

- صفقة إيه؟

- هيروين

تجمدت ملامح وجه ليلى، لم تستطع الكلام، شعرت وكأن الدنيا تدور بها

حاول مكرم تدارك الموقف

- أنا طبعاً ما صدقتوش وطردهته، وقلت لازم أبلغك

صمتت ليلى وأخذت تعلقو انفاسها، ثم قالت

- وتبلغنى ليه؟

- عشان أنت شريكتي في كل حاجة

- في كل حاجة حرام
 نظر مكرم إلى ليلي نظرة حادة، وصرخ
 - مفيش أي دليل إنها حرام، ومش كل واحد هيبقى يقول لي أي كلام فارغ
 هصدقه، أنا كنت عارف إنك مش هتقدري الموقف، عشان كده ترددت كتير قبل
 ما أقولك

حاول مكرم أن يعود إلى هدوءه مجددًا، ثم أردف
 - الكلام ده مفيش اللي يثبتته
 - ومفيش اللي ينفيه
 - يعنى أنت بتشكى في أبوك
 - مش عارفة، أنا كل حاجة دلوقتي تلخبطت في دماغي، أبوك مكنش طبيعي
 في آخر أيامه

قاطعها مكرم:

- وحادث موته كان مدبر
 صدمت ليلي مرة أخرى، وجهت كلامها إلى مكرم بلهجة حادة:
 - وفي إيه تاني مخبيه عليّ
 - لا كده مفيش حاجة تانية
 - ولسه بتفكرده حقيقي ولا لا
 - طبعًا
 - والناس دي ممكن تكذب ليه
 - أسباب كتير، ممكن يكون تربص بيا أنا شخصيا، وممكن يكون أي سبب

المهم دلوقتي أنا عايزك تركزي كويس و تفتكري بابا ما جابلکش سيرة عن

الموضوع ده

- أكيد لا، أكيد لا يا مكرم

أخذت ليلي تفكر قليلاً

- بابا لا يمكن يعمل كده يا مكرم، رغم إن الواقع بيقول غير كده

، لكن في حاجة جوايا مش عايزة تخليني أصدق.

عموما في حاجة ممكن نتأكد منها

- ايه هي؟

.....

بعد مغادرة ليلي بدأ مكرم يستعد لليلته الماراثونية بعد أن ترك التحاليل الثلاثة في السيارة، اتصل مسبقاً وهو في مكتبه بعيادة ثلاث أطباء، وفي كل عيادة كان سكرتير الطبيب يرفض الحجز من خلال الهاتف وما إن يعلم بأن المتحدث هو مكرم ياسين يوافق على الفور، وهكذا تم حجز العيادات الثلاثة، ومن ضمنهم بالتأكيد عيادة أسامة.

غير مكرم ملابسه بعد أن فرغ من استحمامه، وهم بالانطلاق نحو العيادة

الأولى.

دخل مكرم إلى العيادة وإلى حجرة الكشف وهنا قام الطبيب الأول مرحبا به

- أهلاً دكتور مكرم، أنا سعيد جداً برؤية حضرتك النهاردة.

- ربنا يخليك يا دكتور

- خير يا دكتور مكرم

- كل خير إن شاء الله، الحقيقة يا دكتور أنا متجوز بقالي ١٠ سنين ولحد

ليته ظل سرا

دلوقتي ربنا مكتبليش الخلفة، فأنا عملت تحليل وكنت جاي لحضرتك عشان نبدأ

رحلة العلاج مع بعض إن شاء الله

- إن شاء الله

- إتفضل التحليل

أعطى مكرم التحليل للطبيب وجلس يراقب ردة فعله.

وحدث ما كان يتوقعه مكرم، تغيرت ملامح الطبيب كما حدث لأسامة في

المرة الأولى، فحاول الطبيب أن يتدارك الموقف ، وحاول مكرم أن يبدو كمن لا

يعرف شيئاً

- خير يا دكتور

- مكرم يا ابني أنت راجل مؤمن، ودى حاجة بتاعت ربنا

- يعنى إيه يا دكتور

- التحليل اللي قدامى بيقول إن الحيوانات المنوية عندك معدومة، وأنت

عارف طبغاً ده معناه ايه

- معناه إني مستحيل أخلف مش كده

- علمياً...مستحيل تخلف، وأنا شخصياً بقولك ما تحاولش تتعالج لأن

الحالة دي مالهاش علاج

هز مكرم رأسه في رضا تام بما قال الطبيب، حاول أن يبدو وكأنها أول مرة

يسمع هذا الكلام

- تمام، أنا بشكر حضرتك جدًّا يا دكتور، وأتمنى إن الموضوع ده يفضل سر

بيننا

- طبغاً يا ابني، دي أسرار مرضى ومستحيل حد يعرفها، و خصوصاً لو كان

ليته ظل سرا

المريض شخصية عامة زيك

- أشكرك يا دكتور

قام مكرم من مقعده وسلم على الطبيب، ثم انطلق مسرعًا خارج العيادة، واستقل سيارته في اتجاه ثاني محطات هذه الليلة .

وصل مكرم إلى العيادة الثانية، ودخل إلى غرفة الكشف، فرحب به الطبيب

الثاني أيضًا

- نورت العيادة يا دكتور مكرم

- ده نورك يا دكتور

- خير

أعاد مكرم ما قاله للطبيب الأول حرفيا، وكأنه شريط مسجل

- كل خير إن شاء الله، الحقيقة يا دكتور أنا متجوز بقالي ١٠ سنين ولحد

دلوقتي ربنا مكتبلش الخلفة، فأنا عملت تحليل وكنت جاي لحضرتك عشان نبدأ رحلة العلاج مع بعض إن شاء الله

- إن شاء الله، بس سامحني يا دكتور مكرم أنت استنيت على نفسك فترة

طويلة شوية، لكن مش مشكلة، المهم إنك أدركت الموقف في النهاية، وأنت ما شاء الله لسه شاب، وفي أمل كبير في العلاج إن شاء الله

(أنت بتقول كده بس عشان لسه ما شفتش التحليل)

هكذا قال مكرم في رأسه وكأنه سلم بالأمر تمامًا، فلو كانت نتيجة هذا

التحليل مختلفة، لكان الشك في هذا الطبيب وفي المعمل الذي أجرى التحليل.

- تفضل التحليل

أعطى مكرم التحليل للطبيب الثاني، وجلس يراقب انفعالاته.

ليته ظل سرا

إن أصعب شيء في هذه الليلة العصيبة هو أن تلعب دور الممثل، وتحاول
تهنئة انفعالاتك ومشاعرك عند كل طبيب تدخل إلى عيادته.

لم يظهر على هذا الطبيب أي تغيير أثناء قراءته للتحليل، إما أن ثباته
الإنفعالي كبير، أو أن التحليل أخطأ، نعم أخطأ، ولو كان هذا التحليل يشير إلى غير
ما أشار إليه سابقه فهو الخطأ بلا شك

- خيرا يا دكتور

- كل خير إن شاء الله... ما أخيش عليك هي الحالة صعبة شوية، ونسبة

الشفاء فيها ضئيلة، لكن إحنا هنعمل اللي علينا

(نصاب...نصاب وعازي تخليني أفضل رايح جاي على عيادتك على الفاضي

وأنت طبعًا مش خسران حاجة أهى فلوس ومفيش مانع إنك تستخدمني واسطة في
يوم من الأيام)

هكذا قال مكرم في نفسه قبل أن يوجه سؤاله إلى الطبيب

- ممكن اعرف التشخيص بالضبط؟

- هو في نقص في الحيوانات المنوية، لكن يمكن تعويضه بالعلاج إن شاء

الله، أنا هكتب لك على شوية أدوية، وبعض التمارين تعملها، وإن شاء الله نشوف
أولادك قريب

(بتحلل القرشين اللي هتلفهم منى)

قالها في نفسه مجددًا

أعطاه الطبيب الروشنة، قبل أن يردف

- أشوفك بعد شهر من دلوقتي يا دكتور مكرم، بس أهم شيء إنك تلتزم

بالعلاج والتمارين

ابتسم مكرم ابتسامة مفتعلة

- إن شاء الله يا دكتور

خرج مكرم بعد جملمته الأخيرة، متجها إلى سيارته، وبالطبع هو ينوى عدم الرجوع إلى هذا (الوكر) مرة ثانية، بعد أن انطلق بالسيارة قليلاً قام بتقطيع الروشنة، وإلقائها في القمامة، وانطلق في اتجاه المحطة الأخيرة... إلى أسامة.

وقف مكرم بسيارته أمام عيادة أسامة، وقف وانتظر قليلاً، لا يدري ماذا أصابه، ربما كانت لحظات لا بد منها، جلس لمدة لم تطول حوالى خمس دقائق وكأنه غاب عن الوعي، وكأنه انتقل من الدنيا إلى عالم آخر، وكأن الكرة الأرضية بل ربما المجموعة الشمسية لا تسعه .

نزل من سيارته أخيراً، دخل إلى العيادة فوجدها خالية على غير العادة، لكنه سرعان ما أدرك أن الوقت قد صار متأخراً، وأن الساعة تقترب من الواحدة صباحاً .

- دكتور أسامة موجود

بدأ مكرم حديثه إلى السكرتيرة

- أيوا يا دكتور هو عنده مريض جوة وهيخرج حالا

هز مكرم رأسه إيجاباً، ثم ذهب وجلس في انتظار المريض، الذي سرعان ما

خرج، ودخل مكرم إلى حجرة الكشف

- مكرم..... واحشنى يا راجل

- أنت اكتر يا أس

- إيه الأخبار.... عملت التحليل

- لا..... عملت اتنين

ليته ظل سرا

هنا قرر مكرم أن يطلعه على التحليل الذي أطلع عليه الطبيب (النصاب) حتى يقطع الشك باليقين في أمر هذا الطبيب، فربما يكون المعمل قد أخطأ، أو ربما أخطأ الطبيب الأول في قراءة التحليل الأول، رغم أنه احتمال بعيد، لكن الأمر خطير ولا يحتمل لعبة الإحتمال

- تمام!!

أعطى مكرم التحاليل لأسامة

تفحصها اسامة واحدا يتلوه الآخر

هز رأسه يميناً ويساراً باستنكار

نزع نظارته ووضعها أمامه على المكتب، ثم قال بنبرة خافتة

- للأسف يا مكرم التحليلين بيقولوا نفس الكلام، وهو نفس الكلام اللي في

التحليل بتاع المرة اللي فاتت

لم يتكلم مكرم، لم يعد مجال للشك، التحليل الأول كان صحيحاً، والطبيب

الأول كان مصيباً، والطبيب الثاني محتالاً، وهو لن يكون له ذرية، وعائلة ياسين لن

يحمل اسمها حفيداً، والأهم من كل هذا أن نهلة شربت من بئر الخيانة، وتجرعت

من نبع الزنا حتى حملت بين أضلعها نتاج تلك الجريمة

- أسامة

قالها مكرم وسكت، تكلمت عيناه قبل أن تنفج شفثاه، كانت نظرتة لأسامة

نظرة رجاء أن يكون هذا سرا بينهما، نظرة استعطاف أن يحس بما يشعر به، نظرة

ضعف أنه لن يصبح أبا مهما مر الزمن

- ده سر بيني وبينك ليوم القيامة.

هز أسامة رأسه مجيباً

قام مكرم من مكانه ولم يتكلم بكلمة واحدة، اتجه نحو باب العيادة، وخرج
وركب سيارته

انتهى وقت المزاح، انتهت لعبة الاحتمالات، كشفت جميع أوراق اللعب من
جانب نهلة، لكن أوراق مكرم ما زالت لم تكشف بعد

- عايز أكلكمم شوية عن ضبط النفس، الكلام اللي أنا هقوله ده ملوش
أسس علمية، ومش هجيبه في امتحان، تقدرؤا تعتبروه مجرد دردشة بيني وبينكم
انتبه الطلاب بعد جملة مكرم الأخيرة فهم دائماً ما يحبون تلك الفقرة في
محاضرات أستاذهم مكرم، لكنه و للمرة الأولى يخبرهم أنها ليست جزءا من
المحاضرة، ربما يريدهم هذا اليوم أن ينتهوا أكثر.

كانت محاضراته دائماً تحتوى على جزء في نهايتها أشبه بالنقاش، وكأنه
برنامج على شاشة إحدى الفضائيات، يفتح لهم صدره، ويكلمهم وكأنه يجلس
معهم على أحد المقاهي، لكنه وفي آخر خمسة أسابيع تقريبا لم يكن يقدم هذه
الفقرة في محاضراته، بل أنه لم تكن محاضراته تحوى بعض الخروج عن النص
للكلام في الرياضة أو الاقتصاد او السياسة أو غيرها، فكان يأتي ويلقى المحاضرة
كالمسجل، ثم يغادر كأن القطار ينتظره، لكنه هذا اليوم عاد إلى سابق عهده،
واستجلب انتباه طلابه

- أحياناً الإنسان يببجى قدام مواقف معينة وما بيقدرش يضبط نفسه فيها،
رغم إن الموقف ممكن يكون تافه جداً، يعنى مثلا لو أنت راكب الأتوبيس الصبح
وراح واحد جاي و دايس على رجلك، وأنت بقى من النوع الجنتل مان اللي بيلمع
جزمته يوميا، تلاقي نفسك فجأة تحولت إلى شعلة غضب، مش مهم الغضب ده
هتوجهه فين، لكن جوالك في غضب كبير، ممكن تخرجه، وممكن تكتمه، لكنك من

جواك بالبلدي كده (شايط).

هل ضبط النفس بيختلف من إنسان للثاني؟..... أكيد

في ناس عندها قوة ضبط نفس رهيبه جداً، وفي ناس عندها عصبية مفرطة جداً، وفي ناس لا تأمن ردة فعلها في مواقف معينة، رغم إنه ممكن يكون وديع في عاداته، لكنه قدام موقف معين ممكن يتحول لإنسان ثاني، وده ممكن يكون لارتباط الموقف ده عنده بمبدأ أو عقيدة أو ذكرى مؤلمة في حياته.

أنا دلوقتي هسألکم سؤال وعايز أعرف إجابته منكم، وعايز أعرف تصرفکم فيه، بس ياريت محدش يكرر إجابته قالها زميله، وياريت محدش يتكلم إلا لما أسمح له بالكلام إتفقنا

تتصرف إزاي لو اتسرق منك مبلغ معين وبعد كده عرفت مين اللي سرقه وهنا حالتين لو هو اعترف لك بنفسه أو أنت عرفت لوحدك؟
تفاعل الطلبة بشدة مع السؤال وبدأوا بطرح وجهات نظرهم والتي ليست بالضرورة تعبر عن تصرفهم الحقيقي إن وضعوا في هذا الموقف وجاءت بعض الإجابات كالتالي:

- لو هو اعترف لي بنفسه ممكن أسامحه، لكن لو أنا اللي عرفت أكيد مش هسامحه، وغالباً هضربه.

- لو هو اعترف بنفسه مش هأخذ أي إجراء ضده لكن هطالبه بالمبلغ، أما بقى لو أنا اللي عرفت فأكيد هقدم فيه بلاغ.

- والله مش هتفرق هو اعترف ولا أنا اللي عرفت لكن أهم حاجة وقبل ما أخذ أي إجراء أكون متأكد يقينا إن هو ده الحرامي، وساعتها مش هسامحه، وفي الحاليتين هبلغ عنه

- الحقيقة يا دكتور أنا اللي هيفرق معايا احتياجي للمبلغ ده، يعنى بمعنى
أصح توقيت وظروف السرقة، وساعتها هقرر هسامحه ولا لا مهما كانت الطريقة
اللي أنا عرفت بيها

إجابات مختلفة، ووجهات نظر أكثر اختلافاً، ربما نطق بعض الطلاب بغير ما
فكر فيه من أجل أن يشارك ولا يكرر ما قاله أحد زملاؤه، لكن في النهاية هناك أكثر
من فكر، وأكثر من وجهة نظر.

بدأ مكرم كلامه مرة أخرى

- الحقيقة وجهات نظر كلها تحترم، بس ده تفكيركم و أنتم هنا في المدرج
ومش محطوطين تحت أي ضغط وما بتسيطرش عليكم أي مشاعر، وغالباً
إجاباتكم دي ناتجة عن مبادئ و أفكار مترسخة جوة كل واحد فيكم، يعنى كل
واحد إتكلّم حسب شخصيته، بس الحالة دي حالة سهلة، لكن دلوقتي أنا هسأل
سؤال أصعب شوية والمرة دي هتكون الطريقة مختلفة شوية في الإجابة، بمعنى إني
هعطي الإذن لواحد يجاوب وبعد كده هنشوف رأي زمايله فيه إيه...مستعدين
تعمل إيه لو قولت سر من أسرارك لشخص واحد و الشخص ده خرج السر
ده؟

هنا رفع كثير من الطلاب أيديهم، أشار مكرم إلى أحدهم بالكلام

- ببساطة يا دكتور هبعد عنه و مش هعرفه تاني

رد مكرم

- يعنى مش هتحاول تنتقم منه

- لا

- رأيكم إيه في كلام زميلكم، اللي موافق على كلامه يرفع ايده

ليته ظل سرا

رفعت الأغلبية الساحقة من المدرج يدها، لم يتبقى سوى بضع طلاب قليلين لم يرفعوا أيديهم .

- دلوقتي أنا هختار من الناس اللي رافعة أيديها اتنين يقولوا لي بيأيدوا الرأي ده ليه، اللي لا بس أخضر في الصف قبل الأخير، وأنت

أشار مكرم بيده إلى أحد الطلاب في الصف الذي أمامه مباشرة

- أنا بأيده لأن رأيه هو الواقع إحنا مش في غابة عشان أفكر إنني أنتقم، أو بمعنى أصح الانتقام هنا غير مجدى لأنى سرى خرج ما أقدرش أمنعه، فالصح هنا إنني أتعلم من غلطتي وأبعد عن الشخص ده

قال الطالب رأيه ثم جلس، فأشار مكرم إلى الطالب الذي أمامه ليتكلم

- أنا مش هضيف كثير عن اللي زميلي قاله، أنا متفق معاه تمامًا، وكمان شايف إن انتقامي ممكن يقلل منى كشخص، فبلاش أدخل في معركة تقلل من قيمتي

جلس الطالب الثانى، وهنا عاد مكرم إلى الحديث

- الناس اللي ما رفعتش أيديها في الرأي الأول ممكن واحد منهم يقوم يقول لى رأيه هو إيه، إرفعوا أيديكم وأنا هختار شخص رفعوا أيديهم فإختار مكرم أحدهم

- أنا مش بس هبعد عنه، لا أنا لازم أنتقم منه و أدفعه تمن غلطته غالى،

عشان أحافظ على كرامتى

- ويا ترى هتنتقم إزاي

- ما أقدرش أقول إزاي بالضبط، بس ممكن أطلع سره زى ما هو عمل،

عشان يبقى العين بالعين والسن بالسن.

- وهتبقى راضى عن نفسك لو عملت كده
 - الإنسان تحت تأثير الانتقام يا دكتور بيعمل حاجات كتير هو مش راضى
 عن نفسه فيها، وممكن يعمل حاجات عمره ما إتخيل إنه ممكن يعملها، واللي يفرق
 معايا هو الشخص اللي أنا هنتقم منه يستحق كده ولا لا، مش أنا ممكن أعمل
 كده ولا لا

- اللي موافق على اللي زميلكم قاله يرفع ايده
 رفع جميع الطلاب المتبقين أيديهم إلا طالب واحد
 نظر مكرم إليه ووجه إليه السؤال
 - وأنت مش موافق على الرأيين
 قام الطالب من مكانه، وبدأ في الحديث
 - أنا ليا وجهة نظر تانية
 - نحب نعرفها
 - أنا مش هيفرق معايا الشخص، إنما هيفرق معايا الفعل، الفعل ده لو أنا
 عملته قبل كده، أو لو عندي إحساس إني ممكن أعمله بعد كده، مش هفكر أنتقم
 من اللي عمله، واحتمال أسامحه كمان، إنما في بعض المواقف اللي لا يمكن أعملها
 في حياتي، وما أحبش إنها تتعمل فيا أكيد مش هسكت عليها
 - وهتعلم ايه

- دي بقى يا دكتور اللي مش هقدر أجابك عليها، لأن دي محتاجة وقت
 وتخطيط، عشان أقدر أحدد هعمل إيه بالضبط
 أوأما مكرم برأسه إعجابا بالرأي الأخير، ثم قال
 - عموما دي وجهة نظرك زى ما كل واحد من زميلك ليه وجهة نظر، لكل

ليته ظل سرا

مشكلة أكثر من حل، وأظن ده بقى واضح بعد اللي حصل دلوقتي، في حل شائع وسهل و مفيدش منه أي خطر وأمان ومالوش أي عواقب وده بيعمله العامة و الغالبية العظمى، وفي حل متهور و عصبي و ممكن يكون له عواقب وخيمة وده بيعمله فئة معينة متهورة، إنما في حل عبقرى دايمًا هو الحل الوحيد غالبًا اللي بتقدر تطلع منه بأقل خسارة وبأكبر انتصار ممكن وده بيعمله واحد في المية من الناس.

أشوفكوا المحاضرة الجاية

خرج مكرم من المدرج، وركب سيارته، وبعد أن بدأ بالتحرك أخرج هاتفه من جيبه، قام بطلب أحد الأرقام وبعد ثوان جاء الرد على الجانب الآخر.

- دكتور مكرم

- إزيك يا باش مهندس

- بخير والله، الحمد لله أخبار حضرتك إيه

- الحمد لله، عملت إيه في الموضوع اللي كلمتك فيه

- كل خير يا دكتور، أنا قدرت أتوصل لطالب هنا في الكلية يقدر يعمل

السيستم اللي حضرتك طلبته، وطبعًا مش هيقول لأي حد

- يعنى الطالب ده ثقة يا باش مهندس

- من ناحية الشغل فهو فاهم الموضوع كويس وعمله قبل كده، أما بقى من

ناحية الأمانة فبصراحة ما أعرفش

- حتى لو مش أمين فده مش هيفيده، هو هياخد مبلغ كويس، أنا كان ممكن

أجيب أكبر شركة في مصر بس أنا عايز الموضوع في السر

- ما تقلقش يا دكتور

- تمام أنا وصلت الكلية دلوقتي وعايز أقابل الولد ده
- إتفضل حضرتك شرفني في المكتب و أنا هبعث أجيبه لك
- اتفقنا
- أغلق مكرم الهاتف، وأوقف سيارته جانب كلية الهندسة، ثم تقدم باتجاه مكتب المهندس صديقه
- دخل مكرم إلى مكتبه و سلم عليه، ثم جلس أمامه ليبدأ المهندس الحديث
- أنا بعثت للولد وهو جاي دلوقتي
- تمام يا هندسة، وأهو بالمره ندردش شوية على ما بييجي
- جلس مكرم يتبادل أطراف الحديث مع المهندس صديقه إلى حين وصول الضيف المنتظر، كان مكرم يعرف هذا المهندس منذ أن كان طالبًا، فقد تعرف عليه في إحدى الندوات التي كانت تنظمها الجامعة، وأصبحا صديقين من يومها، وإلى الآن يلتقيان كل فترة من الزمن يحكى كل منهما للآخر آخر ما جد في حياته، لكن هذه المرة لم تكن المقابلة ودية بل كانت لغرض قد طلبه مكرم من صديقه.
- انتظر الطرفان في حديثهما لعشر دقائق حتى جاء الضيف المنتظر
- دخل الطالب فسلم عليهما، وجلس أمام مكرم فبدأ المهندس بالحديث
- طبعًا يا عمرو أنت تعرف دكتور مكرم ياسين
- طبعًا يا باش مهندس و هل يخفى القمر.
- دكتور مكرم عمرو من أحسن الطلبة في الكلية عندنا، وإن شاء الله هيقدر
- ينفذ لك اللي أنت عايزه
- أتمنى، هو لوقدر ينفذ اللي أنا عايزه، أنا كمان هحقق له اللي هو عايزه
- إن شاء الله يا دكتور

ليته ظل سرا

- بص يا عمرو أنا عايز أعمل نظام مراقبة في البيت كله، بس بشرط ان الكاميرات ما تبقاش باينة، وان الصوت يبقى طالع، بحيث إني أقدر أشوف و أسمع اللي بيحصل في البيت وأنا برة

بدأ الطالب بالحديث

- سهلة إن شاء الله يا دكتور، بس حته إن الكاميرات ما تبقاش باينة دي أنا

ما أضمنهاش لأن دي بتتوقف على المكان اللي هتتركب فيه الكاميرا

- أنا ممكن أعمل أي حاجة قصاد إن الكاميرات دي ما تبقاش ظاهرة،

وبالنسبة للإمكانات المادية ما تحملش هم

صمت الطالب قليلاً قبل أن يردف:

- اتفقنا

أخرج مكرم من جيبه ظرفاً وناولته للطالب

- الظرف ده فيه كل الفلوس اللي هتحتاجها عشان تجيب الكاميرات

ومستلزماتها، وأنا هكلمك أبلغك باليوم اللي هتيجي تركب فيه الكاميرات

- تمام يا دكتور

- رقم تليفونك لو سمحت

سجل مكرم رقم الطالب على هاتفه

- خلاص زي ما قلتك أنا هكلمك أبلغك بالمعاد اللي هتيجي تركب فيه، وأنا

هبعت لك عربية تجيبك وترجعك، دلوقتي أستأذن أنا بقى

قام مكرم من مكانه، سلم على الطالب والمهندس وانصرف .

اتجه مكرم بسيارته إلى مقر الشركة ليبدأ عمله كرئيس مجلس إدارة

مجموعة ياسين، فالיום هناك اجتماع لمجلس الإدارة لمناقشة الأمور المتعلقة

بالمناقصة التي استدخلها الشركة خلال الأيام القادمة، ولا بد أن يكون مكرم في كامل تركيزه من أجل هذا الاجتماع، لذا ذهب إلى مكتبه أولاً وشرب القهوة قبل الدخول إلى غرفة الاجتماعات

دخل مكرم إلى غرفة الاجتماعات، كان الجميع حاضراً، مراد، ورحمة، وياسر، كل أعضاء المجلس

بدأ مكرم بالكلام

- صباح الخير يا جماعة

- صباح النور يا دكتور مكرم

- طبعاً الحاجة الأساسية في اجتماع النهارده هي المناقصة بتاعت وزارة

الزراعة و اللي أكيد الشركة بتاعتنا لازم تاخدها، وأي حد عنده أي موضوع ثاني يبقى بعد ما نخلص الموضوع ده.

جميل، دلوقتي كل واحد فينا قدامه نسخة من العرض الفني و المالي

والمهندس مدحت هيدشرح لنا التفاصيل

قام المهندس مدحت وبدأ بشرح تفاصيل العرض الذي ستتقدم به

مجموعة ياسين في مناقصة وزارة الزراعة

انتبه الجميع لكلام المهندس مدحت الذي بدا واثقا من الظفر بتلك

المناقصة

بعد أن أنهى كلامه وجه مكرم كلامه إلى الحاضرين

- أعتقد إن المناقصة دي هتبقى من نصيبنا إن شاء الله، في أي حد عنده

ملاحظات

قام أحدهم وطرح سؤالاً وتلاه سؤال آخر من شخص آخر، وبدأت المناقشة

الفعلية لعرض المناقصة والذي استمر لمدة تقرب من الساعتين انتهت المناقشة تمامًا، وفي نهاية الاجتماع بدا الجميع مقتنعًا، ومتأكدًا من حصول المجموعة على تلك المناقصة

أنهي مكرم الاجتماع وتوجه إلى مكتبه، فتبعه مراد

- اقعد يا مراد في حاجة عايز أقول لك عليها

- خيرا يا مكرم

- أنت عازمني على يوم نقضيه في إسكندرية نغير جو

اندهش مراد من كلام مكرم، فرد بلمهجة ساخرة

- عازمك إزاي يعنى؟

- عازمني على حسابي

- اللي هو إزاي؟

- يا أخى أنا عايز أطلع يوم إسكندرية، ونهله حامل زى ما أنت فاهم وممكن

لو أنا عرضت عليها ما ترضاش تيجي بحجة الحمل، وأنا بصراحة عايز أغير جو

- طب وإشمعنى إسكندرية، ما تروح شرم ولا السخنة ولا أي حته، ما أنت

عندك شاليهات في كل حته في مصر

- لا شرم بعيد، ولو روحت هناك حتى لو بالطيارة هاقعد ٣ أيام على الأقل

إنما أنا عايز يوم واحد عشان ما ينفعش أبعد عن الشركة كثير، ووجودك معانا

أنت ومراتك هيخلي نهله توافق.....فهمت

لم يبدو مراد مقتنعًا تمامًا، ولكنه ليس لديه أي سبب للرفض

- خلاص موافق، بس هنروح امتي

- يوم التلات الجاي، عايزك بقى تحجز لنا فندق كويس.

ليته ظل سرا

- أيوا بس أنت اللي هتدفع طبعًا
- يا عم أنا اللي هدفع أمال أنت بس قدام نهلة ومراتك
- أنا اللي عازمك طبعًا
- بالظبط كده، أنا هكلم نهلة دلوقتي عشان أبلغها
- قام مكرم بالاتصال بنهلة
- أيوا يا نهلة بقولك
- أيوا يا حبيبي
- تيجي نطلع إسكندرية التلات الجاي
- ليه بس يا حبيبي، أنا لسه في أول الحمل و مش عايزة أسافر
- يا نهلة هويوم واحد، وبعدين ما أنا كمان مش عايز أطلع بس مراد هو اللي
- عازمنا و أنا بصراحة ما أقدرش أرفض لمراد طلب
- ممكن تعتذر عادى
- لا لا، تعالى نروح غير جو، وبعدين المسافة مش بعيدة، و مش هنطول ده
- هو يوم واحد
- صمتت نهلة قليلاً قبل أن تردف
- خلاص يا حبيبي، أنا هطلع عشان خاطر ك بس
- ماتحرمش منك يا حياتي، ياللا باي
- أغلق مكرم هاتفه ووجه كلامه إلى مراد
- خلاص يا سيدى نهلة وافقت على عزومتك
- نظر مراد إلى مكرم ورفع حاجبيه
- لا يا راجل

ليته ظل سرا

ضحك مكرم ضحكة طويلة، ثم أردف

- مش ده اللي أنت كنت عايزه

- لا ده اللي أنت كنت عايزه، وبعد إذنك بقى عشان ورايا شغل

- ماشي يا عم الشغل

خرج مراد من المكتب، وما إن اطمئن مكرم أنه خرج، حتى أمسك هاتفه مرة

أخرى، ولكنه هذه المرة لم يتصل بنهلة، وإنما بشخص آخر

- باش مهندس عمرو، أخبارك ايه

بص يا سيدى التركيب إن شاء الله هيبكون يوم التلات الجاي، وأنا مش

هكون موجود، عم محروس هيبقى معاك و هيعملك كل اللي أنت عايزه ، بس زى

ما فهمتك يا باش مهندس أهم حاجة عندى إن الكاميرات ما تباشش

يبقى اتفقنا

البحر و الشمس و الرمال الصفراء، وجمال الجو في محافظة الإسكندرية

جعل مكرم يعود إلى هدوء أعصابه المعهود قبل الأحداث العصبية التي حلت به في

الفترة الماضية، ورغم أن هذه الرحلة كانت لغرض آخر غير التنزه، إلا أن مكرم

أدرك بالفعل أنه كان في حاجة إليها.

سرح مكرم بخياله بعيداً، غاص في عالم افكاره، أبحر في جميع أركان عقله،

أخذ يتذكر ما حدث، ويتخيل ما يمكن حدوثه، ابتسم للسيناريوهات الكوميديّة

التي راودته، وكاد أن يبكي لتلك الأخرى التي يتمنى موته قبل حدوثها، ثم سأل نفسه

سؤالاً لماذا كل هذا العناء أكل هذا من أجل الثروة، ربما لو كان فقيراً لما جاءه ذلك

الرجل، ولكن الفقر لم يكن ليمنع خيانة زوجته له، إنها أقدار الله التي لا يستطيع

أحد منعها، وربما لو كان فقيراً لما حد..

ليته ظل سرا

قاطع أفكاره صوت هاتفه:

- إيه الرقم الغريب ده.

قالها مكرم في نفسه قبل أن يجيب

- ألو

- إزيك يا دكتور

إنه صوت ذلك الرجل فرغم أنهما لم يتقابلا سوى مرة واحدة إلا أن مكرم يعلمه جيداً، فنغمة ذلك الصوت هي التي عزفت لحن حزن و حيرة مكرم في الأيام الأخيرة

- مين معايا

- ما تقولش إنك مش عارفيني

- لو كنت أعرفك مكنتش سألتك مين معايا

- فكرت كويس يا دكتور

- أه... أنت المعتوه اللي جالى الشركة

- الله يسامحك، عموماً لسه الأسبوعين ما إنتهوش أنا مش مكلمك عشان

كده

- أمال عشان ايه

- أنا بس كنت عايز أسألك إيه أخبار الجو في اسكندرية النهارده

هذا هو الغرض إذا، فهم مكرم ما يرمى إليه الرجل، إنه يخبره أنه يراقبه

جيداً، ويعلم جميع تحركاته، ويذكره أيضاً انه لم يتبقى سوى ٣ أيام على إنتهاء مهلة التفكير

- زفت

- نعم

- زفت على دماغك، خدت الاجابة اللي أنت عايزها...سلام

- قالها مكرم و أغلق الهاتف في وجه الرجل، وقف قليلاً حتى يهدأ ، ثم قام بالاتصال بمراد

- هو أنا جاي إسكندرية عشان أفضل مستني لوحدي

- أنا والله قاعد مستني الستات يخرجوا من المية

- طيب انجزوا عشان أنا زهقت من القعدة

- ما أنت اللي مشيت هو حد قالك تمشى

- ماشي...أنا طلبت سمك عشان الغدا، وأنتوا حرين بقى، يا تلحقوا يا ما

تلحقوش

- في لمح البصر هكون عندك

- ماشي.....سلام

- تبقى مكاملة لا بد من إجرائها قبل أن يعودوا

- إيه يا عم محروس، إيه الأخبار عندك

- تمام يا دكتور مكرم، الراجل وصل من نص ساعة، وشغال أهو

- طيب يا عم محروس خلى بالك منه، واعمل له كل اللي هو عايزه، وما

تخلمهوش يغيب عن عينك لحظة

- من غير ما تقول يا دكتور، اللي أنت وصيتي عليه بيتنفذ بالحرف

- تمام يا عم محروس...ياللا سلام

يجلس خالد أمام شاشة التلفاز وأمامه طبق صغير يحوى بعض الفاكهة،

وبجانبه ليلى لكنها ليست بجانبه، هو يشعر بما حل بها، ويعرف متى تكون ليلى في

حالة سيئة، ومتى تكون في أفضل حالتها، هكذا ينبغي ان يكون الزوج لزوجته،
والمرأة لزوجها، ينبغي أن يفهم كلاهما الآخر دون أن يتكلم، يحس به قبل أن ينطق،
يكون الملجأ له إذا تداعت كل الدنيا على إيذائه.

- لو تقولي بس مالك

انتهت ليلى لكلام خالد

- مفيش يا حبيبي، أنا بس مرهقة شوية

- خلاص تعالى نساferيومين في أي حنة

- لا مش للدرجة دي، أنا بس عايزة أرتاح من ضغط الشغل شوية وهبقى

كويسة.

صمت خالد رغم عدم إقتناعه بكلام ليلى، وتمنى لو كان يستطيع أن يقرأ

أفكار الآخرين ليعلم ماذا حل برفيقة دربه.

لم تكن ليلى لتخبر خالد عن الذي بها، ولا تريد لأحد في العالم أن يعرف،

ربما عرفت الآن ما كان يعاينيه مكرم، الآن فقط صارت تعذره لأنه لم يخبرها منذ

البداية.

بعد وقت ليس بالطويل دق جرس الباب، قام خالد من مكانه ليرى من

بالباب.

فتح خالد وإذا به يرى رجلا لم يره من قبل، شاب يبدو أنه في وسط

العشرينيات من عمره، طوله متوسط، وملابسه منمقة، ورائحة عطر مميزة تفوح

من ثيابه.

- أنا آسف على الازعاج يا دكتور خالد

لم يتعجب خالد من هذا لأنه ببساطة قام بقراءة اللافتة المعلقة على يسار

الباب

- إفضل
- أنا زكريا الساكن الجديد اللي في الشقة اللي قدام حضرتك
- أهلا وسهلا يا أستاذ زكريا
- بعد إذن حضرتك كنت محتاج زعافة من اللي هي بتنظف السقف لأن العنكبوت مالي الشقة، والمحلات بعيدة عن هنا زي ما أنت عارف، فلو تتكرم حضرتك لو عندك زعافة أكون شاكرليك جداً
- أه موجود، ثانية واحدة أجيها لك
- دخل خالد إلى الشقة لإحضار ما طلبه الرجل، فسألته ليلي
- مين يا خالد
- ده واحد ساكن جديد في الشقة اللي قصادنا وكان عايز الزعافة بتاعت

السقف

- لم تعلق ليلي، أحضر خالد الزعافة وأعطاها للرجل
- متشكر جداً يا دكتور خالد، أنا مخلص وأجيها ل حضرتك على طول
- لا شكر على واجب يا أستاذ زكريا
- بعد إذن حضرتك
- إفضل



جهاز عم محروس مائدة الإفطار انتظاراً لانتهاء مكرم من ارتداء ملبسه، جلست نهلة على الطاولة، وبعد قليل جاء مكرم، بالتأكيد احتاج أن يتأخر قليلاً

ليته ظل سرا

يطمئن على أماكن وضع الكاميرات لكنه في النهاية أتى إلى مائدة الافطار.

- صباح الخير يا حبيبي

- صباح النور يا حياتي

- أنت إمبراح روح في النوم على طول

- أه، كنت تعبان جداً

- ودلوقتي

- الحمد لله نمت كويس

بدأ مكرم بتناول إفطاره ولكنه فوجأ بهاتف، إنه من مراد لا بد أن لديه

أخبار جديدة حول مناقصة وزارة الزراعة

- أيوا يا مراد

- مكرم العرض الفني بتاعنا اتقبل

- طيب تمام

- وفتح مظاريف العرض المالي امتي

- كمان ٤ أيام

- ممتاز

- إن شاء الله ترسي علينا

- بإذن الله، أنا مسافة السكة هكون عندك في الشركة...سلام

أنهي مكرم افطاره، وهم بالخروج، فأوقفته نهلة

- حبيبي أنا رايحة للدكتور بالليل

توقف مكرم قليلاً

- الساعة كام

- يعنى الساعة ٨ كده

- وترجعي امتي

- مش عارفة على حسب دوري

- ماشي يا حبيبي

قالها مكرم ثم توجه إلى باب الفيلا، ومنه إلى السيارة انطلاقا إلى الشركة
وصل مكرم إلى الشركة ودخل إلى مكتبه، الأمور مستقرة نوعا ما هذه الأيام
لا جديد يذكر ولا قديم يعاد على مستوى المشاكل التي دائماً ما تلاحق مثل هذه
المجموعات الكبيرة.

استغل مكرم هذه الحالة من الهدوء، فطلب من مراد ألا يدخل عليه أحد،
ثم أخرج (التاب) الخاص به، وبدأ يفتح الكاميرات من خلال الأنترنت كما علمه
المهندس عمرو

الكاميرات أرقام ١،٢،٣ هي الكاميرات الخاصة بغرفة النوم، وهي تكشف
جميع أركانها وزواياها، أما الكاميرات أرقام ٧،٦،٥ هي الكاميرات الخاصة بغرفة
المعيشة، وهي عادة الأماكن التي تتواجد فيها نهلة.

الكاميرا رقم ٢ أظهرت نهلة تجلس على السرير في غرفة النوم ممسكة بهاتفها
المحمول، ساعة كاملة مرت لم تكن تحمل شيئاً غير اعتيادي

انفتحت عيننا مكرم على مصارعها، ثم أطلق ابتسامته تعنى الكثير

رأى نهلة وهي تفتح الهاتف و تخرج منه الخط الذي يحمل رقمه جميع
الناس، والذي يراقبه مكرم عن طريق سامح، وتضع مكانه خطأً آخر.

الآن انكشفت اللعبة، كل ما فكر فيه كان صحيحاً، كل الأوراق صارت
واضحة، أصبحت نهلة كالساحر المعلومة خدعه لدى المشاهد الذي لم يكن سوى

مكرم، لكن مكرم ما زال في جعبته الكثير.

بدأت نهلة في الكلام

- ألو أيوا يا حبيبي

- أنا قلت لمكرم إنني راحة للدكتور عشان المتابعة، وقلت له إنني ممكن أتأخر

حسب الدور، يعني أنا النهارده هبقى بتاعتك وبس

- يعني هجيلك على الساعة ٩ كده، أنا بظبط البنت اللي عند الدكتور و

بخليها تدخلني بدري، ما تقلقش...سلام يا روجي.

احمر وجه مكرم، تمكن منه الغضب، تمالك نفسه حتى لا يكسر احد

الأغراض الزجاجية الموجودة على المكتب، أن تعلم أنك تخان شيء، و أن ترى

الخيانة بنفسك شيء مختلف تمامًا.

بعد دقائق عاد مكرم إلى هدوئه من جديد، دقائق مرت كسنوات، رفع مركم

أحد الهواتف بجانبه

- أيوا يا ابني، هاتلي قرفة باللبن

الآن يحب أن أفكر بهدوء أكثر

لم يتبق سوى خطوة واحدة لكشف ذلك الشيخ الذي أفسد حياتي، فقط

مراقبة نهلة هذه الليلة...وسأصل إلى كل شيء.....

تحركت نهلة بسيارتها منفردة، بالتأكيد لن تأخذ معها أحد السائقين وهي

تذهب للولوغ في بئر عميق من الوحل، بدا الطريق فارغا هذا اليوم، وكأن الشيطان

من أفرغ هذه الشوارع ليسهل لنهلة طريق الوصول إلى المسرح الذي سيشاهد عليه

واحدا من أحب المشاهد إلى قلبه

وصلت نهلة إلى عيادة الطبيب وما إن دخلت، حتى سلمت على السكرتيرة و

ليته ظل سرا

لكن ليست خالية اليد، فقليل من المال بالنسبة لنهلة سيجعلها المريض التالي، بل والأجمل أنه سيجعلها تذهب مبكرًا إلى معشوقها.

لم تتأخر المريضة التي سبقتها كثيرًا، ولم تتأخر نهلة أيضًا في حجرة الكشف، وخرجت إلى سيارتها

بدأت تتحرك في اتجاه المكان الذي تعشقه، وكان مكرم (بسيارة طلب من سائقه أن يستأجرها له) يتبعها، بدا كأن مكرم بالذكاء الكافي الذي يجعلها لا تلاحظه، كما أن ما حدث معه سابقًا جعله لا يقف عندما سكنت حركة عجلات سيارة نهلة أمام أحد العمارات .

تقدم مكرم بالسيارة تجاوز العمارة، تجول بسيارته قليلاً في محيط المكان، ثم عاد مرة أخرى إلى نفس المكان الذي توقفت فيه نهلة.

وقف مكرم أمام العمارة محاولاً استكشاف تلك البناية، في أي طابق يمكن أن تكون نهلة الآن، في أي طابق ينتهك عرضه الآن.

تجول ببصره في العمارة من الخارج، الكثير من اللافتات وضعت، أحدهم طبيباً للعظام، والآخر مكتبا هندسيا، لكن جميعها، أسماء لا يعلمها، ثم توقف قليلاً، قال في نفسه أنه من الممكن أن تكون نهلة في أحد الشقق السكنية، لكنه عاد مرة أخرى لقراءة اللافتات ربما يجد فيها مفتاح اللغز الأهم في حياته.

طبيب آخر لأمراض القلب، وهذا الذي يعلوه محاسب قانوني، وبجانبه

مكتب هندسي

اتسعت عينا مكرم فجأة وهو يقرأ تلك اللافتة، إنه هو بلا شك، إنه ذلك

الثعلب الذي تسلل إلى حياة مكرم يعبث بها يميناً ويساراً

مازن ممدوح أبو العلا المحامي.

نعم، إنها تخونه مع هذا الشاب الذي كان طالبًا في كلية الحقوق أثناء تواجد مكرم ونهلة معًا في كلية الآداب، لقد كان منزله قريبًا من منزل نهلة، لقد راه مكرم أكثر من مرة في تلك المنطقة أثناء فترة الخطوبة، ولقد تقابلا في الجامعة كثيرًا، فلقد كان كلاهما له نشاطا طلابيا ملحوظا .

يبدو أنه يقف الآن أمام رماد نار لم تنطفئ، ظاهرها رماد لكن باطنه من قبله نار، نار لم تحرق إلا قلب مكرم الذي أحب فوهب، وعشق فأعطى .

انتهى وقت الكلام و حان وقت الفعل

ركب مكرم سيارته متجها إلى المنزل، دخل إلى مكتبه، أغلق عليه الباب من الداخل، أغلق هواتفه، جعل الغرفة مظلمة تمامًا، جلس على كرسيه، أغمض عينيه، وبدأ بالتفكير

في اليوم التالي بينما هو جالس يتفحص بعض الأوراق، جائه ما كان ينتظره، رن هاتفه برقم ذلك الرجل، تجاهله مكرم، فعاود الاتصال ثانية، ثم تجاهله مكرم، فعاود مرة ثالثة فأجاب مكرم محتدًا

- أكثر حاجة أكرهها في حياتي هي الغباء

- الله يسامحك تاني، وعموما عايز أقولك إن اللي بيقل في وشى السكة ما

بيطلعش عليه صبح

- أديني طلع عليّ ثلاثة

رد الرجل في هدوء مستفز

- ده عشان أنت غالي عندي، فكرت كويس

- بص بقى يا حيوان أنت، أنا لحد دلوقتي مستحملك، و آخر كلام عندي

شوف لك حد أهطل تاني تضحك عليه، وتلبسه المصيبة بتاعتك دي، ولو حاولت

تقرب من الشركة ثاني هصفيك، مفهوم
 رد الرجل بلهجة حادة للمرة الأولى
 - أنت كده اللي اختارت
 ثم أغلق الخط
 زفر مكرم في ضيق، أسند ظهره إلى الكرسي، تريث قليلاً حتى هدأت أنفاسه،
 ثم بدأ بتصفح الورق من جديد لكنه هذه المرة مشتت الذهن
 ثم توقف عن التصفح فجأة، وقال في نفسه
 - لازم أرتب أوراقى، عشان ما أخسرش أي حاجة، لازم كل خطوة أخذها في
 أي موضوع تكون مبنية على أساس قوى، لازم أفكر كتييييييييير، وبهدوء، دايمًا
 الأهدى والأذكى هو اللي بيكسب.



- كان إيه رده
 قالها الرجل الجالس خلف المكتب للرجل الذي يتواصل مع مكرم
 - رفض التعاون معنا يا باشا
 - هو الجاني على روحه



يتجه مكرم بسيارته إلى المجموعة ينتظر أن يتصل به مراد وهو مندوب

ليته ظل سرا

المجموعة لحضور فتح مظاريف العروض المالية لمناقصة وزارة الزراعة.

لم يطل الانتظار طويلا

- أيوا يا مراد، إيه الأخبار

رد مراد بصوت خافت

- المناقصة ما رسيتش علينا يا مكرم

رد مكرم بعصبية

- ده اللي هو إزاي

- في شركة قدمت عرض أقل مننا ب ٥٠٠ ألف جنيه

- نعم!!! ٥٠٠ ألف بس

أدرك مكرم في هذه اللحظة أن الأمر ليس طبيعيًا

- مراد أنت عارف ده معناه ايه

- معناه إيه؟

- معناه إن في خائن وسطنا يا مراد، و فرق السعر ده بيقول إن اللي اشتراه

مش عايز منه حاجة تانية يعنى قرر يضحى بيه.

- وده هنعرفه إزاي

- أنا هعرفه بطريقي، اقفل دلوقتي يا مراد، أنا ١٠ دقائق وهبقى عندك في

الشركة



صوت جرس الباب انطلق في شقة ليلى و خالد

- توجه خالد ليفتح الباب
 - مساء الخير يا دكتور خالد
 - أهلا يا أستاذ زكريا
 - أنا جاي عشان أعزم حضرتك على حفلة عيد ميلادي بكرة بإذن الله
 تفاجأ خالد من طلب زكريا لكن لا يوجد مانع للحضور
 - بإذن الله يا أستاذ زكريا
 أنهي خالد حواراه مع زكريا فأغلق الباب وجلس إلى جوار ليلى
 - عايز إيه الراجل ده تاني
 - قال عازمنا بكرة على عيد ميلاده
 - في السن ده وعامل عيد ميلاد
 - كل واحد حريا ليلى، إحنا هنحضر و خلاص.



- وصل مكرم إلى مكتبه، دخل مراد وأغلق الباب خلفه بدأ بالحديث
 - هنعمل ايه يا مكرم
 - هنتحاول نوصل للخاين اللي في الشركة
 - أنت شاكك في إيه
 - حد سرب العروض بتاعتنا للشركة اللي خدت المناقصة، والحد ده أنا
 هعرفه، ابعت لي الأستاذ ياسر مدير الحسابات

ليته ظل سرا

- حضر ياسر إلى مكتب مكرم و جلس أمامه
 - خير يا دكتور مكرم
 - كل خير، تقدر تفسر لي اللي حصل النهارده
 - الحقيقة يا دكتور معنديش أي تفسير
 - أستاذ ياسر، هو أبويا كان ليه أي نشاط أنا معرفوش
 ارتبك ياسر، بدا عليه التوتر
 - أنا هعرف منين يا دكتور
 - يعنى أنت كنت قريب منه وأنت المدير المالي، يعنى لو في حاجة زي كده و في
 شخص واحد ممكن يكون عارفها فبالتأكيد هيبقى أنت
 صمت ياسر قليلاً، بدا وكأنه يفكر بعمق
 هنا تكلم مكرم
 - خليني أختصر عليك الطريق
 أبويا كان بيتاجر في الهيروين
 زاد الموقف توتراً، بدا ياسر وكأنه يعرف شيئاً
 أخفض رأسه فجأة وقال
 - أيوا
 أنا طبعاً مكنتش أقدر أقولك حاجة زي دي بس واضح إن في حد سبقني
 وبلغك.
 عينا مكرم مركزتين على ياسر، ينظر إليه نظرة غضب واضحة قبل أن
 ينطق.
 - ودفعوا لك كام بقى يا ياسر

التفت ياسر إلى مكرم، حاول أن يدافع عن نفسه

- أنا.....

- أنت خاين يا ياسر، أنت اللي سربت العروض بتاعت المناقصة، ما هو مش

معقول يبقى فرق السعر صغير أوي كده واللي كان يقدر يسرب البيانات دي ٤
أشخاص

أنا وأنت ورحمة ومراد

مراد أنا أشك في نفسى قبل ما أشك فيه

ما اتبقاش الا أنت ورحمة

وسعادتك بلعت الطعم بسهولة

أنا بقى هقولك اللي حصل بالتفصيل

أنت سربت بيانات المناقصة للشركة اللي أخذتها، طبعًا بتعليمات من اللي
اشتروك، عشان بعد كده تيجي تحاول تضغط عليّ و تبلغنى إن أبويا كان تاجر
هيروين وإن عملية واحدة من دول كفيلة إن هي تعوض ١٠٠ مناقصة و من ناحية
تانية أبدأ أنا أحس إن بتوع البودرة أقوي منى وإني لازم أخضع لهم، كل العوامل
دي مع بعض كفيلة بأنها تخليني أسلم

وأكيد ما كانتش هتبقى أول مناقصة تضيع منى، بعد كده تيجي أنت في

صورة المضطر إنه يقولى عشان ينقذ المجموعة، وإنك أنت كنت عارف من الأول
بس ما رضيتش تبلغنى عشان ما تصدمنيش.

مش كده

لم ينطق ياسر بكلمة، ظل ينظر إلى مكرم في صدمة و اندهاش، فأردف

مكرم:

- مع إنك لو جيت قلتلي إنك عايز فلوس عمري ما كنت هتخلى عنك
صمت مكرم و لم يتكلم ياسر، الذي خفض رأسه، وتكلم بعد مرور حوالى

دقيقة

- برافو...برافو يا دكتور مكرم، أنت قرأت المشهد كله من قبل ما يحصل،
كل اللي أنت قلته صح بس الحاجة الوحيدة اللي مش صح فيه، إن أنا كنت هكذب
عليك في موضوع أبوك لأن دي حقيقة، وأنت لازم تواجهها
- هششششششش، ما تتكلمش خالص، أنا مش عايز أسمع منك أي كلام، أنا
هكتفي بس إنني أطلعك من المجموعة دي وراسك في الطين
اطلع برة وخذ حسابك، و ما أشوفش وشك في حياتي تاني



دخل جلال على الرجل الجالس خلف المكتب

- مكرم كشف ياسر يا باشا

رد الرجل في هدوء

- كنت عارف إن اللعب معاه مش هيبقى سهل

- وبعدين هنعمل ايه

- كده بقى ندخل على المستوى الثاني

بداية الفصل الدراسي الثاني في الجامعة، وكعادة بداية أي فصل دراسي

تجد المدرج ممتلئ بالطلبة، هناك منهم من جاء لأنه مل من أجازته، وهناك من جاء

ليرى أصدقائه وزملائه ليس إلا، أما هذا التعيس الذي يجلس غالباً في الصفوف الأولى ويحمل دفترًا جديدًا (عادة لا يملأ نصفه) فهو ذاته الذي جلس في نفس المكان في الفصل الدراسي الأول لكن ربما بلون مختلف لغلاف الدفتر، ومع بداية الدراسة بأسبوعين لا تجده أصلًا في أغلب المحاضرات، الغريب أنه في كل مرة يظن أنه قادر على فعل ما فشل فيه في الفصول الدراسية السابقة من حياته كل جاء لغرض معين لكن في النهاية المدرج ممتلئ، ولا يوجد موضع لقدم.

يتجه مكرم باتجاه المدرج وقد استراح قليلاً بعد التخلص من ياسر، دخل

إلى المدرج فهدأ الصوت

بدأ في إلقاء المحاضرة .

لاحظ الطلاب أنه يختلف عن تلك النسخة التي أنهت الفصل الدراسي

الأول، فقد عاد لروحه المرحلة من جديد، بدا متزنًا أكثر، بدا مشرقًا أكثر

في منتصف المحاضرة دخل عليه عامل الكلية، وقد أحضر له كوبًا من

الشاي ثم همس في أذنه

- العميد طالب حضرتك بعد المحاضرة

أوماً مكرم برأسه إيجاباً

بعد انتهاء المحاضرة اتجه مكرم إلى مكتب العميد

- خير يا فندم بلغني إن حضرتك عايزني

- إتفضل أقعد يا دكتور مكرم

جلس مكرم أمام العميد

بدا العميد متوترًا، ومترددًا

لاحظ مكرم ذلك فبادر بالحديث

ليته ظل سرا

- خيريا دكتور في حاجة
 - قال العميد في تردد
 - الحقيقة يا مكرم أنا مش عارف أجيها لك إزاي
 -شوف هو في بنت مقدمة ضدك شكوى
 - اندهش مكرم من كلام العميد
 - ضدي أنا!!، وإيه مضمونها
 - بتقول إن أنت....بتتحرش بالطلبة البنات
 - اندفع مكرم، وعلا صوته
 - نعم!!!!
 - أنا يا دكتور بتتحرش بطالبات
 - إهدى بس يا دكتور مكرم
 - أهدى إزاي يا فندم و الحيوانة دي بتحاول تطعني في شرفي
 - هي مش بتقول كده بس
 - أمال بتقول إيه كمان إن شاء الله
 - بتقول إن أنت طلبت منها أعمال منافية للشرف مقابل تسهيل بعض
- الحاجات

- نظر مكرم إلى العميد نظرة حادة، وكأنه لا يصدق ما يقوله ثم قال
- وحضرتك مصدق اللي هي قالتة ده
- طبعا لا يا مكرم
- رد مكرم وقد هدأت نبرته قليلاً
- البنات دي مزقوقة عليّ يا فندم، وما عندهاش أي دليل على كلامها،

وشهادة بقية الطلبة هتثبت كلامي

- للأسف هي معاها ٤ بنات غيرها بيصدقوا على كلامها، وبيقولوا نفس

الكلام

- كذب...كله كذب، كلهم مدفوع لهم فلوس عشان يقولوا الكلام ده، وأنا

عارف مين اللي دفع لهم

- مين اللي ممكن يكون دفع لهم؟

ارتبك مكرم، لم يدري ماذا يقول، لكنه حاول تدارك الموقف

- ناس خصوم ليا في السوق أكيد بيعملوا كده عشان يضرّبوا سمعتي

- أنا آسف يا مكرم بس أنا مضطر أحولك للتحقيق، وإيقافك عن العمل

بشكل مؤقت لحين النظر في الموضوع

تغيرت ملامح وجه مكرم بعد سماع الجملة الأخيرة

- بس كدة يا فندم أنتم بتزودوا الطين بلة، وحتى لو ثبتت براءتي بعد كده،

وإتنشر إعتذار رسي محدش هيصدق إني برئ

وكل الناس هتقول إني دفعت للبنات لعشان اسكتهم

رد العميد وقد علا صوته قليلاً

- دكتور مكرم أنا ماليش دعوة بالكلام ده كله، أنا مضطر أطبق القانون

- أي قانون ده اللي هيخلي سمعتي زي الزفت في الجامعة كلها

- يا أخي المتهم برئ حتى تثبت إدانته

- مش في مجتمعنا يا دكتور إحنا في مجتمعنا البريء متهم حتى تثبت براءته،

وحتى لو ثبتت براءته، فهو مدان بالتزوير أو الغش أو الرشوة في سبيل البراءة دي

نهض مكرم من مكانه

- عموما يا دكتور اعمل اللي أنت عايزه، وأنا هعرف إزاي أجيب حقي
 ملت ليلي من جلوسها في هذا المنزل، و هذا الشخص المدعو زكريا هي لا
 ترتاح له أصلاً، هما لا يعرفانه، هو مجرد رجل جاء ليسكن بجوار شقتهم
 وفوق كل هذا يدعوهم لعيد ميلاده، عيد ميلاد لرجل قد تجاوز الثلاثين،
 الأمر لا يبدو طبيعياً

همست ليلي في إذن خالد

- مش ياللا بقى

- أنا بقول كده برضو

قاما من مكانهما وتوجها باتجاه زكريا

- كل سنة و أنت طيب يا أستاذ زكريا

- على فين يا دكتور

- إحنا هنروح شقتنا بقى عشان عندنا مستشفى الصبح

- تمام يا دكتور شرفتوني و نورتوني



ليته ظل سرا

- دخل مراد إلى مكتب مكرم وجلس أمامه
 - خيرا يا مكرم في إيه، وبعدين أنت مش المفروض عندك محاضرة النهارده
 - ماهوده اللي أنا عايزك فيه
 - خير
 - أنا موقوف عن العمل و متحول للتحقيق
 - نعم!!!!
 ليه يا مكرم
 - في واحدة واطية قالت إن أنا تحرشت بيها، وقالت إن أنا بطلب من البنات
 حاجات مخلة بالشرف عشان أدبهم الامتحانات و أنجحهم وكلام فارغ كده ملوش
 معنى
- طب و البنات دي بتعمل كده ليه
 - أكيد مزقوقة عليّ
 - ومين اللي ممكن يزقها
 فكر مكرم لثواني قبل أن ينطق
 - أي حد بيكرهني أنا خصومي كتير زي ما أنت عارف
 مش ده المهم دلوقتي
 أنا عايزك تخلى أختك تجيبلي كل المعلومات الممكنة عن البنات دي،
 وخصوصا البنات اللي بدأت الموضوع ده
 - بسيطة، بس أنت ناوي تعمل إيه
 - هأقولك....
 في حديقة منزله يجلس مكرم ياسين يطالع إحدى الصحف، هادي كعادته،

يضع تركيزه التام فيما يقرأه، عيناه لا ترتفع عن الجريدة، وبجانبه كوبا من عصير
المانجو شديد البرودة كما يحبه تمامًا

تمر نهلة من أمامه وقد تهيأت للخروج، ترتدى فستانا أسود، وكأنها ذاهبة
إلى سهرة، في الحقيقة تبدو في أبي صورها، تبدو كعروس في ليلة خطبتها

- مكرم أنا رايحة للدكتور

لم يبدا مكرم اهتمامًا، وتظاهر بعدم سماعها

- حبيبي بقولك رايحة للدكتور

تظاهر مكرم أنه سمعها للمرة الأولى

- ماشي يا حبيبي، بس ما تتأخريش، عشان في فيلم عايز نتفرج عليه أنا و

أنتِ مع بعض

- فيلم!! فيلم إيه؟

- فيلم واحد صاحبي قالي عليه، بيقول إنه فيلم رومانسي حلو أوي

أطلق مكرم ابتسامته

- ونصحني إني ما أتفرجش عليه لوحدي، فعشان كده عايزك تتفرجى معايا

ابتسمت نهلة

- مش هتأخر عليك

غادرت نهلة بسيارتها دون سائق كالعادة، مكرم يعلم السبب، ولكنها لا تعلم

أن مكرم يعلم السبب، هي الآن تفكر في من ينتظرها في مكتبه، كان من الأخرى بها

أن تفكر في من ينتظرها في المنزل

قام مكرم من مكانه متجها إلى غرفة الجلوس ليقوم بتجهيز كل شيء للعرض

ليته ظل سرا

لم تتأخر نهلة يبدو أن مازن لم يكن لديه كثير من الوقت، أو أرادت هي ألا يلاحظ مكرم أنها استغرقت من الوقت كثيراً عند الطبيب
 عادت نهلة وهي لا تفكر في مكرم ولا ما أعده مكرم، عادت وهي لا تفكر إلا في مازن، كل دقيقة تمر مع مازن تساوي عام من ما تقضيه مع مكرم، ماذا لو كان مازن هو زوجها، ليتها رفضت مكرم من البداية، ليتها لم تنظر إلى ثروة والده، ولا إلى تفوقه الدراسي ومن بعده عمله في الجامعة، ليتها لم تنظر إلى الشبكة باهظة الثمن التي قدمها لها، ليتها نظرت إلى قلبها فقط، إلى ما تريد فقط، إلى عشيقها فقط.
 كل هذا صار جزءاً من جسد الماضي، لا تستطيع بتره، أو حتى أن تزرع غيره المهم الآن أنها فازت بالحسنين، زوجة الرجل المرموق الثرى، وعشيقة من تهوى كل شيء على ما يرام لا تدرى أنه من الممكن أن ينقلب السحر على الساحر

- حمد الله على السلامة يا حبيبي

قالها مكرم مبتسماً

- الله يسلمك

- ياللا بقى غيرى هدومك وحصليني عشان نتفرج على الفيلم

لم تبدو نهلة متحمسة

- هو لازم الفيلم ده النهارده

رد مكرم في ضيق

- يعنى أنا قاعد مستنيك كل ده ومجهز كل حاجة عشان ما نتفرجش

- بس مش لازم النهارده، أنا تعبانة شوية

(طبعاً لازم تكوني تعبانة)

قالها مكرم في نفسه قبل أن يوجه حديثه لها

- هي كل الحكاية ساعتين، وبعدين يا ستي لو نمتى نبقى نكمل الباقي بكرة
 لم تجد نهلة مفراً أمام إصرار مكرم
 - خلاص يا حبيبي اللي أنت عايزه
 دخلت نهلة إلى غرفة النوم لتبدل ملابسها
 ذهب مكرم إلى غرفة الجلوس ليضع اللمسات الأخيرة، ويقوم بتشغيل
 الفيلم

بعد قليل تبعته نهلة
 جلست إلى جواره، وضع مكرم يده خلف ظهرها، وبدأ العرض.
 الغرفة مظلمة تماماً إلا من ضوء الشاشة الذي ينعكس على مكرم ونهلة
 ليرى بعضهما بعضاً
 كانت البداية تقليدية، مقدمة الفيلم الطبيعية، تحمل موسيقى هادئة، مع
 أسماء الممثلين

وجه مكرم كلامه إلى نهلة
 - عارفة، صاحبي بيقول إن الفيلم ده غريب أوي
 - ليه
 - بيقول إنه بيبقى رومانسي، بس في نقطة تحول في الفيلم بتخليه يقلب
 فيلم رعب تبدو نهلة غير مقتنعة، لكن مكرم يعي تماماً ما يقول
 قرب مكرم كوب العصير إلى نهلة
 ثم قام هو بشرب بعض العصير من كوبه
 (إيه الحلو في الفيلم ده عشان مصمم إننا نتفرج عليه)
 قالتها نهلة في نفسها ثم بدأت تشرب من كوب العصير

ليته ظل سرا

بعد نصف ساعة كانت قد انتهت من آخر قطرة فيه
كان الفيلم يدخل مرحلة أخرى من الاثارة
- مش عارف ليه حاسس إن بطله الفيلم ده مش مضبوطة
نظرت إليه نهلة وقالت
- ليه مع إن باين علمها إنها بتحبه و مخلصه له
- مش كل حد بيبان على حقيقته، في ناس كثير مستخبية ورا أقنعة مزيفة
قناع الاخلاص، قناع الحب، قناع الطهارة
صمت مكرم قليلاً ثم أردف
- عموماً هنشوف
أمسك فجأة بجهاز التحكم عن بعد وضغط على أحد أزراره
تتسع عينا نهلة فجأة
تنظر إلى مكرم فإذا عيناه جامدتين ثابتتين باتجاه الشاشة
تنظر إلى الشاشة مرة اخرى
لا تكاد ان تصدق ما تراه
إنها...إنها...إنها هي بذاتها
تتجول نهلة بنظرها غير مدركة لما يحدث، عيناها لا تقعان على شيء إلا على
الشاشة و مكرم، الشاشة تحوى مشاهد لا تعطى مجالاً للشك على خيانتها، ومكرم
صامت وعيناها جامدتان لا يتحرك
أي موقف في الدنيا أصعب من هذا، ربما الموت حرقاً أهون من هذا، أو
الوقوع من على أعلى قمة في سلاسل الهيماليا، أو الغرق في أقدرة في إحدى
القرى، كل هذا أهون

غابت عن المكان والزمان، توقف عقلها، لكن رأسها ما زال يتحرك، قلبها يكاد يتوقف، لكن رأسها ما زال يتحرك، فقدت الاحساس بأطرافها لكن رأسها ما زال يتحرك، حالة اللا وعى تزداد، يقتلها ما تعرضه الشاشة، ولكن مكرم هو القاتل الأعظم بصمته وجموده

نظر إليها مكرم فجأة ولا يبدو على وجهه أي علامات للضجر

- إيه يا حبيبي مالك

بدأت أطراف نهلة بالارتعاش

ما الذي يفعله هذا المجنون، الموقف لا يحتمل أي نوع من أنواع المزاح، أو حتى التظاهر بالهدوء، إن ما يفعله جنوناً لكنه بالنسبة لنهلة كمن غرس سكيناً في قلب شخص، وصار يقطع أوردته وشرابينه، حتى اختراق ظهره، وصار مكان القلب فجوة اذا نظرت من الأمام رأيت ما يقبع في الخلف.

لا يتحرك لسائها، قطرات العرق تتساقط من وجهها، إنه لموقف عصيب يصعب على العقل البشري إدراكه.

تحدث مكرم من جديد

- بصراحة أنا مش عارف الحالة اللي أنتِ فيها دي من الصدمة ولا من السم

اللي في العصير

زادت رعشة نهلة أكثر، قطرات العرق صارت أسرع، القلب يدق بسرعة أكبر

لا لا إنه يمزم فقط، إنه يثير رعبى فقط

لا لا لا يا مكرم، أرجوك توقف عن هذا، ألا يكفى هدوءك القاتل، وصمتك

الجرح، إنهما كفيلا أن يقتلاني، دون الحاجة إلى سم

لا تقدر على الكلام، لا تعرف حتى ما تقول

الأحكام دي الا بعد تنفيذها وبسنين

صرخت نهلة من جديد، وهنا تكلمت بطريقة واضحة
- مكرم أنت فاهم غلط، والله العظيم أنا حامل منك أنت

صرخ مكرم بأعلى صوته

- بطل كذب بقى

أنا ما بخلفش أصلاً

أنا حالي ميؤوس منها

ثم اقترب منها أكثر وصرخ في وجهها

- أنا شوفتك بعينيا وأنت طالعة مكتب مازن أبو العلا

نهلة تصرخ أكثر، السم يمزق أحشائها، ومكرم يمزق كل شيء فيها

ألقى مكرم رأسها على الأرض بقوة لتصطدم بها

ثم استقام تمامًا، وتحرك باتجاه باب الغرفة

- على فكرة يا نهلة، الترياق اللي ممكن ينجيك في جيبي

أخرج مكرم علبة من جيبه بها سائل يميل إلى الحمرة

- لوعايزاه تعالي خديه

استجمعت نهلة كل ما بها من قوى، وتحركت باتجاه باب الغرفة

فتح مكرم العلبة، وسكب ما بها من سائل على قدمه تلقائياً بدأت نهلة

تعلق في قدم مكرم دون إرادة، الإنسان يفقد كل ما به من إرادة أمام الموت لكنها

تعلم أن هذا لن يجدي نفعا فبضع قطرات يمكن أن تلعقها من الترياق لن تحول

دون ولوجها التراب سريعاً

- مفيش نهاية أسوأ من دي لواحدة زيك، بس دي مش النهاية، لسه الكلب

اللي غواك حسابيه معايا

صمت مكرم قليلاً ثم أردف

- آخر حاجة أحب تسمعها في حياتك يا نهلة إن الاسعاف في الطريق، وإن

تقرير الطب الشرعي المختوم بتاريخ بكرة و اللي بيقول إنك موتي بأزمة قلبية في

جيبى، يعنى مش هاخذ فيكى يوم واحد

خرج مكرم من الغرفة، وأغلق الباب

نهلة تعانى من الألم في الداخل

مكرم يحاول تهدئة نفسه قبل وصول الإسعاف، وقبل الخروج إلى المستشفى

حتى لا يثير الشكوك

كل شيء يسير وفق هوى مكرم، الآن انتهى كابوس سيطر على حياته لعدة

أسابيع

ولكن ما زال هناك كوابيس تلوح في الأفق.

كل الجرائد تناولت الخبر الذي جاء على النحو التالي

(وفاة زوجة مكرم ياسين إثر أزمة قلبية حادة)

لكن الخبر كان قد انتشر منذ ساعات عبر المواقع، وهذا ما جعل صفحات

الجرائد لا تخلو من التعازي

نعى يتلو نعى يتلو نعى في جريدة تتلو جريدة تتلو جريدة كل يحمل التعازي

لأحد أكبر رجال الأعمال

اختلفت الديباجات و اختلفت أنماط الخطوط و اختلفت القلوب لكن

الاسم كان واحداً

(تنعى الشركة الفلانية الدكتور مكرم فريد ياسين في وفاة المغفور لها

(زوجته)

(ينعى مكتب الدكتور علان الدكتور مكرم فريد ياسين في وفاة زوجته)
 (تتقدم مجموعة شركات كذا للدكتور مكرم فريد ياسين بالتعازي في وفاة

حرمه)

الرسائل لا تكف عن الورد إلى هاتف مكرم
 برقيات التعازي تصل من كل حدب وصوب
 في سرداق العزاء الكبير المقام بحديقة منزل مكرم الذي يجلس مكرم و
 حمدي شقيق زوجته ووالد زوجته و خالد زوج شقيقته في مقدمته
 وفي نهايته يجلس ذلك الشيخ المعروف لقراءة ما تيسر من الذكر الحكيم
 يجول في السرداق بعض الشباب يحملون أكواب القهوة السادة ليوزعوها
 على الجالسين الذين يرتدى أغلبهم بدلة سوداء وربطة عنق سوداء أيضاً
 حتى جاء ذلك الرجل الذي لا يعرف مكرم اسمه بعد
 سلم على مستقبلي العزاء
 أولهم بالتأكيد هو مكرم قال له في صوت خافت
 - البقاء لله يا دكتور مكرم
 رد مكرم محاولاً تمالك نفسه
 - الدوام لله
 ربت الرجل على كتفه وسلم على من بجواره وأخذ مكانه في السرداق
 إقترب خالد من مكرم أكثر ثم همس في أذنه
 - مين ده يا مكرم
 نظر إليه مكرم محاولاً التهرب

- قصدك على مين

- الراجل القصير ده

- أه... ده واحد من صحاب بابا القدام

و بعدين إشمعنى ده يعنى يا خالد اللي سألت عليه

- أصله كان بيطبطب عليك بطريقة حسستنى إنه من العيلة عشان كده

سألت

- لا هو مش من العيلة ويمكن أنت حسيت منه كده عشان هو بيعتبرنى زى

إبنه

رجع خالد إلى مكانه.

لم يمض من الوقت الكثير حتى حدث ما كان يخشاه مكرم

(يا ابن الكلب.... طبعًا سرك إتدفن معاها و وجودك النهارده احتفال إنك

عملت اللي أنت عايزه و كل حاجة ماتت مع نهلة)

قال مكرم هذا الكلام في نفسه وهو يضع يده في يد مازن أبو العلا

الذي ضبط نفسه لأقصى درجة حتى لا ينقض عليه وينزع رأسه بعيدا عن

جسده

دخل مازن إلى السرادق واتخذ مكانه بين الحضور

بداخله شعوران متضاربان أولهما حزن حقيقي على وفاة معشوقته، وثانيهما

نشوة الانتصار على ذلك الوغد مكرم الذي ظفر بحبيبته، ولكنه الآن يستقبل

المعزين فيها ببالغ الأسى وهو لا يدرى أن طفلها المدفون معها هو ابنه هو، لكن

بالتأكيد الشعور الثاني يتفوق على الأول، هو كان يحب نهلة فعلا، لكن موتها الآن

هو النهاية الأنسب، قبل أن يعلم مكرم بعلاقتهم، أو تعلم زوجته هو، وعندها

سيكون هناك سيل من المشاكل لن يستطيع الوقوف أمامه.
 بعد قليل بدأ الحضور بالانصراف، واحدًا تلو الآخر، يسلمون على مكرم،
 يلقون كلمات المواساة، وينصرفوا
 خرج جلال من السرادق، سلم على الجميع مرة أخرى، لكن هذه المرة في
 سلامه على مكرم، اقترب من أذنه وتكلم بصوت خفيض
 - يعنى مراتك تموت، وتتحول للتحقيق في أسبوع واحد
 رد مكرم بصوت لم يسمعه إلا جلال
 - المصائب لا تأتي فرادى، عقبال ما تيجى على دماغك ان شاء الله
 - هنشوف
 قالها جلال ثم انصرف
 لم يمضى وقت طويل حتى انصرف الجميع لم يتبق سوى مكرم، و خالد،
 وشقيق نهلة ووالدها، ومراد بالطبع
 ما إن انتهوا حتى دخلوا جميعا إلى منزل مكرم، الذي كان يخلو الا من ليلى و
 عمته و والدة نهلة
 اقترب مكرم من والد نهلة و قال له
 - عى أنت هتبات معايا النهارده أنت و حمدي
 - لا يا مكرم يا ابنى احنا لازم نروح
 - أنا مش بعرض عليك، أنا خلاص رتبت لحضرتك و طنط أوضة، ولحمدي
 أوضة، وبعدين أنتم هتباتوا هنا مسافة الليل ويا سيدى الصبح بدرى إبقى روح
 لم يجد والد نهلة ما يقوله أمام هذا الإصرار من مكرم
 فأضطر للموافقة

- أنا هخلمهم يحضروا العشا
 - لا يا ابني ومن له نفس للأكل
 - يا عى أنتم ما أكلتوش حاجة تقريبا من إمبراح، ولا أنا كمان، وما
 أعتقدش نهلة لو كانت موجودة كانت ترضى بكده.
 - أنا يا ابني راضي بقضاء ربنا، ونهلة بنتي ولله الحمد كانت مصلية و كانت
 طيبة وكل الناس بتحبها وربنا يجعل كل ده في ميزان حسناتها.
 بالطبع لم يروق هذا الكلام لمكرم
 الذي قال في نفسه
 (أنت طيب أوي يا حاج، أنت لو تعرف اللي بنتك عملته هتحصلها)
 لكنه رد بدعوة خرجت من لسانه فقط
 - الله يرحمها
 قالها واتجه معه إلى السفارة حيث كان ينتظره جميع الموجودين في المنزل
 بعد أن انتهى من العشاء توجه كل منهم إلى غرفته
 دموع والدة نهلة لم تتوقف.
 حمدي شقيق نهلة ما زال في أثر الصدمة
 مراد يحزن لحزن مكرم
 ليلي عيناها تحمل اللون الأحمر من كثرة البكاء
 ومكرم.....

الهروب من الواقع، الإبحار خارج حدود مدينتك، السير خارج كل
 خطوط السير، ترك كل الأمور برمتها، تزيح من رأسك كل الأشياء التافهة، العمل،
 العائلة، الأسرة، الأصدقاء، لا تتذكر من حياتك المعتادة سوى الصلاة هذا إن كنت

تصلى أصلاً

هكذا فعل مكرم، بعد ان انتهت أيام العزاء الثلاثة، غادر الفيلا فجرا في هدوء، إنطلق إلى الفيوم، ثلاثة أيام قادمة، ليس فيها شيء إلا مكرم ونفسه فقط جميع هواتفه مغلقة، جميع وسائل التواصل الاجتماعي غير متاحة، لا يوجد طريق يؤدي إليه، هكذا أراد، انتهت إحدى المشاكل نعم، لكن ما زال هناك الكثير، لا بد أن أعود إلى الجامعة مرفوع الرأس، لا بد أن أتخلص من ذلك الكابوس القصير الذي يظهر لي في كل مكان، وعلى هامش المواضيع ما المانع من التفكير في الزواج مرة أخرى، أو ربما إحداهن لا تستحق أن تحمل اسم مكرم ياسين.



قال الرجل الجالس خلف المكتب

- يبدو إننا هنضطر ننتقل للمستوى الثالث يا جلال.
- اللي تشوفه يا معالي الباشا، أنا من إيدك دي لإيدك دي صمت الرجل قليلاً ثم أردف
- لسه قدامنا وقت على ما الشحنة توصل
- يعنى سعادتك شايف إننا نستني شوية
- استني، ولو ركب دماغه ثاني، ابقى ادخل في المستوى اللي بعده



ثلاثة أيام كان مراد فيها يتحمل مسئولية المجموعة

ليته ظل سرا

بعض الأمور البسيطة، كلفه به مكرم، وأخبره أنه سيسافر ثلاثة أيام لإنهاء بعض الأمور، لكنه لم يخبره ماهية الأمور، ولم يخبره كذلك عن وجهته لكن الأيام الثلاثة قد انتهت وها هو مكرم قد عاد، ليملاً مكانه من جديد، لكنه لم يصل إلى الشركة بعد، اتصل بمراد منذ قليل، وأخبره أنه على وشك الوصول

بالفعل لم يمر من الوقت الكثير حتى حضر مكرم، ودخل إلى مكتبه، وبدأ مراد بالكلام

- حمد الله على السلامة من المكان اللي أنا ما أعرفش
- قالها مراد مازحًا، لكن مكرم نظر له نظرة تحمل شيء من العتاب لتكراره هذا الأمر، لكن رده جاء في هدوء.
- الله يسلمك، إيه الأخبار
- كل حاجة زي الفل زي ما أنت طلبت بالضبط
- ده العشم برضويا مراد
- وجهزت لك ملف كامل عن البنات اللي اتهموك في موضوع الجامعة
- حلو أوي سيب لي بقى الملف ده أنا هاطلع عليه
- أعطاه مراد الملف
- قولي بقى هتعمل ايه
- ما تقلقش، بعد ما أبص على الملف هقولك



يصمت ولا يتكلم، تحدثه فلا يرد عليها، هذا على غير عادته، اضطرت في

ليته ظل سرا

الصراخ في وجهه حتى يستفيق.

- في إيه يا ليلي

- إيه يا خالد بقى لى ساعة بكلمك، وأنت مش معايا نهائي

- معلش يا حبيبي، مضغوط شوية الأيام دي

- ليه يا خالد في إيه

- يعنى شوية مشاكل في الشغل كده.

- طالما على قد كده يا حبيبي يبقى الحمد لله

التفت اليها، وبدأ يحدثها بانتباه

- كنت بتكلميني في إيه بقى يا ستي.

- كنت بكلم عن مكرم، وحياته بعد موت مراته

- بصراحة يا ليلي مكرم أخوك ما يتخافش عليه، ده كان متماسك جداً يوم

العزا، كأن اللي ماتت دي حد ما يعرفوش

- حرام عليك يا خالد ده مكرم كان بيعجها أوي، بس هو مكرم أخويا كده

طول عمره لو على كتفه هموم جبل، بيبان طبيعي

- في كل الحالات مفيش حاجة تدعوللقلق

- يعنى يا خالد ده قلق طبيعي، ده أخويا، وده تغيير كبير في حياته. الله

يرحمك يا نهلة

أنا حاسة إن مكرم هيرفض الجواز بعد نهلة، لأنه لو لف العالم مش هيلاقى

ضفرها

- عندك حق، الله يرحمها

- أنا بفكريا خالد إننا نر.....

ليته ظل سرا

صوت الجرس الذي جاء دون انقطاع، مع الدقات العالية على الباب،
قطعت كلام ليلى

قام خالد مسرعا، مهرولا باتجاه الباب، وهو يتمم ببعض العبارات من
نوعية (سترك يا رب) (خير اللهم اجعله خير)

وما إن فتح الباب، حتى صرخ البواب في وجهه

- الحق يا دكتور خالد، الأستاذ زكريا واقع على الأرض، وما بينطقش.

تدخين لفافة التبغ وإلقائها في المراض، هذه العادة التي تفعلها يوميا من
ثلاث إلى أربع مرات، إذا كانت داخل المنزل، لكن العدد قد يصل إلى عشرة في الأيام
التي تكون خارج المنزل فيها، لم تستمتع كثيرا بهذه اللفافة، لأن أمها قد نادتها كي
تخرج مسرعة. هناك من ينتظرها على هاتف المنزل، رغم اندهاشها من أن أحدا
يظلمها على الهاتف الأرضي وليس على هاتفها المحمول، إلا أنها أنهت اللفافة لكي ترى
من ينتظرها على الهاتف.

خرجت الفتاة التي يميل وجهها إلى السمرة قليلاً، عيناها التي تحملان لونا
عسلياً فاتحاً، جسداً ممتلئاً بعض الشيء، كل هذا يتزين بشعر أسود و ناعم، ومع
كل هذه المواصفات التي تجعل منها فاتنة بكل معاني الكلمة، إلا أن ملامحها قد بدا
عليها الشقاء، فالعمل في عيادة أحد الأطباء والسهير إلى الساعات الأولى من الصباح
حتى دخول آخر مريض لهو أمر مرهق حقاً، ولكن ما جعل والدتها تقبل، أنهم في
حاجة إلى المال من أجل المعيشة. ومن أجل العلاج الذي يسرق كل ما تكسب كل
شهر، وأهم شيء طبعاً أن الأمر حلال وليس فيه حتى شبهة الحرام.

هذه الفتاة التي تقدم لها كثير من الشباب لخطبتها، لكن جميعهم لا يصلح
أن يكون زوجها، فهذا مدمن، والآخر سيئ السمعة، ولكن ليس هذا هو السبب

الوحيد، فاللسان دائماً يقول لا اذا كان القلب مشغولاً .

أمسكت بالسماعة

- ألو

- الأنسة حسناء

- أيوا مين معايا

- تستيني بكرة الساعة ١١ الصبح في الكافية اللي ورا بوابة كلية طب

- أنت مين

- لو ما جيتيش مش هيحصلك كوديس

- مش جاية

أغلق الهاتف في وجهها دون أن يعلق بكلمة واحدة

كان الغضب قد تملكها، فأغلقت الهاتف بقوة

ثم ذهبت لتجلس على إحدى أريكات منزلهم التي تكاد أن تسقط من شدة

قدمها، وعلى الأريكة الأخرى تجلس والدتها المسنة، التي بلغت من العمر أزدله،

وبالتأكيد كحال معظم المسنين لا يخلو جسدها، من مرض السكر، أو الضغط، أو

الفضل الكلوي، لكن ما أصابها كان السرطان الذي فاجأها منذ عامين

لاحظت والدتها ما حدث فوجهت حديثها إليها قائلة

- إيه يا حسناء مين اللي كان بيكلمك و ضايقتك كده

- مفيش يا ماما ده واحد بيعاكس

- أنا سامعك بتقولي له مش جاية

- أيوا يا ماما ما هو حيوان، عايزني أقابله

- ربنا ينتقم منه، هيبقى هوو الزمن عليك

ليته ظل سرا

- ما تشغليش بالك أنتِ يا ماما، من ده كثير
- طيب يا حبيبتي، ماتنسسيش وأنتِ جاية بكرة تجيبي لي الدواء.



فتح عينيه ليجد نفسه ملقى على سرير في غرفة لا يعرفها، نظر حوله و سرعان ما أدرك أنه بين جدران أحد المستشفيات، لا يدرى كيف دخل إلى هنا، ولا حتى ما الداعي إلى وجوده في هذا المكان، لا يوجد أحد حوله، الغرفة التي يقبع بها خالية تمامًا إلا من سرير، وبجواره يوجد منضدة صغيرة يوضع عليها الماء، أمسك بالكوب و شرب بعض الماء، ثم ضغط على زر كان بجوار السرير

فإذا بإحدى الممرضات تدخل عليه.

- حمد الله على السلامة يا أستاذ.

- الله يسلمك، هو إيه اللي حصل

- حضرتك كان مغى عليك، بسبب إن ضغطك انخفض فجأة، وجيرانك

اللي جابوك هنا

- جيراني مين

- دكتور خالد، ودكتورة ليلى

- وأنتِ تعرفيهم

- أيوا، هما فضلوا معانا لحد ما حالة حضرتك استقرت

- وهما راحوا فين دلوقتي

- هما روحوا، وقالوا إن هما هيبجوا بالليل، يطمنوا عليك، ويمكن تروح

معاهم.

ازداد وجهه نضارة، انفتحت شهيته باعتراف جميع من حوله، بدأ يهتم أكثر بهيئته، ومظهره الخارجي، يختار عطره الفرنسية بدقة، أصبح العميل الأهم لدى أهم محلات البديل، أحذيته صارت متنوع أكثر بكثير من ذي قبل، حتى نظارته الطبية أصبحت نظارات، وساعته السويسرية أصبحت ساعات.

ربما من يعرفه اليوم يظن أن هذا هو حاله منذ زمن، ولكن المقربين منه بدأوا يلاحظون هذا التغير في شخصيته وحياته بعد وفاة زوجته بشهر، لا أحد يمكنه إنكار أن مكرم كان يهتم بمظهره وصحته قبل هذا، ولكن ليس إلى هذا الحد، ليس إلى الحد الذي يجعله يستقدم المصفف إلى منزله ثلاث مرات أسبوعياً، ويقضى ساعتين من ليلته يومياً في صالة الجيم، والبدلة التي يرتديها اليوم ربما لا تلامس جسده ثانية إلا بعد شهر من كثرة ما استقدم من ملابس في الفترة الأخيرة .

ثلاث شهور مرت الآن على وفاة زوجته، قضى الشهر الأول منعزلاً، لا يخالط الناس إلا في أضيق الحدود، بدأ التغير الشخصي يطرأ عليه تدريجياً.

بعض من حوله كادوا أن يجزموا بأنه يعيش قصة حب جديدة هي التي غيرت حياته، والبعض استبعد هذا الاحتمال لأنه يعلم مدى حبه لزوجته ومقدار حزنه عليها بعد وفاتها، لا يمكن لأي شخص يحمل قلباً تجرى فيه دماء ويحمل هذا الحب الشديد الذي كان يحمله مكرم لهلة ويستطيع أن يتدارك موتها سريعاً، ويدخل في علاقة أخرى، وكان هناك قلة قليلة تعتقد أن مكرم يفعل كل هذا لأصطياد إحداهن، حتى أن بعض الفتيات العاملات معه، أصبحن يخططن للظفر به، إنه حلم لأي فتاة أن تعيش في مثل قصره، وتركب مثل سيارته، وتكون في مكانته وشهرته، إنه حلم لأي فتاة أن تكون زوجة مكرم فريد ياسين.

ليته ظل سرا

أما السر الحقيقي وراء هذا التغيير، كانت تلك الحقيقة التي أدركها بعد وصول قطار العمر إلى المحطة التاسعة والعشرون، وبعد ضياع زهرة الشباب كما يقولون و سنوات العنفوان بين ذراعي امرأة لم تكن تستحق أن تكون أبدا شريكة حياته.

لكنه كعادته لا يحب الهزيمة، لا يريد ان يكون مقهورا، لن تعكر نهلة صفو حياته في حياتها، وبعد أن واراها التراب أيضًا.

قرر أن يطلق لنفسه العنان، ما زلت في التاسعة والعشرين، معظم الشباب في مجتمعنا لا يفكرون في الخطبة إلا بعد تجاوز الثلاثين، سأفعل كل شيء يشعرنى بمتعة الحياة.

ما فائدة هذا الرصيد البنكي إن لم يكن مسخرا للمتعة ثم المتعة وللمزيد منها.

سأشتري أفخم السيارات، سأبنى قصرا جديدا كقصور الخلفاء العباسيين، سأعتنى بكل شيء يمكن أن يجعلني سعيدًا، ربما أتزوج امرأة أخرى، وربما أكثر من امرأة، كثير منهن تتمنى أن تكون الزوجة الثالثة أو الرابعة لي، وأكثر من ذلك ليس لديها ما يمنع أن تكون بجانبى حتى ولو لن تكون الأخيرة، لن أجعل نهلة تهزمني، لن أجعل تلك الطالبة المدعية تهزمني، لن أجعل ذلك البدين القصير يهزمني، أنا لا أحب الهزيمة.

طرق مراد على باب المكتب ثلاث طرقات ثم دخل

- في مصيبة يا مكرم

- في إيه!!!!

كل شيء في هذا المكان صمم لكى يكون مكانا رومانسيا، في هذا المكان

حيث تجلس على العشب الأخضر، ترى بركة المياه تتلألأ، صوت الموسيقى الهادئة يمر في أذنيك، حتى تباعد الطاولات عن بعضها يتيح لك الفرصة للكلام كيفما تحب، زهور على الطاولة، العناية بالنظافة إلى أقصى درجة، كل هذا يجعل منه المكان الأنسب لتفوح مشاعرك إلى من تحب.

كانت تجلس في انتظاره

هو لم يأت بعد

لن أنتظر أكثر من هذا

هذا الأحمق المغرور

أنا حتى لا أعرف شكله

- إيه رأيك في المكان ده.

قالها وهو يسحب كرسيًا للجلوس، ثم أردف

- طبعًا عمرك ما دخلتية قبل كده، ولا عمرك هتدخلية

قالت في نفاذ صبر

- أنت مين وعايزايه

أجاب في لهجة هادئة

- أنا مين مش هتفرق معاك كثير، إنما عايزايه ده المهم

- أنا معنديش وقت أضيعه معاك

- ليه رايحة فين.

- ما يخصكش

- أنا قصدي يعني لو رايحة البار أوصلك

هنا أدركت حسناء أنها لا بد أن تتمهل، لا ينبغي أن تغضب، عليها أن تكون

صمتا قليلاً قبل أن يردف هو

- بصي..... دكتور مكرم كان ممكن بسهولة يثبت إنك شغالة في بار،
وبسهولة أكثر كان هيجيب ناس تشهد إنك مش بس بتقفى على البار، إنما إنك
كمان معندكش مانع تنزلي الصالة، والكلام ده طبعاً موثق بصور

أخرج من جيبه ظرفاً أبيض وألقاه في اتجاهها

أخرجت الصور من الظرف، بدأ العرق يتزايد أكثر

- شوفي بقى لو الصور دي خرجت في التحقيق، أو لو راحت للست والدتك،

أو للعاشق الولهان، هتبقى إيه النتيجة

لم تنطق بكلمة واحدة وظلت صامته، فأردف

- شوفي دكتور مكرم مش بس هيديكِ فلوس، لا كمان هيجيب لك وظيفة

محترمة بدل البار والوساخة دي، علاج والدتك وكل اللي تحتاجه هيتكفل بيه كل
شهر، وكمان هيتنازل عن حقه في التحقيق بعد ما اتبليت عليه.

ظلت صامته بعض الوقت، لكنها نطقت أخيراً

- يعني أنت عايز تقنعني إن هو يعمل معايا كل ده، بعد اللي أنا عملته فيه

- لو كان عايز يأذيك، كان ممكن يأذيك، هو عارف كويس إن حربه مش

ضدك أنتِ

- طب وإيه اللي يخليه يعمل كده

- في الأول والآخر هو مفيش بينك وبينه حاجة شخصية، ومش هيستفيد

أي حاجة لما يعمل معاكِ كده، بس هو فكير بالعقل، وشاف إنه ممكن يأخذ اللي هو
عايزه من الموضوع، و في نفس الوقت يعدلك دفة حياتك، بدل ما أنتِ بتتبعي
نفسك للي يدفع.

- طب و....

- ما تقلقيش، هما مش هيعملوا حاجة، هما خلاص وصلوا الرسالة اللي هما عايزينها، محدش فيهم هيتعرض لك
مش طالب منك رد دلوقتي، خدى وقتك في التفكير براحتك بس خلى بالك
إحنا قضيتنا كسبانة بمزاجك أو غصب عنك، أنت اللي محتاجة لنا مش إحنا اللي
محتاجين لك.

وصلا معًا إلى باب المصنع، كان مكرم في حالة من الهدوء لم يفهمها مراد،
كان يتوقع منه أن يتطير شرار الغضب من عينيه، هكذا يفعل أي شخص يضرب
عمال مصنعه عن العمل .

نزلا من السيارة و دخلا من الباب الخلفي، كان مدير المصنع بانتظارهما،
بمجرد دخولهما وبعد السلام، دخلوا جميعًا إلى مكتب المدير.

المدير في حالة من الحرج

مراد في شيء من الغضب

و مكرم في غاية الهدوء

بدأ مكرم بالكلام

- إيه اللي حصل

رد المدير

- الحقيقة يا فندم، أنا مش عارف أبدأ منين، أنا شخصيا مش عارف اللي
وصل الحالة للدرجة دي، كل شيء كان ماشي كويس، العمال كانوا بيشتغلوا زي ما
الكتاب بيقول، بس من أسبوعين كده بدأت أحس بحالة غريبة ماشية في المصنع،
الإنتاج قل، والناس كانت بتشتغل كده من غير نفس

- وما بلغتنيش بالكلام ده ليه
- مكنتش متصور يا فندم إن الأمور هتوصل لكده، الدروب مكانش كبير
- بالقدر اللي يستدعي تدخل حضرتك
- وبعدين
- جيت النهارده لقيت العمال عاملين إضراب، ومش عايزين يشتغلوا
- والسبب
- عايزين زيادة في المرتب
- هما مش ليهم زيادة سنوية بياخدوها
- بيقولوا إنها مش كفاية
- بدأ مكرم يعلو صوته هنا
- دول بياخدوا مرتبات محدش بياخدها
- لم يرد المدير بأي كلمة، هنا تدخل مراد، وجه كلامه إلى مكرم
- والحل إيه دلوقتي
- صمت مكرم قليلاً، ثم أردف
- أنا هنزلهم بنفسي
- نزل مكرم إلى الساحة المتواجدة أمام المصنع
- فور وصوله بدأ العمال بالهتاف، كان من الواضح وجود قيادة لهذه
- المظاهرات

فهذا الرجل ذو الشارب الكث، صاحب الوجه الأسمر، والعينين السوداويتين. والذي بدأ بالهتاف ثم بدأ العمال يرددون خلفه أشار لهم مكرم بيده ليصمتوا، لم يستجيبوا على الفور لكنهم في الأخير

استجابوا، لم يتكلم مكرم إلا بكلمات واضحة و محددة.

- اختاروا ثلاثة منكم، يعرضوا مطالبكم، وهنشوف مع بعض ممكن نحل

الموضوع ده إزاي

بعد تلك الكلمات تركهم مكرم متجها إلى مكتب المدير القابع في الطابق الأخير من المصنع، وترك العمال خلفه لمهمة اختيار الثلاثي الذي سيمثلهم أمامه، لم يكن اختيار أولهم بالصعب فهو الرجل ذو الشارب الكث، صاحب الوجه الأسمر، والعينين السوداوتين.

لكن كان الخلاف في الثنائي الآخر، هذا ما جعلهم يتأخرون قليلاً، لكنهم بعد نقاش، قرروا التصويت على الاثنين الآخرين، وتم اختيارهم بناءً على رأى الأغلبية، هكذا تكون الأمور في طبيعتها، لو ترك الأمر بدون اختيار ستعم الفوضى، لكن الاختيار المرتكز على قاعدة الأغلبية هو الحل الأمثل لكل الأمور.

صعد الثلاثة إلى مكتب المدير، وجلسوا أمام مكرم، وفي حضور مراد، ومدير

المصنع، بدأ مكرم بالكلام

- طلباتكم

هنا تكلم الرجل ذو الشارب الكث

- إحنا يا دكتور مكرم شغالين في المصنع هنا من أيام الوالد الله يرحمه،

ومن أول ما المصنع ده فتح، وإحنا اللي بنيناه على أكتافنا

- والمطلوب

- بصراحة إحنا مش شايفين إن في تقدير لينا، ولى إحنا عملناه للمصنع ده

- وبناءً عليه

- إحنا عايزين زيادة في المرتب

صمت مكرم قليلاً ثم أردف

- يعنى أنت بتطالب بزيادة للناس القديمة ولا لكل الناس
- أنا بطالب بزيادة لكل الناس، بس الناس القديمة بزيادة شوية
ابتسم مكرم

- طب أنتم مش ليكم زيادة سنوية بتأخدوها في معادها
- أيوا، بس العبارة إن المرتب ما بيكفيش حتى مع الزيادة دي
- أفهم من كده إنك عايزني أعمل زيادة استثنائية، مش كده
- أيوا يا باشا
- طب ولورفضت

صمت الرجل قليلاً، ونظر إلى زملائه فتكلم أحدهم
- يبقى الأرزاق على الله

نظر مكرم إلى الرجل ذو الشارب الكث وابتسم مرة أخرى ثم أردف

- شوفوا، أنتم الزيادة السنوية بتاعتكم بتبقى في شهر ٦، وخذتوا زيادتكم
في ٦ اللي فات، وإحنا دلوقتي في شهر ٩، يعنى بيتهيال لو أنا عملت زيادة استثنائية
بأني أديكم الزيادة بتاعت السنة اللي جاية دلوقتي، وترجعوا تزيدوا تاني في شهر ٦،
يبقى أنا كده عملت اللي عليّ

نظر العمال إلى بعضهم في محاولة للتفاهم بلغة العيون، ثم نطق الرجل ذو

الشارب الكث

- تبقى كفيت ووفيت يا باشا

ابتسم مكرم مرة أخرى

- وبالنسبة للقدام فأى واحد شغال في المصنع بقى له أكثر من ٥ سنين

ليته ظل سرا

هياخذ ٢٠٠ جنيه زيادة على مرتبه

هز العمال رأسهم إيجابا، فأردف مكرم

- بس بشرط.....تنزلوا تبلغوا زمايلكم بالقرارات دي، وتبدأوا الشغل فورًا،

واللي حصل ده مايتكررش تاني، وأي طلبات ليكم بعد كده هتخلوا

وأشار إلى الرجل ذو الشارب الكث

- اسم الكريم إيه

- ماهر

- ماهر هيبقى المسئول إنه يبلغ طلباتكم للسيد المدير، والسيد المدير

هيبلفها لي.....اتفقنا

- اتفضلوا على شغلكم

خرج الثلاثة من المكتب، فوجه مكرم كلامه إلى المدير

- نفذ اللي أنا قلت عليه ده لو سمحت، وأي حاجة تحصل بلغني بيها

- بس يا فندم ال...

- من غير بس، أي حاجة هتحصل أنا المسئول عنها، وعايذك تجيبلي الملف

بتاع ماهر ده، وكمان ملفات كل الناس اللي إتعينت هنا في المصنع خلال السنة اللي

فاتت

قام مكرم من مكانه بعد جملته الأخيرة، وقام مراد أيضًا

- أنا مضطر أمشى دلوقتي عشان مش فاضي

خرج مكرم و مراد معًا من المصنع، ركب مراد إلى جانب مكرم في السيارة .

لا حظ مكرم أن عيون مراد تحمل كلاما

- إيه عايذ تقول إيه

ليته ظل سرا

- أنت عملت كده ليه
 - قولى وجهة نظرك وأنا أشرح لك
 - بالطريقة دي كل ما العمال يحبوا يعملوا حاجة هيعملوا إضراب ويوقفوا
 لنا الشغل، وهنفقد السيطرة على المصنع.

رد مكرم بهدوء

- تفكير سليم

اندهش مراد من رد مكرم

- أنت هتجننى، ولما هو سليم عملت كده ليه

- ماهر ده مزقوق عليّ، في حد دافع له فلوس عشان يعمل كده، ولو كنت
 رفضت طلباتهم، كانوا هيستمروا في إضرابهم، وكانوا هيزودوا الضغط عليّ، وكنت
 هضطر في الآخر إني أوافق، لأن اليوم الواحد عطلة بيخسرني كتير جدًا، فما كانش
 قدامي غير إني أوافق بأقصى سرعة، عشان ما أخسرش كتير، وفي نفس الوقت
 العمال يحسوا إني معاهم وفي صفهم
 - طب ولو عملوها تاني

- لو حصلت تاني مش هتبقى في وقت قريب، حجم الزيادة اللي خدوها
 هيجلبهم يشتغلوا، ومش هيفكروا يعملوا إضراب إلا بعد فترة طويلة، والأسباب اللي
 أدت للإضراب ده مش هتكون موجودة
 - قصدك ماهر

- أكيد، أنا خليته المسئول إنه يبلغ المدير، عشان مع الوقت هشتريه، وبعد
 ما أشتريه هفضحه قدام زميله إنه بيتباع، وساعتها هأقدر أمشيته من غير قلق،
 وكمان أثبت إن الاضراب ده كان لعبة هو قابض تمنها، إنما لو كنت عملت كده

النهارده كانوا هيخلوه بطل قومي

- طب أنا كده فهمت أنت طلبت ملفه ليه، طب ليه طببت ملفات اللي

إتعينوا في المصنع في السنة الأخيرة

ابتسم مكرم ابتسامة خفيفة

- لأن أكيد اختيار ماهرده ماكانش عشوائي

- يعنى إيه

- يعنى في حد بيشتغل في المصنع هو اللي رشح ماهر للي دفعوا له، وهما

طلبوا منه إنه يختار لهم حد تكون شخصيته قوية، ويقدر يقنع العمال باللي هما

عايزينه، وفي نفس الوقت يوافق يتعامل معاهم، عشان كده في حد من طرف

الناس دي إتعين في المصنع، وأكيد تعيينه كان قريب، فعشان كده طلبت الملفات

دي

هز مراد رأسه إيجاباً، ونظر إلى مكرم نظرة كانت تحمل احتراماً وتقديراً بل

ربما إعجاب...هي بالفعل إعجاب

كانت تلك رنة هاتفه التي اعتادها، لكنه لم يعتادها في هذا الوقت المبكر من

الصباح، غالباً ما تكون تلك المكالمات الصباحية المبكرة أو الليلية المتأخرة لا تدعو

للتفاؤل، فهي في أغلب الأحيان اما مشكلة يجب عليك حلها في التو، أو مصيبة

يجب إخبارك بها في التو أيضاً

نهض مكرم من فراشه، وأمسك بالهاتف، إنه رقم عميد الكلية، ابتسم

مكرم لأنه يعلم ما سيدور في هذه المكالمة.

- ألو

- صباح الخير يا دكتور مكرم

ليته ظل سرا

- صباح النور يا فندم
- في الحقيقة أنا بتصل بيك في الوقت ده عشان أبشرك
- خير يا دكتور
- البننت اللي كانت متهماك، جت لمكتبي النهارده الصبح، وقالت إنها كذبت في اتهامها ليك، وإنها عملت كده لأنها بتحقد عليك مش أكثر، وإنها بتعتذرلك عن اللي عملته، بس طبعا القانون قانون وأنا خدت قرار فوراً بفصلها من الكلية.
- طب ولو أنا قبلت اعتذارها
- نعم!!!!!!!
- بقول لحضرتك لو أنا قبلت اعتذارها
- يبقى كل حاجة انتهت
- يعنى ما تتفصلش
- أيوا
- خلاص أنا قبلت اعتذارها
- ارتبك العميد قليلاً، وتوقف الكلام لديه
- فأكمل مكرم
- بس الحقيقة أنا عايز اعتذار من الجامعة
- إيه!!!!
- اعتذار رسمي من الجامعة، ورد شرف ليا، وفي كل الجرايد اللي اتنشر فيها الخبر قبل كده وبنفس الحجم
- أيوا يا دكتور بس أنت عارف إن ده صعب
- يا دكتور أنا شخصية عامة، و خبر وقفى عن العمل إتشر في الجرايد،

ليته ظل سرا

- أظن إنه من حقى إن الجامعة تعتذرلى عن اللي حصل.
 - مش ممكن الموضوع ينزل في صيغة اعتذاريا مكرم، بس أنا ممكن أحاول
 أخليهم ينزلوه كتهنئة
 - البركة في حضرتك يا دكتور، أنا اللي يهمني إن خبر البراءة ينزل من الجامعة
 نفسها، زي خبر الوقف عن العمل
 - حاضر يا دكتور مكرم، هشوف هقدر أعمل إيه وأبلغك.



- عرفت اللي حصل يا باشا
 قالها جلال للرجل الجالس خلف المكتب
 - إيه اللي حصل يا جلال
 - مكرم رجع الكلية تاني، والخبر منتشر في كل حطة
 رد الرجل في هدوء
 - وأنت متضايق ليه
 اندهش جلال من ردة فعله
 - يعنى إيه يا باشا
 - يعنى أنا كنت متوقع إن ده يحصل، وكان توقعي في محله، إحنا قدام
 شخص مش سهل يا جلال، بالعكس إحنا قدام واحد زكى جداً، وبيعرف يلاعبنا
 حلوا أوي
 - عندك حق، ده حتى المفك بتاع المصنع، خلص منه بسهولة ابن اللدينة.

- وبالطريقة دي مكرم يبقى تقريبا انتصر علينا في كل حاجة، لأننا كل ما بنحفر له حفرة بيردمها
- طب والعمل يا باشا
- العمل إننا نحفر له حفرة غويطة، وما بتتردمش
- إزاي
- أنا هقولك إزاي



- رن هاتف المكتب
- أيوا يا مراد
- مكرم في واحدة عايزة تقابلك
- واحدة مين
- بتقول إنك عارفها معرفة شخصية، وإن هي مش هتقول هي مين غير قدامك

- طب خليها تدخل يا مراد
- فتح مراد الباب لتدخل فتاة، وجهها يميل إلى السمرة قليلاً، عيناها التي تحملان لونًا عسليًا فاتحًا، جسدًا ممتلئًا بعض الشيء، كل هذا يترين بشعر أسود و ناعم.

لم يراها مكرم من قبل إلا من خلال المحاضرات التي لم ينتبه لشكلها فيها، جلسات التحقيق التي لم تبدأ، والمواجهة التي رفضها هو في مكتب العميد، كل هذه أسباب تجعله لا يعرف شكلها، لكنه بالطبع رآها في الصور التي التقطت لها في

البار، لكنه في الأخير اصطنع أنه لا يعرفها

- إتفضلي اقعدي

جلست الفتاة أمامه

- خير

- حضرتك مش عارفي

- مش أخذ بالي

- أنا حسناء

- حسناء مين؟

تلجلجت الفتاة في الكلام قليلاً

- حسناء ال ال اللي... اتهمت حضرتك بالتحرش في الكلية

نظر لها مكرم نظرة لا تحمل أي نوع من المشاعر، لكنه فقط ثبت نظره

عليها، لم ينطق بكلمة واحدة، فأردفت هي

- أنا كنت جاية لحضرتك عشان أشكرك على اللي عملته معايا، وأنا والله

العظيم ما عملت كده إلا عشان الحوجة، أمى عيانة وبتحتاج دوا بقدر كده كل

شهر، والمبلغ اللي اتعرض عليّ مفيش واحدة في ظروف ترفضه، أنا عايزة حضرتك

تسامحني.

لم يعلق مكرم أيضاً، فقط ظل مثبتاً نظره نحوها بنظرة لا تحمل أي لون

من ألوان المشاعر، فاضطرت هي لإكمال الحديث

- حضرتك سامعني؟! -

هزم مكرم رأسه إيجاباً، فأردفت وقد بدأت الدموع تنساب من عينها

- والله العظيم يا دكتور أنا تبت خلاص، و سيبت البار، والوظيفة اللي

حضرتك جبتهاالى بشتغل فيها، وبثبت فيها نفسى على قد ما بقدر، وأنا جاية النهارده
مش طالبة من حضرتك غير إنك تسامحنى، ويجد أنا مش عارفة أشكرك إزاي على
اللي عملته معايا، أنا أسفة بجد
انهارت حسناء في البكاء، فأخرج مكرم منديلاً ورقياً من العلبة التي أمامه،
وأعطاه لها

- شكراً يا دكتور

مسحت حسناء دموعها، وهنا نطق مكرم للمرة الأولى

- خلصت كلامك

ردت الفتاة وهي ما زالت تبكي

- أيوا

- اطلعي برة

اتسعت عينها، احمر وجهها، بدأت قطرات العرق تخالط الدموع

قامت من مكانها، ازداد بكائها، انطلقت ناحية الباب بسرعة

تمنت لو انشقت الأرض وابتلعتها، أي موقف فعله فيها هذا الرجل، لو قتلها

بسكين صدأة ملقاة في مكان خرب منذ آلاف السنين لكان أهون من هذا الموقف.

لكنها تفهم ما يشعر به، تعرف شعور الظلم، تدرى لماذا فعل هذا، لكنها لم

تكن لتأتى هنا إلا لأنه أعطاها مبلغاً كبيراً مع هذا الرجل الذي أرسله لها، وفرلها

عملاً حلالاً في شركة إحدى أصدقائه، بالإضافة إلى العلاج الذي أرسله لوالدتها

والذي وعد أن يرسله كل شهر

لكنه في النهاية بشر، لديه طاقة في التسامح، هناك مشاعر لا يستطيع

تجاوزها، وأسوار عفو لا يقدر على تسلقها

ليته ظل سرا

لم ينته ذلك الفيلم الأمريكي بعد، نعم من الممكن أن تمل من أحد الأفلام الهوليدية، هذا عادي، لا يمكن إنكار أنهم أصحاب السينما الأولى في العالم، لكن هذا لا يمنع من أن لديهم بعض الأفلام الهابطة أيضًا.

الساعة اقتربت من الثالثة فجراً، هذا الفيلم لا يريد أن ينتهي بعد، لكنه اقترب من النهاية، مكرم يتشاءب كل ثلاث دقائق تقريباً، حل الإنهاك بجسده.

فليحترق هذا الفيلم ولتحترق هوليوود بأكملها

قرر مكرم أن ينهي هذا الهراء ويتجه إلى سريره

وضع جسده على السرير

لامست ذرات الراحة أطراف أصابعه

إنها أفضل خمس دقائق في اليوم بالتأكيد

رن هاتفه

من هذا الأحمق الذي يتصل في هذا التوقيت

تباً لجميع المكالمات المتأخرة والباكرة.

إنه رقم غريب

ربما يكون أحدهم في ورطة حقيقية.

- ألو

- دكتور مكرم ياسين معايا

- أيوا

- أنا بكلم حضرتك من مستشفى التاج، دكتورة ليلي و دكتور خالد لقوهم

مرميين على الطريق في حالة حرجة جداً، وهما دلوقتي في العناية المركزة

نمض مكرم من مكانه مسرعاً، وصرخ في وجه محدثه

ليته ظل سرا

- أنا جاي حالا
- أغلق مكرم الهاتف، وارتي ملابسه بسرعة، واتجه إلى المستشفى
- وصل مكرم إلى المستشفى
- سأل موظفة الاستقبال فأخبرته برقم الغرفة التي يقبعان فيها
- توجه مكرم إلى الغرفة فوجد الطبيب أمامها
- طمني يا دكتور
- إحنا عملنا اللي علينا يا دكتور مكرم، بس للأسف
- صرخ مكرم في وجهه
- للأسف إيه
- دكتور خالد...تعيش أنت
- اتسعت عينا مكرم، ونطق بصعوبة
- طب وليلى
- ابتلع الطبيب ريقه
- مسألة وقت
- وضع مكرم يده على كتف الطبيب
- أمسك الطبيب بيده، وأجلسه على الكرسي الموجود أمام الغرفة
- جلس مكرم، وقد انهمر في البكاء
- وضع كلتا يديه على رأسه
- صمت الطبيب تمامًا احترامًا لحالته
- ظلا هكذا لثلاث دقائق تقريبا، تكلم مكرم بعدها.
- ممكن أشوفها

ليته ظل سرا

- طبعًا، منع الزيارة مش هيفيدنا بأي حاجة
 قام مكرم واتجه إلى الغرفة
 ما إن دخل مكرم إلى الغرفة ورأى ما عليه ليلي حتى تدفقت دموعه أكثر،
 وجثى على ركبتيه بجانبها

يسمع مكرم صوت جهاز القلب، وهذا يعنى أنها لم تفارق الحياة بعد
 أمسك مكرم بيدها وقبلها
 بدأ يتكلم وهو يعلم أنها لن ترد عليه أو ربما حتى لن تسمعه
 - ليلي...أنا مكرم يا ليلي
 ازداد بكائه مرة أخرى، خرجت كلماته بصعوبة أكبر
 - والله العظيم لأجيب لك حقك.....والله العظيم لأجيب لك حقك...بس.. بس
 أنتِ مش هتسيبيني لوحدي صح...ليلي أنا ماليش حد غيرك
 عاد مرة أخرى للبكاء، يمسك بيدها ويقبلها من جديد.
 فجأة.....

يسمع صوتا يخرج منها
 إنها تحاول أن تتكلم
 صوتها يخرج بصعوبة، لكن ما تقوله غير مفهوم
 أمسك مكرم بيدها
 - ليلي...ليلي ليلي، أنا مكرم يا ليلي، أنا مكرم
 - مكرم

الآن بدأ صوتها يتضح

- أيوا مكرم أخوكِ

ليته ظل سرا

خرج صوتها مجدداً

- أحمد يا مكرم

- أحمد في عينيا يا ليلي، أحمد في عينيا، وأنا وأنتِ هنريه مع بعض،

وهيكبر قدام عينينا، وهيبقى ج....

خرج ذلك الصوت الذي يدل على توقف دقات القلب

نظر مكرم إلى شاشة الجهاز فإذا به الخط مستقيماً

تثبتت عيناه ناحية الجهاز، وانفتح فمه قليلاً

ضغط على يد شقيقته أكثر.

خرج صوت نحيبه، أخذ يردد دون توقف مع البكاء

- ليلي...أنا مكرم يا ليلي...أنا مكرم يا ليلي.

قد يقف عقلك أحياناً امام المواقف التي تتكرر بشكل مستمر، أمام نفس

الأحداث التي تعاد بكل تفاصيلها، نفس الوجوه، نفس الكلام، كل شيء طبق

الأصل.

يقف مكرم على باب صوان عزاء شقيقته ليلي وزوجها خالد، خالد الذي

كان بجانبه منذ شهور قليلة في عزاء والده، الآن يقف مكرم ليتلقى عزاءه، هذه هي

سنة الحياة، وتلك هي حكمة الله، جثامين تشيع جثماننا، ثم تأتي جثامين أخرى

لتشيع جثمان الذي قد شيع عدة جثامين من قبل، الدائرة لن تغلق، إلا عندما

تفنى الأرض وما عليها

تتكرر الكلمات، تتكرر برقيات العزاء في الجرائد، المرة الثالثة في ظرف شهور

قليلة والده ثم نهلة ومن ثم ليلي وخالد.

أصبح مكرم وحيداً حرفياً، لم يعد له أي أصول، ولم يكن له أصلاً فروع،

ليته ظل سرا

- الزهرة التي تبقى وحيدة في الأرض تموت، مهما كانت العناية بها
 بعد خروج الناس جلس مكرم على باب الصوان، لم يكن بجواره سوى مراد
 الذي حاول تدارك الموقف الذي لا يمكن تداركه بأي أنواع مواساة
 - البقاء لله يا مكرم
 لم يرد مكرم، تجمدت عيناه، وانطلق فكره في عوالم أخرى
 وضع مراد يده على رأس مكرم
 ظل مكرم صامتاً، ولكنه تكلم في الأخير، تكلم بصوت خرج مخنوقاً، كمن
 ينادى في مكان مغلق، لا يسمعه من في الخارج
 - أنت عارف يا مراد الصوان ده اتنصب كام مرة في السنة الأخيرة دي
 - عارف طبعاً... تلت مرات
 - بالطبط... تلت مرات... التلت مرات دول، حولوني من إنسان عنده عيلة،
 لإنسان مقطوع من شجرة، أبويا، وبعدين مراتي، وأخيراً أختي و جوز أختي
 - أنت تحملت كتير أوي يا مكرم
 - ولسه... لسه يا مراد اللعبة ما انتهتتش، بس الموازين اتقلبت
 اندهش مراد من الكلام الذي يقوله مكرم
 - لعبة إيه، وموازين إيه
 - هقولك على كل حاجة بس في الوقت المناسب
- يجلس الضابط الذي يتولى قضية ليلى في مكتبه، وفي المكتب المجاور له
 يجلس زميله الذي يعاونه في القضية الذي بدأ بالكلام
 - الخيوط متشابكة في القضية دي يا باشا، لحد دلوقتي مقدرناش نوصل

لأبي حاجة، يعني إيه اثنين كانوا ماشيين بعريبتهم يطلع عليهم ناس و يقتلوهم بطريقة ما نعرفهاش غير بعد التشريح، بعد كده نكتشف إن في حد هو اللي مسلمهم، طب هو مين الراجل ده، ومين الناس دول، وعملوا كده مع خالد وليلى ليه

- ع العموم أنا بعنت لدكتور مكرم، أخو المجنى عليها يمكن يقدر يفيدنا
- على ما يبجي بقى يا باشا، نكون شربنا لنا كويتين قهوة، لأحسن دماغي
هتفجر من الصبح بسبب القضية دي

حضر مكرم إلى قسم الشرطة، جلس أمام الضابط الذي بدأ بسؤاله

- أولاً يا دكتور، البقاء لله

- الدوام لله

- طبعاً يا دكتور أنا أسف إنني بعنت لحضرتك في الظروف دي، بس مكنتش

أقدر أتأخر، حضرتك عارف إن دي إجراءات ولازم تكمل

- أنا متفهم ده

- جميل، دكتور مكرم أحمد ابن أخت حضرتك واللي كان معاهم في العربية

وقت الحادثة، قال إن والده ووالدته كانوا رايعين عزومة عشا عند واحد على حد

قوله اسمه زكريا، حضرتك تعرف حد بالاسم ده؟

- لا

- اممم، وبعد ما فتشنا في موبايل دكتور خالد لقينا فيه فعلاً رقم باسم

زكريا، مكلمه ٣ مرات قبل الحادثة مباشرة، وهو آخر رقم كلمه، لكن طبعاً إحنا

لقينا الخط ده مش مسجل، وبتبعه لقيناه مقفول

لم ينطق مكرم فاستطرد الضابط

ليته ظل سرا

- ولما سألتنا أحمد عن زكريا ده، قال إنه راجل كان ساكن في الشقة اللي قدامهم، وإن هو كان عازم دكتور خالد و دكتورة ليلى على العشا، بمناسبة إنه إتنقل للشقة الجديدة، و اللي فهمناه من كلام أحمد إن الراجل ده كان مرة عيان أو وقع على الأرض على حد تعبير الطفل طبعًا، وإن دكتور خالد و دكتورة ليلى هما اللي أنقذوه

نطق مكرم بصوت أصابته البحة

- بس الموبايل المقفول، وعدم ظهوره من بعد الحادثة، بيدل إن دي جريمة كاملة وإن زكريا ده أحد أضلاعها، ده لو كان اسمه زكريا أصلًا

- هو فعلا ما اسموش زكريا

- وحضرتك عرفت إزاي

- لما روحنا لصاحب الشقة اللي كانت قصاد شقة دكتور خالد و دكتورة

ليلى، وسألناه عن الراجل ده، إدانا صورة بطاقته

- وطبعًا طلعت مزورة

- طبعًا،دكتور مكرم هو حضرتك بتتهم حد بقتل ليلى و خالد

- أهزكريا

صدم الضابط من ردة فعل مكرم، فرد

- أفندم

- واضحة يا حضرة الضابط، زكريا ده سلم رقبة أختي و جوزها لحد، بس

هو مين....معرفش

- طب هما كان ليهم أي أعداء

- أبدا، ليلى وخالد طول عمرهم في حالهم، دكاترة محترمين، بالعكس ده كان

في ناس كثير بيحبوهم لأنهم كانوا بيعملوا خير كثير

- تقرير الطب الشرعي يا دكتور مكرم بيقول إنهم لما اتهم على عربيتهم تم حقنهم بمادة الأتروبين، والمادة دي على حسب التقرير الجرعة الزيادة منها هي اللي أدت للوفاة بعد ما حصل لهم اختناق، وده اللي خلاني أشك ان اللي عمل كده دكتور

- أنا بأكد لحضرتك إنه مش دكتور، ليلي و خالد طول عمرهم محبوبين من زميلهم

- يعنى حضرتك ما بتهمش حد؟

- لا يا فندم

- هل لديك أقوال أخرى يا دكتور مكرم

- لا يا فندم

كانت تلك الكلمة التي قال بعدها الضابط (و أغلق المحضر في ساعته و

تاريخه) ثم وقع مكرم على أقواله التي بدا مقتنعا تمامًا بها

خرج مكرم من قسم الشرطة دون أن تكون له أي نية للبحث عن هذا المدعو زكريا الذي لم يكن لديه أدنى شك أنه رسول تلك المجموعة التي تزحف خلفه و تضيق عليه حياته من أجل تنفيذ رغباتهم، التي يبدو أنه لم يعد منها مفر. يشعر مراد بصداع في رأسه، يتحمل مسئولية كل شيء حتى يعود مكرم، ولكن يعود من أين، لا يعلم مراد أين يكون مكرم الآن، لكنه مضطر لتحمل مسئولية المجموعة

هذه المرة طال غيابه أكثر من المرة السابقة، فبعد وفاة نهلة اختفى مكرم

تمامًا لمدة ثلاثة أيام لكن هذه المرة قد تجاوز الأسبوع.

- يرن هاتف مراد فجأة
 - إيه يا مكرم أنت فين يا أخي
 - معلش يا مراد، طولت عليك المرة دي شوية، المهم اسمعني كويس أنا
 دلوقتي رايح الجامعة و هرجع على المجموعة، مش عايزك تتحرك إلا لما أجيلك،
 عشان في مواضيع كتير عايز أكلمك فيها
 - ماشي يا مكرم، مش هتتحرك إلا لما تيجي، سلام
 أنهي مكرم كلامه مع مراد، وأكمل طريقه إلى الجامعة
 دخل مكرم إلى مكتب العميد، استقبله العميد بحفاوة، جلس مكرم أمام
 العميد وبدأ بالكلام
 - الحقيقة يا فندم، أنا قلت أجي لحضرتك قبل ما العام الدراسي يبدأ
 عشان أبلغ حضرتك بقراري
 اندهش العميد من كلامه
 - قرار إيه يا دكتور مكرم
 - أنا هقدم استقالي من الكلية يا دكتور، وده قرار نهائي.
 - لو ده قرارك النهائي يا مكرم، أنا مش هضغط عليك، طالما أنت درست
 القرار كويس، ربنا يوفقك
 - شكراً يا دكتور، أنا كتبت الاستقالة، مش باقي غير توقيع حضرتك.
 أخرج مكرم الاستقالة من جيبه ووضعها أمام العميد
 - إتفضل يا فندم
 قال العميد وهو يوقع على الاستقالة
 - والله يا دكتور مكرم يعز عليّ إني أوقع على الورقة دي، بس للأسف واضح

انك مستحيل تتراجع

ابتسم مكرم بجانب فمه ابتسامة تدل على السخرية، فهذا الرجل الذي يزين له المديح اليوم، هو ذاته الذي حوله للتحقيق من عدة أشهر وهو يثق تمامًا أنه مظلوم، إنها دنيا المصالح ولا شيء سواها

- متشكر يا دكتور، و إن شاء الله الزميل اللي يمسك المواد بتاعتي يبقى

أحسن مني

نهض مكرم من مكانه

- أنا مضطر أستأذن عشان عندي شغل كثير في المجموعة

- مع السلامة يا مكرم

خرج مكرم من مكتب العميد وركب سيارته متجها إلى المجموعة

في منتصف الطريق وجد هاتفه يرن:

إنه.....إنه...جلال

- كنت عارف إنك هتتصل

ضحك الرجل بصوت مرتفع

- طول عمرى مراهن على ذكائك يا دكتور مكرم

- المرة دي أنا لا هتعصب ولا هتفرز، أنتم خسرتوني كل حاجة، وأنا بقى

قررت قرار أنت نفسك فيه من زمان

- لا....ما تقولش

- لا هقول، اللي ما يقدرش يقف قدام الريح يوطى لها، أنا قررت أشغل

معاكم

الفرع عديم الأصول يكون فرعا مائلا، معوجا، يحتاج إلى تقويم، إذا خرج

من دون أن يكون متمسكا بأصل، فحتمًا سينكسر.

عندما تفقد جدك، و من بعدها والديك، لا يصبح لك في الدنيا إلا عمك و خالك، وإذا رأيت مشهد وفاة والديك أمامك، و كان كل هذا وعمرك لم يتجاوز العاشرة بعد، فلن تستطيع أن تكمل حياتك بصورة طبيعية، ذاك الطفل الذي يمرح و يلهو و يتلاعب بفقاعيق الهواء لن يكون أنت، ولن تكون ذاك الذي يشاهد أفلام الرسوم المتحركة و ينتظرها و يعرف مواعيدها بدقة، و لن تكون هذا الذي يشترى لعبة الرجل العنكبوتي أو الرجل الوطواط وهو يرى أنه سيكون مثل هذا البطل الخارق في المستقبل

أنت غالبًا ستكون ذاك الطفل المنعزل، الحزين، المتوارى عن أعين الناس معظم الوقت

إن لم تكن هكذا دائمًا فعلى الأقل ستكون على تلك الصورة لبعض الوقت أحمد يذهب إلى المدرسة كأى طفل، يكتب واجبه المدرسي كأى طفل، ينام مبكرًا و يشرب اللبن (رغمًا عنه) كأى طفل، لكنه لا يضحك ولا يلعب ولا يحلم بمستقبله الباهر كأى طفل

منذ وفاة والديه وهو يقبع في منزل عمه أحمد سلطان (الذي كان سبب تسميته بهذا الاسم)، اختفى خاله مكرم فجأة دون سابق إنذار، ولم يظهر حتى الآن عمه أحمد يعامله على أفضل وجه، لا يؤخر عنه طلبًا، يوفر له كل سبل الرعاية اللازمة، لا يضايقه، ولا ينهره، ولا يسبب أي نوعًا من أنواع الضغط عليه، بل على العكس تمامًا، يعامله بكل لطف و حنية، ويفضله حتى على أولاده.

لا يشعر أحمد بالغربة في هذا المنزل، لكنه في ذات الوقت، يحب خاله مكرم أكثر، يشناق إليه كثيرًا، يعلم أنه ربما يلقى معاملة أقل في منزل مكرم، لكنه يفضل

المكوث بجواره، هو دائماً يشعر أنه أقرب إلى عائلة ياسين منها إلى عائلة سلطان،
ذاك الشعور الخفي الذي يحرك الطفل إلى احدى عائلتي والديه أكثر من الأخرى
دون مقدمات أو أسباب

ظل كثيرًا ينتظر تلك اللحظة التي يأتي فيها خاله مكرم ليصطحبه فيها إلى
منزله، ويبدو أنه قد حان وقتها

لم يكن مكرم ياسين شخصيًا الذي حضر إلى منزل عمه، لكنه قد كلف مراد
بمهمة اصطحاب أحمد إلى القصر

عندما حضر مراد إلى منزل أحمد سلطان و جلس معه، وجه إليه الشكر
بالنيابة عن مكرم، وطلب منه أن يصطحب الطفل معه، لكنه تفاجأ بالرد

- أحمد مش هيسيب بيت عمه يا مراد

- يا أحمد بيه أنا ماليش علاقة بالموضوع أنا مكرم طلب مني إني أجي أخدم

الولد، وأنا بنفذ كلامه وبس

- وهو ماجاش ليه بنفسه

- هو مشغول جدًا فوق ما تتصور الفترة دي، وعشان كده وكلني إني اخد

الولد

قال أحمد سلطان وقد على صوته

- مشغول.....مشغول عن ابن أخته، كان مختفى فين الفترة اللي فاتت،

طبعًا ولا كان فارق معاه، ودلوقتي لما افتكرانه له ابن اخت جاي يأخذه، لا يا مراد

ده بعده

- أنا قتلتك دي حاجة بينك وبينه، أنا دلوقتي جاي أخدم الولد وبس

- ولو قتلتك مفيش ولد

- يعنى إيه

- يعنى ده أحمد خالد سلطان، وده بيت عمه اللي هو متسى على اسمه، لما ببقى اسمه أحمد ليلي ياسين ببقى بيعى يأخذه.

رد مراد بنبرة هادئة

- ماشي يا أحمد بيه، ما على الرسول إلا البلاغ، أنا هبلغ مكرم بالكلام ده
- شرفت يا مراد.

التنازل الاول يجز خلفه تنازلات كثيرة، كالقطرة الأولى من السيل يتبعها ملايين القطرات، كم من شخص تراكمت عليه واجباته لمجرد انه فرط في ميعاد الواجب الأول، كم من قائد خسر حربيا بسبب تنازله الأول، حتى في أمور الزواج إذا تنازل أحد الطرفين عن حق من حقوقه يوما يضغط الطرف الآخر عليه فتزيد التنازلات مع مرور الزمن، ويبقى السؤال ما الذي يجبر شخصا ما للتنازل عن مبدأ أو فكرة أو عقيدة، أهي ضغوط الحياة التقليدية اليومية، لو كان هذا هو السبب لما ثبت إنسان في تاريخ البشر، أم هي ضغوط غير تقليدية، تلقى على كاهل هذا المتنازل في ظروف غير عادية، فتضطره إلى التنازل، لأن الثبات وقتها يعنى الانتحار.

تغير نمط حياة مكرم بعد القرارات الأخيرة، لم يكن في مخيلته يوما أن يتخذ مثل تلك القرارات، حبه الشديد لدراسته و تفوقه فيها جعل من التدريس في الجامعة متعة لها مذاق خاص، لم يكن ليتخلى عنها لولا أحلك الظروف.

الانخراط في إحدى التجارات المشبوهة كان أبعد ما يكون عن مخيلته، حتى لو كان سيجعله أغنى شخص على وجه الأرض.

هل تلك نظرية جديدة في علم النفس سيعود ليلقيها على مسامع تلاميذه

يوما ما.

سيخبرهم أن الضغوط الغير طبيعية على أي إنسان مهما كانت صلابته ستجعله ينهار، سيحكي لهم أن المواد الصلبة تحت ضغوط غير عادية يمكن أن تغير سلوكها، المواد التي لا تحمل قلبا تجرى فيه دماء و تغذيها المشاعر، فما بال الإنسان.

العالم الملائكي لا وجود له، عندما تخسر كل شيء يمكن البكاء عليه، يمكن أن ترتكب أي فعل دون النظر إلى أصله في شرع أو عرف، يمكن أن تتحول من ذاك الطيب الخلق، إلى ذاك الشيطان العاثر.

يدخل مراد على مكرم وتبدو على وجهه علامات الضجر

- خير يا مراد

- أحمد رفض يديني الولد يا مكرم

رد مكرم في هدوء غير متوقع

- رفض إزاي يعنى

- قالي إنه اسمه أحمد خالد سلطان يعنى لازم يعيش في بيت عمه لما يبقى

إسمه أحمد ليلى ياسين يبقى ييجى مكرم يأخذه

هز مكرم رأسه دون أن يبدو عليه شيء، ثم أردف

- سيبك منه دلوقتي هفوق له بعدين، المهم يا مراد أنا عايزك في موضوع

مهم

- خير يا مكرم

- الكلام اللي أنا هقوله لك دلوقتي أنت تالت واحد تعرفه، وثاني واحد حي

عارفه دلوقتي، الكلام ده هو أكبر سر في حياتي، و بمجرد معرفتك بيه أبقى أمنتك

على حياتي

- أقولك على حاجة يا مكرم وما تستغربش

- قول

- أنا كنت عارف إن اللحظة دي هتيجي، وكنت مستنمها، حاسس بيك بقالي
كثير بس مكنتش حابب أضغط عليك عشان تتكلم، لأنى كنت واثق إنك كنت
مسيرك هتقول

- طول عمرك فاهمني يا مراد

- ودلوقتي بقى احكي لي كل حاجة بالتفصيل

بدأ مكرم بسرد القصة من أولها، بداية من اللقاء الأول بينه وبين جلال،
مرورا بكل الحوادث التي تبعته، وصولا إلى قراره بالعمل معهم
وعندما أخبره مكرم بقراره انتفض مراد من مكانه

- أنت هتعمل كده فعلا يا مكرم

- معنديش حل ثاني يا مراد

- في حلول كثير، ممكن مثلا نبلغ البوليس

- نبلغ البوليس بإيه، أقولهم في واحد اسمه جلال بيقولي إن أبويا كان تاجر

هيروين وعايزنى أشتغل معاه مكان أبويا، عندكم فكرة عن الموضوع ولا لا

بدا مراد مقتنعا بكلام مكرم مع تحفظه عليه بكل تأكيد

- طب و أنت هتعمل إيه دلوقتي

- أنا طلبت إني أقابل الكبير بتاعهم عشان نتفق على تفاصيل العملية اللي

هما بيقولوا إن أبويا كان متفق معاهم عليها

- وبعدين

- ولا قبلين، أقعد بقى واهدى عشان أقولك هنعمل ايه.

منذ ذاك الإضراب الأخير لم يحضر مكرم إلى هذا المصنع إلا اليوم، زيارته كانت مفاجئة، لم يعلم حتى مدير المصنع نفسه بقدمه، دخل مكرم إلى المصنع تفقد العمل وحال العمال، تحدث معهم حول العمل وسير الإنتاج، وكان الكلام كله إيجابياً، ولا يخلو طبعاً من بعض المجاملات

بعد أن أنهى مكرم جولته داخل المصنع صعد إلى مكتب مدير المصنع، جلس معه لتفقد الحسابات في الفترة الأخيرة، ومراجعة بعض الأمور.

بعد إن انتهوا إرتكن مكرم إلى كرسيه ووجه كلامه إلى المدير.

- قولي.....هو في حد من العمال عندنا مشى بعد موضوع الإضراب ده

اندهش المدير من السؤال

- في واحد بس يا فندم

- واسمه إيه الواحد ده؟

هذا السؤال كان مدهشاً أكثر

- اسمه عبد العال يا فندم

- عبد العال الحسيني مسعد...مش كده

هنا تذكر المدير أنه أعطى ملفات العمال الذين تعينوا في السنة الأخيرة و الذي كان عبد العال من بينهم، لكن ما أدهشه أن مكرم يتذكر الاسم الثلاثي لأحدهم بتلك الطريقة

- بالظبط يا فندم هو ده.

تلك الحرب الباردة التي بدأت ولم تنتهي حتى الآن، قالها مكرم في نفسه، كان عبد العال هو رجلهم إذا، بعد أن صار ورقة ليس لها قيمة قاموا بسحبه، هذا يعنى أنهم لا يريدون فعل أي شيء جديد في هذا المصنع، ربما في أحد المصانع

ليته ظل سرا

الأخرى، وربما في مقر الشركة الرئيسي، وربما سحبوا جميع رجالهم الذين زرعوهم في المجموعة بعد قرار مكرم بالعمل معهم

- أنا عايزك تبعت لماهر، ولما يبجي لو سمحت سيبننا لوجدنا شوية
- حاضريا فنندم

قام المدير وطلب من أحد العمال في الخارج أن يطلب من ماهر القدوم إلى مكتب المدير

عندما حضر ماهر، خرج المدير وتركه مع مكرم بمفرده
جلس ماهر أمام مكرم و هو لا يدري لماذا يريد، مكرم يقلب في بعض الأوراق ولا ينظر اليه، تكلم مكرم فجأة وهو ينظر إلى الأوراق

- إزيك يا ماهر

- الحمد لله يا دكتور

- أتمنى تكون مبسوط بعد الزيادات اللي زودتها لكم

- أه طبعًا يا دكتور

- أنت ممكن تسيبننا يا ماهر

- ما يتهيأليش يا باشا، أنا مرتاح هنا أوي

- بس أنا يتهيألى

تغيرت ملامح وجه ماهر

- نعم يا باشا!!

رد مكرم في هدوء بالغ

- بقولك بس أنا يتهيألى

- ليه يا باشا لا سمح الله

- لا أنا مش عايزك تفهم غلط، أنا كل الحكاية هبعثك في المصنع اللي بيشتغل فيه عبد العال
ازداد توتر ماهر أكثر
- عبد العال مين يا باشا لا مؤاخذة؟
ينظر مكرم في الأوراق كما هو
- عبد العال
يرفع مكرم عينيه إلى ماهر
- عبد العال اللي وداك للناس اللي دفعوا لك عشان تقنع العمال يعملوا
إضراب ويوقفوا إنتاج المصنع.
- ناس مين يا باشا، أنا مش فاهم حاجة
- مفيش داعي للف و الدوران يا ماهر، عبد العال بعت رسالة على النت
كاتب لي فيها كل حاجة، فمفيش داعي نلف على بعض
- صمت ماهر ولم يتكلم، فأردف مكرم
- على فكرة أنا مش بلومك، أكيد المبلغ اللي عرضوه عليك كبير، وأنا مش
من بقية أهلك يعنى عشان عملي خاطر...إدوك كام؟
- نظر ماهر إلى مكرم في دهشة، فأردف مكرم
- قول ما تتكسفش، إدوك كام
- رد ماهر في خجل
- ٣٠ ألف جنيه
- رد مكرم بنبرة ساخرة بعض الشيء
- لا بصراحة ليك حق تبيعني، ده تقريبًا مرتب ٢٠ شهر شغل، وفي الآخر إيه

اللي ممكن يوقفك يعني، ضمير، أخلاق، أصول، كل ده كلام فارغ يا راجل بالمقارنة
ب ٣٠ ألف جنيه

صمت مكرم قليلاً، ثم أردف

- شوف يا ماهر انا مستعد أسامحك، ومش كده و بس أنا مستعد أديك ٣٠
ألف تانيين، بس بشرط، تدلني على عبد العال، تكلمه دلوقتي، وتقوله إنك عايز
تقابلة عشان وقعت على معلومات توديني في داهية، قلت إيه:

- أنا تحت أمرك يا مكرم باشا

- طيب كلمه دلوقتي

أخرج ماهر هاتفه، وقام بالاتصال برقم عبد العال

- هي الست دي بتقولك إيه، بتقولك إن الهاتف الذي طلبته ربما يكون
مغلقًا، مش كده

هز ماهر رأسه إيجاباً، فأردف مكرم

- شفت، عبد العال قافل تليفونه، ومشى من المصنع، وأنت مش هتعرف

توصل له

أردف مكرم بلهجة ساخرة

- طب وبعدين يا ماهر أسامحك إزاي دلوقتي

- اديني فرصة يا باشا، وأنا هجيب لك عبد العال

- بس في مشكلة

- إيه

- هو أصلاً ما اسموش عبد العال

اتسعت عينا ماهر

- طب مش حضرتك عندك ملفه

- اتعين ببطاقة مزورة، واحنا مش وزارة الداخلية عشان نعرف

.....تنزل تأخذ بقية حسابك، وتحرص إن أنت ما تقابلنيش مدى حياتك، و

حاول ما تخلينيش أعرف أنت هتشتغل فين، لأنى لو عرفت، تسجيل الجلسة اللي

حصلت بيننا دلوقتي و اللي بيثبت خيانتك، واللي بعد نص ساعة هيبقى على

موبايلات كل اللي شغالين في المصنع، هيبقى عند مديرك، وما يتهميأليش إن حد

هيرضى يشغل عنده خاين.

صمت ماهر وتجمد في مكانه.

- شرفت يا ماهر

قالها مكرم ثم عاد ينظر إلى الأوراق التي أمامه

خرج ماهر من المكتب وهو يجر أذنان خيبته خلفه

بعد خروجه أسند مكرم ظهره إلى المكتب وتهد تنهيدة ارتياح

كانت ليلة مظلمة من أواخر ليالي الشهر العربي، يقترب الليل من انتصافه،

أغلقت معظم المحلات أبوابها، والمواصلات العامة تكاد تكون غير موجودة، لم يتبقى

إلا بعض الكافيهات الفخمة التي لا تغلق أبوابها أمام زبائنها، والمطاعم التي تعتمد

على السهرات والتي تبدأ عملها فعليا في الثامنة أو التاسعة مساء

نظر أحمد من شباك الغرفة التي يقبع فيها متأملا حركة السير في الشوارع،

يراقب حركة السيارات، يتابع الناس الجالسين على المقهى بعينه، لقد اقترب ميعاد

نومه، هولاء يريد أن يذاكر الآن، لقد اكتفى من كل شيء من المذاكرة و اللعب و

الطعام، يريد فقط أن يقضى ما تبقى من يومه في النافذة حتى يشعر بالنوم

عندما مرت تلك السيارة من أمامه اتسعت عيناه فرحا، انتظر قليلاً حتى لا

ليته ظل سرا

تذهب فرحته هباءً، لم يدم انتظاره طويلاً حتى انفتح باب السيارة و خرج منها خاله
مكرم، ما إن رآه أحمد حتى انطلق مسرعاً نحو الصالة حيث يجلس عمه.

- عمو، عمو، خالو مكرم جه

تغيرت ملامح وجه عمه عندما سمع تلك العبارة

- و ماله يا حبيبي يأنس ويشرف

- يااااااه بقى لي كتير أوي ما شوفتوش

ابتسم عمه ابتسامة خافتة

- طب روح افتح له الباب

فتح أحمد الباب ووقف أمامه في انتظار صعود خاله مكرم

وعندما راه لم ينتظر حتى يصعد مكرم إليه، بل انطلق هو باتجاهه، نزل

درجات السلم وارتقى عليه

فتح مكرم ذراعيه لاستقباله، احتضنه مكرم وقبله، و حمله وصعد به

وقف مكرم أمام باب الشقة، وطرق على الباب مستأذناً في الدخول

جاءه الرد من الداخل

- إفضل يا دكتور مكرم

دخل مكرم إلى الشقة، يحمل أحمد على إحدى ذراعيه، و يطوقه بالآخر،

يضع أحمد كلتا يديه محتضنا مكرم، استقبلهم أحمد سلطان.

- نورت يا دكتور

- البيت منور بأصحابه يا أحمد بيه، أنا مش هطول عليك، باختصار أنت

عارف أنا جاي ليه

أنزل مكرم أحمد إلى الأرض

- روح على قوضتك دلوقتي يا أحمد
 - بس أنا عايز أقعد معاك شوية يا خالو
 - لا ما تخافش هنقعد كتير مع بعض
 لم تعجب الجملة الأخيرة أحمد سلطان، شعر بنبرة تحدى في كلام مكرم
 دخل أحمد إلى الغرفة، فبدأ مكرم بالكلام.
 - شوف يا أستاذ أحمد باختصار و من غير لف و دوران، أنا جاي أخذ أحمد
 يعيش معايا عشان أنفذ وصية أمه الله يرحمها، وفي الأول و في الآخر إحنا مفيش
 بيننا غير كل ود و احترام

- يعنى حضرتك جاي تنفذ وصية أمه، طب وبالنسبة لأبوه
 - بيتهيألى لو الميتين كانوا بيتكلموا، كان خالد قالك إنه عايز الولد يعيش

معايا

اشتد غضب أحمد سلطان من جملة مكرم الأخيرة.
 - طب هما ما بيتكلموش، يعنى أنت مش من حقك تقول كلام هو ما قالوش
 - أنا قلت لو، إنما ما قلتش إنه قال كده
 - بيتهيألى أنت سبق و بعنت لي الواد اللي بيشتغل عندك، وأنا بلغته قراري
 - و هو بلغنى، بس أنا جاي لك النهارده بنفسى، وصدقني الموضوع مش

بالعافية

تنهد مكرم تنهيدة خفيفة ثم أردف
 - خلينا نحسبها بالعقل، أنا هقدر أوفر له كل اللي هو عايزه، ممكن أجيب له
 كل اللي نفسه فيه، إنما أنت مهمما عملت مش هتعرف تعمل اللي أنا هعمله، ولا إيه
 اشتد غضبه مرة اخرى

- أنت جاي تهيني في بيتي يا مكرم
 - أنا ما بقولش غير الحقيقة، بس شكل الحقيقة بتزعلك.....خلاص أنا
 هجيب لك من الآخر، إحنا نجيب الولد هنا و نساله، يحب يعيش مع مين،
 وصدقتي لو اختار يعيش معاك أنا مش هطلب حتى إني أشوفه
 ثبت أحمد سلطان عينيه باتجاه مكرم، ولم يتكلم
 ارتفع صوت مكرم
 - أحمد. أحمد
 خرج الولد مسرعًا من غرفته وكأنه كان في انتظار هذا الصوت
 - نعم يا خالو
 - عمك عايز يقولك حاجة
 الآن ألقى مكرم الكرة في ملعب أحمد سلطان، منذ دخوله إلى هذا المنزل، و
 هو يستخدم نظريات علم النفس التي درسها، فبداية التزم بكل الآداب فطرق الباب
 مستأذناً قبل أن يدخل
 ثم بدأ بأولى الأعبية بإعطاء الأمر لأحمد أن يذهب إلى الغرفة لكي يعطى
 الإيحاء إلى أحمد سلطان إلى أن الكلام الذي سيقوله أكبر من أن يسمعه الطفل،
 وعندما قال له أحمد أنه يريد الجلوس معه، رد مكرم بهدوء شديد أنه سيجلس
 معه كثيرًا في إشارة منه إلى انه سيأخذه للعيش معه.
 و عندما بدأ كلامه قال له إنه جاء لينفذ وصية والدة الطفل ليشعره أن
 الموضوع بالنسبة له ليس مجرد حب للطفل، وإنما هي وصية شقيقته.
 قال مكرم هذا الكلام وهو يتوقع بنسبة كبيرة أن الرد سيكون و ماذا عن
 والد الطفل؟

وكان هذا ما أراده، فضرب عصفورين بحجر واحد وقال له أن الموتى لو كانوا يستطيعون الكلام لطلب منه خالد أن يرعى طفله، وهنا فعل مكرم أميين، أولاً زعزع ثقة أحمد سلطان بنفسه لأن أحمد سلطان كان يعلم مدى العلاقة التي كانت بين خالد و مكرم، وثانياً أراد أن يستفزه ليمهد للخطوة التالية

غضب أحمد سلطان، واستمر مكرم في هدوئه المعتاد، وما إن حانت الفرصة حتى استفزه ثانية وأوصله إلى حالة شديدة من الغضب، وما إن وصل إلى هذه الحالة حتى عرض عليه مكرم التحدي الذي لم يجد أحمد سلطان أمامه إلا قبول التحدي و تخيير الولد، وعندما نادى مكرم على أحمد وضع الكرة في ملعب أحمد سلطان، وطلب منه هو تخيير الطفل، حتى لا يقول إذا اختار الولد مكرم، أن طريقة عرض مكرم هي التي أغرت الولد لاختياره.

- أحمد يا حبيبي، تحب تعيش هنا مع عمك وولاد عمك، و مرات عمك اللي بتحبك، ولا تروح تعيش لوحدك عند خالك

و بالرغم من أن طريقة العرض هذه كانت في صالح أحمد سلطان، إلا أن مكرم لم يعقب

اتجه أحمد باتجاه عمه وقبله من خده، وقال له
- أنا بحبك أوي يا عمو، بس أنا مش عايزك تزعل، لأنى عايز أعيش مع خالو

مكرم

احمر وجه أحمد سلطان من أثر الصدمة، بالرغم من أنه كان يتوقعها، إلا أن ساعة الحقيقة لها تأثير أصعب بكثير من ساعات التكهن
ابتسم مكرم ابتسامة خفيفة، شعر بنشوة الانتصار
تحرك الولد باتجاه مكرم و أمسك بيديه، فوجه مكرم كلامه إلى أحمد

سلطان

- أولا يا أستاذ أحمد أنا حابب أشكرك على الفترة اللي أنت راعيت فيها أحمد في غيابي، ثانيًا طبعًا ده إبن أخوك و كمان متسمى على اسمك فأنا تحت أمرك في أي وقت لو حابب تشوف الولد.

- تمام يا دكتور مكرم، وأنا واثق إن أحمد معاك هبقى في إيد أمينة
قال أحمد سلطان جملته الأخيرة، ثم نادى على زوجته وأولاده لكى يسلموا
على أحمد قبل ذهابه مع خاله

سلم أحمد على زوجة عمه وأولادها بحرارة شديدة، وقال لهم (أنا
هستناكم في بيت خالو مكرم ابقوا تعالوا لي)

بعد أن انتهت طقوس الوداع، اصطحب مكرم أحمد معه في اتجاه منزله،
وما إن ركبا السيارة حتى أخرج مكرم هاتفه المحمول، وقام بالاتصال بمراد.

- ألو...أيوا يا مراد، عايزك تشوف لي بودى جارد يكون سنه صغير، وكمان
جليسة أطفال وتكون أنسة عشان تتفرغ لأحمد.

- أفهم من كده إن أحمد معاك دلوقتي

- أيوا معايا، والناس دي عايزهم يكونوا عندي بكرة الصبح

بتواجد مراد إلى جانب مكرم في سيارته، ويتجهان معا إلى ذاك الملهى الليلي
حيث سيلتقى مكرم مع الرجل الذي كان السبب الأول في ما مر به من محن في
الفترة الأخيرة، الرجل الذي رفع الراية الحمراء في وجهه ولم يخفها حتى الآن،
الرجل الذي فكر وخطط وأفسد وقتل

حتى هذه اللحظة لم يكن مراد مرتاحا لما يفعله مكرم، لم يفهم قبوله
المشاركة في مثل هذا العمل، لكنه في النهاية يعزى سبب ذلك إلى حجم الضغوط

التي وقعت على كاهله

عم الهدوء لفترة ليست بالقصيرة حتى جاء صوت مراد

- مكرم أنت واثق من اللي أنت بتعمله ده

- عندك حل تاني

صمت مراد ولم يرد، فأردف مكرم

- شفت بقى إزاي، أنا عارف يا مراد إنك مش عاجبك اللي أنا داخل عليه،

بس أنت مش قادر تتكلم عشان أنت نفسك معندكش حل تاني، المهم دلوقتي ما

تنساش اللي اتفقنا عليه

- مش ناسي، وكل حاجة اتنفذت زي ما أنت عايز بالطبط

- دي أهم حاجة

توقفنا بالسيارة أمام الملهي الليلى، وصلا متأخرين عن الميعاد بعشرين

دقيقة، وهذا الشيء تعمده مكرم

عندما وصلا أمام الملهي وتوقفنا بالسيارة، انتظر مكرم قليلاً قبل أن يفتح

الباب، مما أثار استغراب مراد.

- ياللا يا مكرم في إيه

تردد مكرم في النزول عندما رأى الناس الداخلين والخارجين من الملهي، و

عندما رأى فخامة السيارات الواقفة أمام الملهي، أدرك أن هذا الملهي لا يدخله إلا

أصحاب الطبقة العليا جداً

الناس يدخلون مهندي الملابس، مصففي الشعر، تحملهم اقدامهم، لكن

أغلبهم يدخل في الخفاء، ويحاول ألا يشعر به أحد.

أما الخارجين من المكان، فإما يخرجون فاقدى التوازن من أثر السكر، أو

ليته ظل سرا

يخرج وفي يديه أحد البغايا، أو يخرج كما دخل وهذا قليل جدًا.

- مالك يا عم في إيه

كان هذا مراد

- قرفان....قرفان يا مراد من شكل المكان ده، عمرى في حياتي ما تخيلت إني

أدخل مكان زي ده

نظر مراد إليه نظرة تعجب!!!

- يعنى أنت عمرك ما تخيلت تدخل مكان زي ده، ومتخيل إنك ممكن تتاجر

في الهيروين عادى

ابتسم مكرم ابتسامة وكأنه يسخر من نفسه

- عندك حق..... ياللا بينا

نزلا من السيارة، واتجها إلى الملهي

عندما دخلوا كانت الأجواء غريبة عليهم، الأنوار الزائدة، صوت الموسيقى

الهابطة المرتفع، بعض الدخان، أصوات ضحك الغانيات، إحداهن تتمايل على

المسرح، ورجل كالبغل يلقي عليها نقودا تكفى لإطعام حارة بأكملها

رأه جلال فقام لاستقباله

- يا أهلا وسهلا بدكتور مكرم ياسين

- أهلا بيك

- أنت جاي متأخر عن المعاد تلت ساعة كاملة، ودي بداية مش مبشرة، بس

إحنا هنعديها وهنعتبر دي غلطة أول مرة.

غضب مكرم من هذا الكلام، فوجه كلامه إلى جلال

- دايماً الكبير بيحى متأخر شوية

ضحك جلال بصوت مرتفع

- ماشي يا كبير، تفضل بقى معايا عشان تقابل الكبير اللي بجد
اصطحب جلال مكرم و مراد إلى الطاولة التي يجلس عليها الزعيم، كان
يجلس معطيا ظهره لهم من ظهره و بناءً على صلعته الكبيرة و المتبقي من شعره
الأبيض يتضح أنه قد تجاوز الستين. السيجار الكوبي واضح بين اصبعيه، و الخاتم
الكبير يتضح أيضاً من اليد الأخرى.

- دكتور مكرم يا بوس

استدار الرجل، و عندما راه مكرم انفتح فمه، و تجمدت عيناه

- مالك يا مكرم مستغرب كده ليه

قال الزعيم هذا الكلام وهو ينظر إلى مكرم الذي ظل ثابتا في مكانه

- أنت...أنت يا مصطفى يا رشدي

كان مصطفى رشدي أحد الأصدقاء المقربين جداً إلى فريد ياسين والد
مكرم، كان مكرم يعرفه منذ أن كان صغيرا، تشارك مع والده في إحدى المشروعات
لكن مع كثرة الخلافات قرراً الانفصال.

بعدها شق كل منهم طريقه، أصبحا من القوى الاقتصادية العظمى

الآن أدرك مكرم كيف وصل مصطفى رشدي إلى هذه الثروة الطائلة، تجارة

الهيروين طريقا مختصرا للوصول للثروة

- إحنا في مركب واحدة يا مكرم

قالها مصطفى في إشارة منه إلى أن والد مكرم كان هو الآخر متورطا في هذه

التجارة، و أن كل الثروة التي يتمتع بها مكرم الآن أساسها هذه التجارة المشبوهة

- لا يا مصطفى كده الأمور واضحة، أنت دبرت الحادثة اللي مات فيها أبويا،

ليته ظل سرا

واشتريت كلب من الناس اللي كانوا شغالين عندنا، و كل ده لمجرد إن أبويا رفض
يشتغل معاك

ضحك مصطفى بصوت مرتفع

- تصدق نص كلامك صح، ونصه غلط

أنا قتلت أبوك يا مكرم لما طمع، كان عايز يعلى نسبته المعتادة اللي كان
بياخدها كل عملية، طبعا الكلام ده ما يعجبنيش، ولأني ما بهزرش، فخلصت منه،
و نقلت العطا عليك يا دوك

- طب ليه ما قتلتنيش أنا كمان لما رفضت أشتغل معاك

- أنت اذكي من كده يا دكتور...لو قتلتك يبقى مين باقي لى عشان ألعب
عليه، أنا قتلت أبوك لأنى كنت عارف إنك هتكمل من بعده، ولما أنت عصلجت في
الأول، كان لازم أقرص لك ودنك لحد ما تلين

- تقتل إثنين وتسميها قرصة وذن

- ما هو في لعبتنا إحنا طالما ما قتلتكش أنت نفسك يبقى إحنا لسه بنهزر

زفر مكرم في ضيق، ثم أردف

- ماشي...خلينا دلوقتي نتفق على تفاصيل الشغل

- أنا بحب الناس العملية برضو

شوف يا مكرم، إحنا بنستعد عشان نعمل عملية كبيرة، مش هقولك إننا

أول مرة نعملها، بس المرة دي أكبر شوية من أي مرة

- وأنا دوري إيه في العملية دي

- شريك

- شريك بمعنى إيه؟

- بمعنى إنك تدفع النص بالنص، وطبعًا البضاعة هتتشن في الشحنة اللي جاية لك من إسبانيا كمان شهر، طريقة الشحن ملكش دعوة بيها لما الشحنة هيجي هتدخلها مخازنك، بعد كده رجالتنا هيخرجوها من المخازن، بعد كده هنقولك تسلمها إزاي

- يعني أنا هدفك النص، والبضاعة هتيجي في شحنة تبع مجموعتي، وهخزنها في مخازني، وكمان هسلمها لك، كده مش فيريا باشا

- والله هي دي شروطي، وأنا قلتك إحنا ما بنهزرش

أخرج مكرم عملة معدنية من جيبه ووضعها على الطاولة، ثم وجه كلامه إلى مصطفى

- عارف يا مصطفى في لعبة بيعملوها في بلاد برة كنت قريرت عنها على النت

- لعبة إيه دي، وإيه علاقتها بالشغل

أمسك مكرم بالكوب الموضوع أمام مصطفى

- شايف الكوباية دي يا مصطفى بيه، أهوكل اللعبة إن اللي هيلعب العملة دي وتخبط في الكوباية يبقى له نقطة، وهنلعب اللعبة دي ٥ مرات، واللي هيجمع النقط أكثر يرش الثاني بالكوباية في وشه.

انفجر جلال في وجه مكرم

- ايه اللي أنت بتقوله ده يا مكرم!!!!

هنا جاء صوت مصطفى

- سيبه يا جلال، أنت عايز توصل لإيه يا مكرم

- لا هي اللعبة جت في دماغى بس فقلت أجربها مع سعادتك

لم يبدو مصطفى رشدي مقتنعًا، لكنه لم يكن لديه مانع للتجربة

أنا هبدأ يا مصطفى بيه
 وضع مكرم إصبغه السبابة مع الإبهام في وضع الدائرة، وقام بضرب العملة
 المعدنية، فارتطمت العملة بالكوب.

- كده واحد صفر ليا يا باشا...دورك

قام مراد من مكانه

- أنا هروح الحمام يا مكرم على ما تخلصوا لعب

هز مكرم رأسه بالإيجاب

ضرب مصطفى العملة المعدنية فارتطمت بالكوب

- واحد واحد يا مكرم

ظلا هكذا حتى أصاب مكرم الكوب أربع مرات وفي المرة الرابعة لمصطفى لم

ترتطم العملة بالكوب

إبتسم مكرم بصوت مرتفع

- كده يا باشا لو أنا نجحت في المحاولة دي هغرقك بالكوباية

- أنت صدقت ولا ايه يا مكرم، أنا بس بتسلى معاك

- وأنا كمان بهزر يا باشا، يكفيني شرف الفوز عليك

ضرب مكرم العملة فارتطمت بالكوب

- كده يا باشا أنا فزت

صفق مصطفى ساخرا من مكرم

- برافويا مكرم

- ميرسى يا باشا

ابتسم مكرم ابتسامة عريضة

- بس أنا ما برجعش في كلامي
أمسك مكرم بالكوب و رش مصطفى بما فيه من خمر، وهنا انقلب الملهي
رأسًا على عقب

- طب وأنت هتعمل ايه دلوقتي

- أنا طلبت إني أقابل الكبير بتاعهم عشان نتفق على تفاصيل العملية

اللي هما بيتقولوا إن أبويا كان متفق معاهم عليها

- وبعدين

- ولا قبيلين، أقعد بقى واهدى عشان أقولك هنعمل ايه

- هنعمل ايه في ايه

- في مقابلة الكبير

- أنت ناوي على ايه يا مكرم

- أنا حطيت خطة و جهزت رجالة تنفذها

الكباريه اللي هما هيقابلوني فيه أكيد تبعهم و مأمنينه كويس

- أكيد

- عشان كده أنا جايب رجالة أكبر من أي عدد هما ممكن يكونوا جايينه

و أنت اللي هتحرك الرجالة دي.

- أنا!!!!.....إزاي؟

- طول ما إحنا قاعدين معاهم عينك تبقى على إيدي اليمين، لو إديتك

إشارة برقم (١) يبقى تستني زي ما أنت، ولو إديتك إشارة برقم (٢) تقوم تعمل

نفسك رايح الحمام و تدي تعليماتك للرجالة يمشوا، ولو إديتك إشارة برقم (٣)

يبقى تدي إشارة للرجالة إنهم يدخلوا الكباريه بالتدريج، ويستنونني لما أعمل أي

حركة تدل على الهجوم، ولما يشوفوا الاشارة دي يقلبوا الكباريه فوراً، و
يحاولوه من كل النواحي بالسلاح

- وأنت هتشاوري لي إزاي وهما قاعدين

- الإشارة مش هتبقى صريحة، وعليك إن أنت تفهمها يا مراد

أنا هبدأ يا مصطفى بيه

وضع مكرم إصبعه السبابة مع الإبهام في وضع الدائرة، وقام بضرب العملة
المعدنية، فارتطمت العملة بالكوب.

- إيه يا مصطفى بيه، مالك مبلم كده ليه

أجاب مصطفى رشدي منفعلًا

- اللي أنت بتعمله ده غلط كبير أوي يا مكرم

- لا ما أنا عارف، بس أنت دلوقتي روحك تحت إيدي يا باشا، وبإشارة

واحدة مني أخلى دماغك ١٠٠ حته...بس أنا مش هعمل كده، عارف ليه؟

عشان أنا مش وسخ زيك، كل اللي في الحكاية إننا هنغير الاتفاق شوية

صغيرين

- إزاي؟

- أنا مش هدف ولا مليم في العملية دي، بس هاخد

- نعم!!!!...هي تكية أبوك

- أه، وأنت اللي قلت كده...أنا هاخد ٣٥% مقابل إني أجيب الشحنة دي في

الشحنة اللي جاية لي، و مقابل إني أخزنها لك وأسلمها لك على طبق من ذهب

- مش شايف إن ده كتير

- و اللي أنت عملته مش كتير

ليته ظل سرا

- ها موافق، ولا أخلى الرجالة تخلص
صمت مصطفى قليلاً، و جلال يتصبب عرقاً
عاد مكرم من جديد
- شكلك مش موافق، يبقى الله يرحمك
جاء صوت مصطفى هادئاً هذه المرة
- موافق يا مكرم
- كده من غير ضمانات
انفعل مصطفى مرة اخرى
- أنت كمان عايز ضمانات
- طبعاً يا باشا، ده أنت ابن سوق و فاهم، أنا إيه اللي يضمئلى إنك بعد ما
تأخذ حاجتك اللي عندي إنك ما تغدرش بيا
- و عايز ضمانات إيه
- مراد
أشار مكرم إلى مراد فأخرج من جيبه ورقة و قلمًا
- توقيعك هنا يا باشا
- إيه ده يا مكرم
- ده عقد، عقد بيع ٢٠% من المجموعة التجارية بتاعتك، و ده مش كتير
بالمقارنة بالفلوس اللي أنت هتكسبها
- أنت اكيد إتجننت
- هو أنا لحد دلوقتي لسه ما أتجننتش، فما تخلينيش أتجن
امضى يا مصطفى ما تضيعش وقتي، أنت عارف إني نفسى أقتلك، و

ليته ظل سرا

بصراحة بقى أنا ما بقدرش أقاوم رغباتي كثير، فاشتري نفسك

صمت مصطفى رشدي قليلاً ثم أردف

- وأنا إيه اللي يضمنى إنك ما تغدرش بيا، وتسجل العقد ده

- العقد هيفضل معايا لحد ما تديني فلوسي، هتديني الفلوس هسلمه لك،

هتغدر بيا يبقى ٢٠% من شركاتك بقى ملك لياسين جروب.

ساد الصمت قليلاً، صدر مصطفى يعلو ويهبط في غضب، إنه في موقف لا

يحسد عليه، لكن ليس أمامه حل آخر.

أحياناً يمكث الإنسان بين خيارين أحدهما أصعب من الآخر، لا تستطيع أن

تختار أحدهما، الأول يجعلك تتنازل عن مبادئك، والثاني يجعلك تفقد شيئاً عزيزاً

عليك، إنه الاختيار بين الموت بالشنق أو الحرق، كلاهما موت وكلاهما عذاب

عندما يكون الإنسان في هذا الموقف يتمنى لو أن حياته قد انتهت، لأنك في

النهاية مجبراً أن تختار أحدهما، عليك أن توقع بيدك على القرار الأصعب في حياتك

كان مراد يجلس وحيداً في شرفة منزله، أنهى كوب القهوة الثالث، ويفكر

جدياً أن يطلب الرابع، رأسه يكاد أن ينفجر من الصداع

ترى زوجته أنه في حالة غير طبيعية، اقتربت منه

- مالك يا مراد

- مفيش يا حبيبتي

- مفيش إزاي أنا أول مرة أشوفك كده

صمت مراد قليلاً ثم أردف

- حبيبتي فلنفرض إنك عرفتي إن أبوك قتل واحد، تعملى إيه؟

اندهشت من كلامه، فأجابت وقد على صوتها بعض الشيء

ليته ظل سرا

- إيه اللي أنت بتقوله ده يا مراد!!
- أنا بقولك افرضي
- لا طبعًا بابا لا يمكن يعمل كده
- ما هو عشان أنت لا يمكن تشكى إنه ممكن يعمل كده، عايزك بقى تقولي
- لي انطباعك لو عرفتي ده
- لا. ده أنا...ده أنا ممكن أتجنن، أو أتشل وأفقد النطق
- هنا تذكر مراد ما كان فيه مكرم، فمجرد ثباته في عقله، وتعامله بهدوء لهو
- قوة في حد ذاته
- طب لو أنت كملتي بعقلك، تبليغي عنه، ولا تستري عليه
- أنت بتطلب مني المستحيل يا مراد
- سرح مراد قليلًا، وقال في نفسه
- أمال لو عرفتي إني قدام ده دلوقتي، عمرى في حياتي ما تخيلت إن مكرم
- يتاجر في الهيروين، و في نفس الوقت مش قادر أسيبه يكمل، بس أنا برضو ما
- أقدرش أسبب له أذى
- سرحت فين يا مراد
- نظر لها مراد بعينين جامدتين
- ما قلتليش هتعملى ايه
- هو ساعتها هيبقى القرار صعب جدًا، بس بما إني مش عايشاه حاليا،
- هختار إني أبلغ عنه، و ده عشان الحق بس
- أنت شايفه كده
- ما أنا بقولك أنا مش عايشة الوضع ده

- صح
 - صح إيه؟
 - أنتِ فعلا مش عايشاه
 قال مراد جملته الأخيرة، وقام متجها إلى غرفة نومه
 في الصباح الباكر قاد مراد سيارته متجها إلى مديرية الأمن
 دخل إلى مكتب الضابط المختص
 - إتفضل يا فندم
 جلس مراد أمامه فبادره الضابط
 - خير
 - عايز أقدم بلاغ
 - بلاغ في مين
 - في دكتور مكرم ياسين
 - منور ياسين جروب يا مصطفى بيه
 قالها مكرم لمصطفى رشدي و هو جالس أمامه على مكتبه، و يجلس مراد
 أمام مصطفى رشدي
 استطاع مكرم أن يقلب موازين اللعبة لصالحه، استطاع بين طرفة عين و
 انتهياتها أن يكون هو الجانب الأقوى، يضع شروطه كيفما شاء، و حسبما أراد،
 وضع شرطه أن يكون لقائه الثاني بمصطفى رشدي في مكتبه هو، بل و اشترط أن
 يأتي مصطفى رشدي منفردًا
 - يا ريت ندخل في الموضوع على طول يا مكرم باشا
 - جميل....شوف يا مصطفى بيه، الشحنة هتدخل مصر مع المواد الخام

- بتاعتي، هتدخل مخازني، وبعد كده هسلمها لك
 - أيوا الكلام ده أنت قلتاه قبل كده، إيه الجديد
 - الجديد بقى يا سيدى هو مكان التسليم، أنا بعمل فيلا جديدة في التجمع،
 هنقل الفيلا دي و طبعًا هعمل حفلة كبيرة بمناسبة الفيلا الجديدة
 - ما تقولش إنك هتسلمنى في الحفلة
 - هو ده اللي هيحصل
 اندهش مصطفى رشدي وكذلك مراد مما قاله مكرم
 - إيه مالكم
 أجااب مصطفى
 - اللي أنت بتقولاه ده اسمه خبل
 - خبل ليه، عمر ما حد يتوقع طريقة التسليم دي، أنا أكيد مش هسلمك في
 شنتط سودة و جو الأفلام ده.
 - آمال هتسلمنى إزاي
 - في التورتات
 - في التورتات!!!!!!
 - أيوا.....أنا هحط الهيروين جوة التورتات، وأنت هتاخذ التورتات دي على
 المكان اللي أنت عايزه
 - و أنت مش شايف إن حاجة مش طبيعية إن حد يطلع من حفلة معزوم
 فيها بكمية التورتات دي
 - ده لو أنت اللي خرجت بيها
 - يعنى إيه

ليته ظل سرا

- يعنى التورتات هتتحمل على عربيات من بتاعتى، و محدش يعرف التورتات

دي رايحة فين

- و دى حاجة مش هتخلى الناس تشك

- يشكوا في إيه

- يعنى تورتات تتحمل في عربية و تخرج من الحفلة دي حاجة طبيعية

- لا طبعًا، بس في نفس الوقت مش الحاجة اللي تخلى الناس تفكر في إن

التورتات دي فيها مصيبة، كلهم هيقولوا إن دي طقوس من الحفلة، و محدش

هيسأل التورتات دي رايحة فين

- و الهيروين هيتحط في التورتات دي إزاي

- رجالتك اللي هيحطوه

- نعم!!!

- أنا هجيب شيفات تعمل التورتات دي في البيت، و فعلا هيعملوا التورتات

اللي هتتقدم في الحفلة، و بعد كده رجالتك هتدخل تحط الهيروين جوة تورتات أنا

هطلب منهم يعملوا طبقاتها بس، و تزين عليه من برة عشان يبان إنها تورتة، و

كده محدش يقدر يمسك علينا حاجة، و ده كله طبعًا قبل الحفلة بيوم، و رجالتك

هيبجوا بالليل بعد ما الشيفات يمشوا

- أنا مش واثق في الطريقة دي

- ما تقلقش يا باشا كله هيبقى تمام

بعد مرور ثلاثة أشهر

يقف الجميع في الحديقة الخاصة بالفيلة الجديدة لمكرم ياسين، بيهرهم

جمال المعمار للفيلا الجديدة، حمام السباحة يتوسط الحديقة، تنتشر التحف في بعض أجزاء الحديقة

العدد كبير في هذه الحفلة، لم يكن أحد يتوقع أن يكون لمكرم ياسين كل هذه العلاقات، خصوصًا وأنه ابن الأمس في عالم رجال الأعمال، كثير من رجال الأعمال المعروفين والمرموقين يحضرون هذا الحفل، بعضهم جاء بناءً على دعوات وجهت إليهم من مكرم، وهم ليس لهم به أي علاقة لا من قريب ولا من بعيد الأجواء هادئة جدًا، يمنحهم منظم الحفل الوقت للتعارف، الموسيقى الهادئة في خلفية الأجواء، وجميع الموجودون في الحفل يتبادلون الحديث في انتظار إطلالة مكرم

مكرم يقف أمام مرآته الموجودة في غرفة نومه يضع لمساته الأخيرة، ينظر إلى المرأة بعمق، يتثبت أمامها قليلاً، بدا معجبًا بنفسه، بأناقته الشديدة، يبدو في أبيي حلة لكنه يرى أيضًا ملامح الخوف في وجهه، عيناه غريبتان لم تريا النوم في الليلة الفائتة

يأخذ نفسًا عميقًا، يحاول تهدئة نفسه

يدق باب الغرفة

- أدخل

دخل مراد إلى الغرفة

- إيه يا مكرم كل ده بتعمل إيه

- تعالي قولي رأيك

- وااو، برفكت يا مكرم

- بجد

- أه والله، ياللا بقى

- ياللا

اصطحب مراد مكرم و خرجا معا إلى حديقة الفيلا

عندما ظهر مكرم أمام الناس بدأوا بالتصفيق له

رفع مكرم يده ليرد تحيتهم

و عندما انتهوا من التصفيق، بدأ هو بالكلام

- برحب بيكم في بيتي الجديد، وبشكر كل الناس اللي حضرت عشان

تشاركنى اللحظة الجميلة دي، شرف ليا أنكم تشاركونى في أول يوم ليا هنا، وإن

شاء الله مش هيبقى آخر يوم لينا مع بعض في المكان ده، بشكركم و بتمنى لكم

سهرة سعيدة

بعد أن انتهى مكرم من كلامه بدأ يتجول بين الحاضرين للترحيب بهم، و

تلقى عبارات التهانى منهم

حتى إذا وصل إلى مصطفى رشدي، همس مصطفى في أذنه

- كله تمام يا مكرم؟

- لما البوفيه يفتح رجالتك هتبتدى تتحرك و تنقل البضاعة على العربيات، و

قلتلك ما تقلقش

واصل مكرم ترحيبه بضيوفه، يتكلم مع هذا قليلاً، و يمزح مع هذا قليلاً،

كان كل شيء يسير كما هو مخطط له

استأذن مكرم من ضيفه الذي يحاوره، و اتجه إلى داخل الفيلا، فاستوقفه

مراد

- على فين يا مكرم

ليته ظل سرا

- يعنى أنت مش عارف
 - مهندئات برضو
 - مش قادريا مراد، خمس دقائق بالضبط و خليهم يفتحوا البوفيه
 بعد أن صعد مكرم نفذ مراد ما طلبه منه و تم افتتاح البوفيه، وما إن تم
 افتتاحه حتى بدأت التورتات تخرج إلى السيارة التي ستحملهم
 وفي هذه اللحظة أخرج مراد هاتفه، و قام بفعل شيء ما عليه، و لم تمر
 سوى دقيقة واحدة حتى كانت الشرطة تحاصر الحفل.
 انطلقت صرخات من بعض الموجودين في الحفل، ساد التوتر في أنحاء
 المكان، عدد هائل من قوات الشرطة يتواجد في حديقة الفيلا، بعض من أفراد
 طاقم التخديم انضم إليهم، إنهم من أفراد الشرطة جاءوا في افراد التخديم لمتابعة
 الأحداث

بدأ الضابط المسئول عن المداهمة بالكلام

- مش عايز صوت....كل واحد يثبت زي ما هو

اقترب الضابط من السيارة أكثر

- العربية دي بتاعت مين ؟

رد مصطفى رشدي بسرعة

- بتاعت صاحب الفيلا يا باشا

أجاب الضابط

- مصطفى باشا...أنت هنا...أصل أنا الصراحة إتفاجئت بوجودك....فتش

العربية دي يا ابني

بدأ العساكر بإخراج العلب التي تحتوى على المخدرات، وقاموا باستخراجها،

فأردف الضابط

- إيه ده بقى....سكر بودرة

ساد الاندهاش على وجوه جميع الموجودين، من المستحيل تصديق أن مكرم

يمكن أن يفعل هذا

- آمال مكرم ياسين فين

هنا تكلم مراد

- فوق يا باشا

وجه الضابط كلامه إلى العساكر

- اطلعوا هاتوه

بدأ العساكر بالتحرك في اتجاه الفيلا، ولكن قبل أن يصعدوا فوجاً الضابط

بالنيران تخرج من غرفة مكرم بالأعلى

- إيه اللي بيحصل ده يا مراد

صرخ مراد

- مش عارف يا باشا النار دي خارجة من أوضة مكرم

- يعنى إيه....حاولوا تلحقوه بسرعة

انطلق العساكر بأقصى سرعتهم نحو غرفة مكرم، حاولوا إطفاء الحريق،

بعد ربع ساعة تقريباً نجحوا في إخماد الحريق بالكامل.

دخل الضابط إلى الغرفة فوجد جثة مكرم ملقاة على الأرض، و متفحمة

بالكامل

اقترب الضابط المساعد من زميله

- هنعمل إيه دلوقتى يا باشا

- هنتبث اللي حصل، وهنقبض على مصطفى رشدي

نزل الضابط و مساعده و توجهها إلى مصطفى رشدي

- تفضل معنا يا مصطفى بيه

- أفضّل ليه يا باشا، أنا عملت إيه!!!!

- هتعرف كل حاجة لما تنورنا...حرز يا ابني البضاعة دي.

في غرفة الحجز تلك التي تملأها الحشرات، و يضرها البرد الشديد، و تسيطر عليها متنوع الروائح العفنة، ولا يسمع فيها غالباً إلا السباب و الحوارات الخارجة عن حدود الأدب

إلا إنها كأى شيء كما أن لها عيوب لها مميزات

فهي المكان الأنسب لكى يصارح الإنسان نفسه بما هو عليه، أن يكون متسقاً مع نفسه، هنا لا يمكنك الكذب، هنا أرض المحنة، حيث خداعك لن يكون إلا لنفسك، و مراوغاتك ستحل نتائجها على رأسك و حدك عند الأزمات يكون لاستدراك الحقائق معنى آخر

جميع الذين احتجزوا بين تلك الجدران الأربعة، مروا بتلك اللحظات التي يدور فيها عقل الإنسان كثيرًا، يحاول التفتيش في ماضيه و ذكرياته، يحاول التنقيب عن سبب وجوده في هذا المكان (إن كان مظلوماً)، يحاول التنقيب عن الذنب الذي اقترفه و ألقى به في هذا المكان القبيء، و ربما يرجئها إلى ذنوب قد ارتكها في بعيد الزمان، أو إلى أخرى قد رفض الاعتذار عنها من قبل، أو ربما كررها ليثبت أنها أتفه من أن يعتذر عنها

أما إذا كان يدري حقيقة ما اقترفت يده، فهو بالتأكيد سيلوم نفسه على تلك الفرص التي سنحت له للإقلاع عن هذا الجرم، لكنه لم يلتفت إليها، و زين له

الشیطان ما كان یصنع، حتی إذا أدركه العقاب لم یعد ینفع الندم.
 ما كان یفكر فیة مصطفی رشدي فی هذه اللحظات هو ذاك المثل الشعبي، و
 الأمثلة الشعبية أحياناً تصیب جزءاً من الحقائق، و أحيان یكمن فیها جوهر
 الحقیقة ذاته، رغم أنها أمثلة تداولها الناس دون أن یعرف أیا منهم کیف نشأ هذا
 المثل، ولا ماهیة الموقف الذي قیل فیة
 - وقوع البلی ولا انتظاره

قالها مصطفی رشدي محدثاً نفسه و هو یضع یده تحت رأسه و یرتكز
 بكوعه على احدى ركبتيه، فهو بالفعل یتمنى الموت الآن إذا كانت النهاية الحتمیة هی
 الحكم بإعدامه.

كان یرید أن یطلع على صحف الیوم، سیكون هذا الموضوع هو الأكثر
 سيطرة على ساحة الرأي العام فی الفترة القادمة، سیكون تلك العلكة التي یتسلى
 بها المتسكعين على المقاهي، سیفتك به مقدمو البرامج الیومیة و سیصفوه بالمجرم و
 اللص و الفاسد و جمیع الكلمات التي یمكن أن تطلق على من اقترف ذنباً،
 سیصدق كل ما یقال عنه، سیشمت فیة جمیع أعدائه و منافسوه السابقین
 فی هذه اللحظة فقط أدرك لماذا انتحر هتلر قبل أن یقع فی ید القوات
 الأمريكية، لأن الموت كان سیأتيه حتماً لكن بعد أن یصیر عبرة للعالم أجمع، فاختار
 الموت سریعاً، هناك لحظات الموت أهون من أن تمر بك.

لقد كان مكرم ذكياً، الانتحار كان هو الحل الوحید، لكنه مات كافراً
 ابتسم ساخراً من نفسه و هو یفكر بتلك الطریقة، مكرم سیدخل النار لأنه
 مات كافراً، و هل سیصل إلى الفردوس الأعلى من حكم علیه بالإعدام فی قضیة
 إجتار!!!

قاطع أفكاره صوت بوابة الزنزانة القديمة الذي انفتح و ظهر من خلالها العسكري، نادى على اسمه و على أسماء جميع المتهمين في القضية، جلال و جميع رجاله الذين كانوا في الحفل

اصطحبهم العسكري إلى غرفة وكيل النيابة من أجل التحقيق، في الطريقة المؤدية إلى غرفة وكيل النيابة وجد مصطفى رشدي ابنه أدهم ينتظره، خمسمائة جنيه كانت كافية ليتركه العسكري يتحدث معه على انفراد

- بابا....ما تقلقش من حاجة أنا كلمت سيادة المستشار و قالي إن في أمل إن

شاء الله

أجاب مصطفى رشدي في هدوء

- أنا مفيش أي دليل ضدي يا أدهم ويمكن أخرج معاك النهاردة كمان
- أنا مش فاهم بس هما قابضين عليك ليه، العربية اللي كان فيها البضاعة
عربية الزفت اللي اسمه مكرم، و الفيلا فيلته، و مفيش أي حاجة تخصك في الموضوع

- ما تقلقش يا أدهم، كلها مسألة وقت و هخرج من هنا

وضع مصطفى رشدي يده على كتف أدهم مرتباً عليه، ثم انطلق إلى غرفة

التحقيق

دخل مصطفى رشدي إلى غرفة التحقيق، ليجد وكيل النيابة و أمامه المستشار يحيى المحامي الخاص به، ما إن دخل مصطفى رشدي حتى طلب منه وكيل النيابة الجلوس

- اتفضل اقعد يا مصطفى بيه

- شكرًا يا فندم

هنا بدأ المستشار يحيى بالكلام

- حضرتك رفضت تتكلم معايا في أي حاجة غير في وجود المتهم، والمتهم

موجود دلوقتي

- دلوقتي نبدأ التحقيق بشكل رسمي، اكتب يا ابني، إنه في يوم و أكتب

التاريخ والساعة، مثل أمامنا المتهم مصطفى رشدي حسين، وتم سؤاله

س- ما هو قولك في التهم الموجهة إليك؟

- أنا لحد دلوقتي معرفش إيه هي التهم اللي موجهة لي

- أنت متهم بالإتجار في المخدرات بالمشاركة مع مكرم فريد ياسين

تدخل المستشار يحيى

- الكلام ده عارٍ تمامًا من الصحة، أنا موكلي رجل أعمال معروف، ونزاهته

معروفة، ومفيش أي دليل على الكلام ده

- يعني أنت بتنكر التهمة دي يا مصطفى بيه

أجاب مصطفى رشدي

- أنا مش بس بنكرها، أنا هرفع قضية رد شرف

ابتسم وكيل النيابة بجانب فمه ابتسامة ماكرة، ثم قال

- أه طبعًا من حقك، بس ده بعد ما تثبت براءتك

تدخل يحيى مجددًا

- البراءة مثبتة، وأنا بطالب بالإفراج عن موكلي وبدون أي ضمانات

- واحدة واحدة بس يا سيادة المستشار، أنا عندي كلام حضرتك لسه ما

سمعتوش

- كلام إيه يا فندم

- وجه وكيل النيابة كلامه إلى كاتب الجلسة
- شغل يا ابني
- مد الكاتب يده خلف المكتب وأخرج مسجلاً، وضغط على زر التشغيل
- جاء صوت مصطفى رشدي
- يا ريت ندخل في الموضوع على طول يا مكرم باشا
- جميل....شوف يا مصطفى بيه، الشحنة هتدخل مصر مع المواد الخام بتاعتي، هتدخل مخازني، وبعد كده هسلمها لك
- أيوا الكلام ده أنت قلته قبل كده، إيه الجديد
- الجديد بقى يا سيدى هو مكان التسليم، أنا بعمل فيلا جديدة في التجمع، هتنقل الفيلا دي وطبعًا هعمل حفلة كبيرة بمناسبة الفيلا الجديدة
- ما تقولش إنك هتسلمني في الحفلة
- هو ده اللي هيحصل
- إيه مالكم
- اللي أنت بتقوله ده اسمه خبل
- خبل ليه، عمر ما حد يتوقع طريقة التسليم دي، أنا أكيد مش هسلمك في شنتط سودة وجوالأفلام ده
- أمال هتسلمني إزاي؟
- في التورتات
- في التورتاات!!!!!!
- أيوا.....أنا هحط الهيروين جوة التورتات، وأنت هتاخذ التورتات دي على المكان اللي أنت عايزه

- وأنت مش شايف إن حاجة مش طبيعية إن حد يطلع من حفلة معزوم فيها بكمية التورتات دي
- ده لو أنت اللي خرجت بيها
- يعنى إيه
- يعنى التورتات هتتحمل على عربيات من بتاعتي، و محدش يعرف التورتات دي رايحة فين
- و دي حاجة مش هتخلي الناس تشك؟
- يشكوا في ايه؟
- يعنى تورتات تتحمل في عربية وتخرج من الحفلة دي حاجة طبيعية
- لا طبعا، بس في نفس الوقت مش الحاجة اللي تخلى الناس تفكر في إن التورتات دي فيها مصيبة، كلهم هيقولوا إن دي طقوس من الحفلة، و محدش هيسأل التورتات دي رايحة فين
- والهيروين هيتحط في التورتات دي إزاي
- رجالتك اللي هيحطوه
- نعم!!
- أنا هجيب شيفات تعمل التورتات دي في البيت، و فعلا هيعملوا التورتات اللي هتتقدم في الحفلة، و بعد كده رجالتك هتدخل تحط الهيروين جوة تورتات أنا هطلب منهم يعملوا طبقاتها بس، و تزين عليه من برة عشان يبان إنها تورتة، و كده محدش يقدر يمسك علينا حاجة، و ده كله طبعا قبل الحفلة بيوم، و رجالتك هبيجوا بالليل بعد ما الشيفات يمشوا

- أنا مش واثق في الطريقة دي
- ما تقلقش يا باشا كله هيبقى تمام

تجمد مصطفى رشدى في مكانه، انقطعت أحواله الصوتية فربما لن يخرج
صوته من جديد، توتر المستشار يحيى توترًا واضحًا، ابتسم وكيل النيابة وهو يقول
- إيه رأيك في الكلام ده يا سيادة المستشار
أجاب المستشار يحيى وهو يصرخ
- التسجيل ده متفبرك يا فندم، ده مش صوت موكلي ده صوت حد بيقلده،
دي مكيدة عاملها حد تبع مكرم ياسين
لم يرد وكيل النيابة و اكتفى بالابتسام، فأردف يحيى
- أنا ما زلت مصر على الإفراج عن موكلي وبدون أي ضمانات
اتسعت ابتسامه وكيل النيابة أكثر، ثم قال في هدوء وهو يدير حاسوبه
ليصبح في مجال رؤية مصطفى ويحيى، ثم قال وهو يضغط زر التشغيل
- طب وده

لم يصدق مصطفى ويحيى ما يرانه، إنها تلك الجلسة التي سمعوها منذ
قليل لكنها هذه المرة بالصوت والصورة، لم يكتفى مكرم بتسجيل الجلسة صوتيا،
بل قام بتصويرها بكاميرات خفية لم ينتبه لها مصطفى رشدي
ذلك الفيديو كان الضربة القاضية لمصطفى رشدي و مستشاره، لقد أجهز
عليهم وكيل النيابة ومن قبله مكرم، مصطفى رشدي ما زال مصدوما، وهبت
المستشار يحيى، وانتهى الأمر برمته قبل أن يبدأ

ليته ظل سرا

ثلاثة أشهر ولا كلام في الرأي العام إلا عن قضية مصطفى رشدي و مكرم ياسين، غريبة هي الأحوال في بلدنا، في كل فترة من الفترات يسيطر موضوع ما على ساحات الرأي العام، تضيء الشاشات، يسيل الجبر على الأوراق، تشتعل الحماسة في نفوس المتابعين، تصل المتابعة إلى ذروتها كل يوم أكثر من الذي سبقه، ثم سرعان ما تنطفئ شمس هذا الموضوع، و تسطع شمس أخرى تسيطر لفترة ثم تنطفأ، وهكذا يكون الرهان المربوح دائماً هو الرهان على ذاكرة الرأي العام.

منذ ثلاثة أشهر وأخبار قضية مصطفى رشدي تتوالى، بداية من خبر القبض عليه في فيلا مكرم ياسين و انتحار مكرم، ثم خروج الأخبار التي تفيد بوجود فيديو يثبت وجود اتفاق بين مكرم و مصطفى رشدي، ثم تسريب الفيديو عن طريق أحد الإعلاميين، ثم يأتي اليوم الذي ينتظره جميع المتابعين للقضية، يوم النطق بالحكم في القضية.

جلس مازن أبو العلا على مكتبه في الصباح الباكر، هو عادة لا يأتي إلى مكتبه في مثل هذا الوقت، لكن ذلك المحامي الشاب (محمود) الذي يعمل عنده تحت التمرين أخبره أن هناك أحد العملاء المهمين سيأتي لمقابلته في هذا الوقت الباكر من الصباح، و عندما رفض مازن القدوم في هذا الوقت، استعطفه محمود بأن هذا الرجل لا يستطيع المجيء إلا في هذا الوقت، وافق مازن، وافق لأنه يريد أن يأخذ هذه القضية و أن يراعى ظروف موكله فيها، كما أنه لا يحب أن يؤخر طلبا لهذا الفتى المجتهد محمود الذي أضاف له الكثير منذ قدومه للعمل معه

كان مازن من أشد المتابعين لقضية مصطفى رشدي، كيف لا و هي تخص مكرم ياسين، لهذا فتح التلفاز في انتظار سماع الحكم.

جاءت نشرة الأخبار لتعلن أن المحكمة حكمت على مصطفى رشدي بتحويل

أوراقه إلى فضيلة المفتي

ابتسم مازن ابتسامه جانبية، هو لا يعرف مصطفى رشدي ولا تجمععه به علاقة قط، لكنه يرى أن هذا هو العدل في القضية، هذا الرجل طغي كثيرًا، ولا بد لكل من يخطئ أن يلقي جزاؤه الذي سيكون بالتأكيد على مقدار خطأه

نعم هذا هو العدل، مازن رجل قانون ضليع، أصلًا مهنتهم اخترعت من أجل تحقيق التوازن بين الأطراف، فلا يكون المدعى و القاضي وحدهم من لهم سلطة قانونية، لهذا وجد المحامي لتحقيق التوازن، من أجل إتاحة فرصة أكبر لإرساء العدل، تلك هي الرسالة الأصلية لكلية الحقوق، ولكن....من يطبقها؟

نعم هذا هو العدل، العدل أن يموت مكرم ياسين ذاك الوغد الذي تزوج حبيبتي، ذاك الذي عاش يدعى الشرف و الأمانة و المثالية، لا يعقل أن يكون هذا كله ملك لشخص واحد، كل شيء كان في يد ذلك البائد، العلم و المال و الزوجة الجميلة و الاحترام و الهيبة، وماذا يحلم الإنسان بأكثر من ذلك، كل شيء كان مثاليًا بالنسبة لمكرم، فكان لا بد أن يكون تاجرًا للمخدرات، تلك هي القاعدة الذهبية التي يؤمن بها مازن و كثير من الناس (لا يمكن لأحد أن يكون أفضل مني إلا إذا كان فاسدًا) !!!!!!!!!!!!!

ولكن مازن لم يكن يعلم أن كل خطأ لا بد له من عقاب، كل خطأ حتى خطأه هو نفسه

يدق هاتف مازن بجانبه، ينظر إلى شاشة الهاتف فيرى رقما غير مسجل، غالبًا ما يكون هذا أحد الموكلين الجدد، أو أحد الزملاء الذين تعرف عليهم قريبًا ولم يسجل رقمه بعد

- ألو

- إزيك يا مازن

هذا...هذا...هذا مستحيل، لقد عرف مازن الصوت منذ الكلمة الأولى، لذا اتسعت عينه و توارب فمه، وذهب عقله في رحلة ذهول، هذا لا يمكن أن يكون حقيقياً، لا بد أني أحلم، لا بد أنني أتوهم بسبب قلة النوم، هذا مستحيل لأن الموتى لا يتكلمون.....لكن هذا بالتأكيد...صوت مكرم ياسين

جائه الصوت مرة أخرى

- ما تقلقش أنت لسه صاحي وما بتحلمش، كل اللي بيدور في دماغك صح

لم ينطق مازن بكلمة فأردف مكرم

- إيه مالك، الهم بعد ما انزاح رجع على قلبك تاني، معلش، أصلى يا ميزو

بصراحة مكنتش متخيل إني ممكن أموت قبل ما نخلص حسابنا.

حاول مازن استجماع قواه، و تهدئة أعصابه، و نطق

- حساب إيه، هو أنا بيني و بينك حاجة أصلاً، و بعدين أنت إزاي لسه

عايش، و بتتكلم منين

ضحك مكرم ضحكة طويلة استفزت مازن، ثم أردف

- عجباني أوي نبرة الخوف اللي في صوتك دي، بس ما تخافش الخوف ده

مش هيطول، الكابوس هينتهي بسرعة

ضحك مرة أخرى ضحكة خفيفة ثم أردف

- أنت عارف يا مازن إيه المشكلة، إن أنت والخاينة اللي كانت حامل منك

إنعاملتوا معايا على إني إنسان غبي، و ان اللي أنتم بتعملوه عمره ما هيتعرف، بس

نسيتموا إن ربنا يمهل ولا يهمل

- خاينة مين و كنا بنعمل إيه، أنت بتخرف، أنت أك...

ضحك مكرم ضحكة طويلة مرة أخرى

- نبرة الخوف في صوتك بتزيد، أنا كده ماشي صح، أنت متوتر زيادة أوي يا ميزو، أوعى تكون فاكر إن نهلة ماتت مودة طبيعية، لا لا لا يا متر، أنا اللي خلصت عليها، هي و ابنك اللي كانت عايزاه يبقى على اسي، و مش بعيد كنتم فكرتم تتخلصوا منى عشان هي تورث كل حاجة و بعد كده تتجوزوا و تعيشوا في تبات ونبات

هدأت نبرته فجأة، ولكن زادت حدته

- انا أسف يا مازن إني عكرت عليكم الحلم الجميل

صمت مكرم فانفجر مازن، وعلا صوته

- أيوا يا مكرم أنا و نهلة كنا بنحب بعض، و هي كانت مراتك بس ما كانتش بتطيقك، حبيننا بعض خمس سنين، و بعد كده أبوها ضغط عليها عشان تتجوزك أنت، و كل ده ليه، عشان ابن فريد ياسين عريس ما ينفعش يترفض، بس أنا و هي تعاهدنا إننا نحافظ على حبننا غصب عنك و عن أبوها

قاطعه مكرم

- تعاهدتم!!، و حبكم!!، عارف يا مازن أنت خليت ضميري مرتاح أكثر ما هو مرتاح أصلاً، هي ما كانتش تستاهل القتل و بس، أنا كنت المفروض أجيئك أنت وهي و أحرقتكم أحياء، أنا قتلتها وهي حامل في ابن حرام، مودة بشعة، بس هي تستاهل، اللي تعمل اللي هي عملته ده بدم بارد كده، لازم تكون دي نهايتها، و أنت كمان تستاهل نهاية أوسخ منها

- أنت بتهددني ولا إيه يا سي مكرم

رد مكرم بنبرة هادئة

ليته ظل سرا

- أنت عارف يا مازن أنا بكلمك دلوقتي ليه
- مش عايز أعر...
- عشان مكتبك فاضي، و السكرتيرة بتاعتك اللي كانت في حضنك من شوية
نزلتها قبل ما محمود بييجى هو و العميل المهم اللي جايلك في قضية خطيرة
ازداد ذهول مازن، ودق قلبه بطريقة أسرع
- ده أنت مراقبني بقى
ضحك مكرم ضحكة بصوت أعلى من سابقها
- أنت عارف يا مازن محمود اللي بيشتغل عندك ده، كل المرافعات اللي
قدمها لك، المحامي بتاعى اللي كاتبها
استمر مكرم في الضحك، بينما مازن لا يستطيع الكلام من أثر الصدمة
- في قدامك دوسيه على المكتب ارفعه هتلاقى دوسيه تاني
رفع مازن الملف فوجد الملف الذي يتحدث عنه مكرم
- ده ملف محمود اللي بيشتغل معاك، ممكن بقى تطلع شهادة الميلاد و تقرأ
لي اسم الأم
أخرج مازن شهادة الميلاد، و وجه بصره اتجاه خانة اسم الأم، لا لا غير
معقول إن اسم الأم.....نادية عبد الحميد ياسين
- إيه يا ميزو ما تقرأ كده و تسمعي صوتك، أقولك أنا، اسم الأم نادية عبد
الحميد ياسين .
- ده محمود ابن عمتي، و على فكرة هو مش محامى ولا حاجة و كل الشهادات
اللي قدمها لك مزورة، و اللي عايزك تعرفه قبل ما تموت إن محمود بعث لي الفيديو
اللي صوره لك أنت و سكرتيرتك، و بعد ما هو يخلص عليك الفيديو هيملى النت

انفتح باب مكتب مازن فجأة، وإذا بمحمود يحمل مسدسا به كاتم صوت و يرتدى قفازات

مازن لا يتحرك من مكانه ولا ينطق بكلمة، جاء صوت مكرم ثانية

- هي ماتت و هي حامل في ابن حرام، وأنت هتموت نجس، ابقوا ونسوا
بعض في النار بقى سلام يا ميزو
أغلق مكرم الهاتف، فتكلم محمود
- الوداع يا أستاذي

انطلقت رصاصة من المسدس إلى رأس مازن أبو العلا، لتعلن موعد نفوقه،
نعم، لا بد للعدل أن يتحقق، ولا بد لكل خطأ من عقاب.

دائمًا ما كانت لحظة هبوط الطائرة مميزة بالنسبة له، و على الرغم من أنها
المرّة الأولى التي يطير فيها خارج حدود مصر، إلا أن رهبة الخروج من الوطن لم
تمنعه من الاستمتاع بتلك اللحظة

كل شيء مر بسرعة خيالية، الأحداث تسارعت كما يمر شريط ذكريات
المحتضر، كان الموضوع أشبه بالمقامرة، تجربة فريدة من نوعها لن تعيشها بتلك
التفاصيل إلا إذا كنت الصديق الأقرب لمكرم فريد ياسين، ذلك المجنون لعب لعبة
الروليت الروسي، إما أن تخرج الرصاصة في رأسه فتقضى عليه، أو تخرج في رأس
أعدائه فيخرج هو الراجح الوحيد

لم يكن مراد في حالة استيعاب عندما أخبره مكرم بتفاصيل تلك الخطة، لم
يكن مراد ليصدق أن من الممكن أن ينجح ذاك الدرب من الجنون، لم يكن مراد
على علم بالتفاصيل الكاملة فقط طلب منه مكرم تنفيذ الجزء الخاص به، لكنه
قد وعده أن يحكى له التفاصيل كاملة و يكشف له جميع محاور تلك الخطة في

ليته ظل سرا

احد الأيام بعد أن ينتهي ذك الكابوس الأسود الثقيل
يبدو أن ذاك اليوم قد حان بالفعل، أدرك ذلك عندما لمست عجلات
الطائرة أرض مطار تلك العاصمة الأوروبية العريقة.

خرج مراد من الطائرة وهو يرتدى معطفا و حذاءً عاليًا متحسبا للطقس
الذي سيواجهه، يحمل في يده حقيبة بها بعض الملابس التي تكفيه لبضع ليالي.
بعد الدخول إلى المطار والانتهاء من تلك الإجراءات التي تختلف كثيرًا من بلد
لأخرى، اتجه مراد للخروج من المطار، وعندما خرج وجد أحد الشباب يستوقفه
- حمد الله على السلامة يا مراد

نظر مراد إلى وجه ذلك الشاب لقد راه قبل ذلك مرة أو اثنتين، لكنه لا يذكر

أين راه

- الله يسلمك

- إتفضل معايا دكتور مكرم مستنيك

خرج مراد مع الرجل و اتجها إلى السيارة، وضع الرجل حَقائب مراد في
حقيبة السيارة و انطلقا معًا.

لم تمضى أكثر من خمس و أربعين دقيقة حتى توقفا أمام ذاك المنزل، الذي
هو بالنسبة للمنازل في تلك المدينة يعد من منازل الطبقة فوق المتوسطة، فهو
يتكون من طابقين، أمامه حديقة صغيرة، يبدو كبير بالنظر إليه من الخارج، و تبدو
عليه بعض الفخامة

أخرج ذلك الشاب الحَقائب من السيارة، و تقدم مراد باتجاه باب المنزل
ما إن وصلوا حتى فتح ذلك الشاب الباب و دخلا معا إلى بهو المنزل، هنا تكلم

الشباب

- تفضل استريح يا باش مهندس
- أنا شفتك في عزا نهلة أنا افتكرت دلوقتي
- ضحك الشاب ضحكة خفيفة ثم أردف
- أنت قاعد طول الطريق تفكر أنا مين، و شفتي فين قبل كده، طب كنت سألتني وأنا أقولك
- بس كلامي صح مش كده؟
- أيوا صح...أنا حميد ابن عمه مكرم، و كنت معاكم خطوة بخطوة في اللي كنتم بتعملوه
- ظهرت علامات التعجب على وجه مراد
- كنت معانا إزاي؟!؟
- هتفهم كل حاجة دلوقتي

- جلس مراد و أخذ يتجول ببصره في المنزل، أثاث هذا المنزل يشبه إلى حد كبير الأثاث الذي كان في منزل مكرم في القاهرة، هذا ذوق مكرم ولا شك، فهو الذي يهوى تلك النوعيات الغريبة من الأثاث، و يضع الأرائك في كل ركن من أركان المنزل، و تلك التحف التي تتميز ببساطتها و صغر حجمها
- عاد حميد مرة أخرى إلى مراد بعد ما استئذانه في المرة الأولى، و عندما عاد سأل مراد عن ما إذا كان يريد مشروبا ما، فأجاب مراد
- أنا نفسى في فنجان قهوة
- حاضر، أنا هعملها لك بنفسى، سكرك إيه بقى
- مطبوط

كان ذلك صوت مكرم الذي جاء من خلف مراد
 قام مراد من مكانه و التفت ليجد مكرم أمامه و الابتسامة تعلو وجهه، علت
 الابتسامة على وجه مراد كذلك، ثم تقدما باتجاه بعضهما و كل منهما يفتح ذراعيه
 وكأنما يريد أن يحتضن وجه الكرة الأرضية و ما عليه
 عناق حار دام لمدة دقيقة تقريبا، نظر حميد إليهم في إعجاب شديد فربما
 هي المرة الأولى في حياته التي يرى فيها عناق صديقين بهذه الحرارة، بالتأكيد لأنه لم
 يمر صديقين (يعرفهما حميد على الأقل) بنفس الظروف العصبية التي مر بها مكرم
 و مراد، تقول بعض النظريات أن الصديقين الحقيقيين يحس بعضهما ببعض في
 حالة تعرض الطرف الآخر للخطر، وإذا كان أحدهما تحت ضغط ما يعيش الآخر في
 ضغط مشابه، لكن ربما قال شخص ما يحب صديقه هذا الكلام على سبيل
 المبالغة ، ولو أن الصداقة الحقيقية تحمل في طياتها هذا المعنى
 انتهى العناق الطويل أخيراً، وقف الصديقان أمام بعضهما، فبدأ مكرم
 الكلام

- حمد الله على السلامة

- حمد الله على السلامة أنت، أنا لحد دلوقتي مش مصدق إنك حيّ قدامي،

أنت عملت معجزة يا إبنى

قال مكرم مبتسما في هدوئه المعهود

- ولا معجزة ولا حاجة، كل الحكاية تخطيط صح، ناس بتحبك تقف

جنبك، وقبل ده كله تكون على حق عشان ربنا يوفقك

- اللي يشوفك في الهدوء ده و أنت بتتكلم عن الموضوع، ما يتخيلش إن أنت

عاشتنا ست شهر في ضغط عصبي ما يتحملوش جبل

- بس دلوقتي إحنا مفيش علينا أي ضغط، إحنا بس اللي خرجنا كسبانين
من الملحمة دي

- بس أنت طولت على ما اتصلت بيا يا مكرم

- أنا كنت بحميك يا مراد، مكنتش أقدر أكلمك قبل كده

- تقوم تخبي عليّ مكانك كل الفترة دي، ولا حتى تليفون واحد

- لو كنت تعرف حاجة كان ممكن تتأذى، رجالة مصطفى رشدي قعدوا
يراقبوك شهر بعد الحادثة، و أكيد كانوا مراقبين تليفونك، و أنت لو كنت تعرف أي
معلومة كانوا هيعملوا أي حاجة عشان يوصلوا لها، و يمكن كان كل اللي عملناه
بيوظ، فكان لازم يبقى في ورقة مجهولة بلعب بيها، حد بيشتغل في الكواليس، و
طبعا أنت عرفت هو مين.

أجاب مراد في ثقة

- حميد طبعا

- حميد كان دماغ بتفكر معايا، أما اللي كان بيتحرك كان لازم يبقى حد

لعيب كبير، أي لمسة بيلمسها تقربنا من الهدف أكثر

- مين ده بقى

- محمود أخو حميد، محمود هو اللي بيعمل كل حاجة بعد خروجنا من

مصر

- و أنت خرجت من مصر إزاي.... لا استنى أنت أصلاً خرجت من الفيلا إزاي

يوم الحادثة

ضحك مكرم ضحكة صاحبة بعض الشيء ثم أردف

- على ما تخلص قهوتك يكون الغدا جاهز، نتغدى و أنا هجاوبك على أي

سؤال بيدور في دماغك.

بعد أن انتهيا من الغداء، جلسا سويا ليكملا حديثهما، ارتفعت درجة التأهب لدى مراد لسماع الجزء المخفي عنه من ما فعله مكرم، مغامرة كتلك تستحق فعلا إلى الاستماع

- تفتكريا مراد أنا ليه بنيت فيلا جديدة عشان الحفلة

- أكيد عشان تسهل خروجك منها

- صح..... الفيلا دي كلفتني فلوس كتير جدًا مش عشان فخامة المبنى أو

الكلام ده لا خالص، لأن تكلفة حفر نفق تحت الفيلا كانت عالية

- نفق!!!!!!!!!!!!!!

- أيوا نفق....نفق يطلعك برة لفيلا على بعد ٥٠٠ متر منها، له مخرج زي

بلاعات الصرف الصحي ولا يمكن حد يشك فيه.

- أيوا بس مين اللي وافق يعمل النفق ده

- مليون جنيه للمهندس دخلوا حسابه، غير تكاليف الحفر و البنيان، مع

يوميات عالية شوية للعمال اللي معاه، اتحفر النفق.

ذهل مراد مما سمعه، كان يظن أن عملية الخروج كانت أسهل من هذا،

كان أكثر ما يتخيله هو أن مكرم وضع حبالا على سطح (الفيلا) و نزل من خلاله و

كان احدهم في انتظاره بالسيارة، أما أن يكون هناك نفق تحت قدميه يمر مكرم من

خلاله، فهذا لا يكون الا في الأحلام أو الأفلام السينمائية، لكن تطبيقه ليس

مستحيلا

لاحظ مكرم ذهول مراد

- إيه مالك مش مستوعب ليه

- طب و الجثة المحروقة دي جثة مين

- لا دي بقى كانت لعبة التربي.....لما بعنت محمود يتفق معاه، الراجل طلب

مبلغ مبالغ فيه أوي، طبعا الموضوع كان محتاج إن الراجل يقعد مترصد للجثث، و يتصل بالتربية اللي يعرفهم كلهم عشان يقدر يوفر جثة بالمواصفات دي في التوقيت اللي إحنا عايزينه بالذات، بس الفلوس تصنع المعجزات، الراجل قدر يجيب جثة شاب تقريبا له نفس جسعي، ووصل الفيلا الصبح و دخلناه مع الحاجات بتاعت الحفلة على انه سجادة، ولبسنه نفس البدلة اللي أنا كنت لابسها، مش بس كده و الساعة كمان، و حطينا في جيبه كل الحاجات اللي ممكن تكون في جيب وقت الحفلة، و طبعا حرقنا وشه قبل أي حاجة عشان نظير ملامحه، بحيث لو البوليس طلع قبل ما الحريقة تكبر يبقى المرحوم وشه متشوه جاهز

- و ما خفتش من الطب الشرعي

- دي بقى كانت المخاطرة الوحيدة في الخطة، بس زي ما توقعت الطاباط كبر

دماغه، و ما تدساش إن القضية كانت متقشرة قدامه، حرز بالكمية دي، و ممسوك بيه شخصية عامة زي مصطفى رشدي، و ضيف على كل ده انتحار مكرم ياسين في فيلته كمان، يبقى هو كده تمام أوي، و بعدين مكانش في حاجة ممكن تخليه يشك، الناس كلها شافتني و أنا داخل الفيلا، و محروق في أوضة نومي، أظن يعنى الموضوع مش محتاج طب شرعي.

- و طبعا أنت البوليس كان فوق و أنت كنت في النفق

- بالظبط، على ما وصلوا هما القسم كنت أنا في المطار

اندهش مراد من كلام مكرم

عليّ حوالي ١٢ واحد، اخترنا منهم واحد، و طبعًا أول لما كلمناه رفض. بس بعد ما
سمع المبلغ، مفكرش كثير

- إزاااا!!!!..... ده أنني حياته على الورق

- التلاتة مليون يغنوه عن أي ورق، ده مبلغ لو اشتغل عميرين على عمره ما

يقدرش يجمع نصه

- بس ده ما يقدرش يعمل أي حاجة

- هو دلوقتي بالنسبة للحكومة مسافر برة، وهو كده كده مش هيجتاج

يسافر، وهيعمل أي حاجة جوة البلد بالفلوس اللي معاها

نظر مراد إلى مكرم نظرة إعجاب و ذهول في نفس الوقت، للوهلة الأولى

يشعر أنه أمام شخص لا يعرفه، هل هذا حقًا هو مكرم ياسين الذي رافقه طيلة

حياته، هل هذا الذي كان يجالسه و يتحدث معه لساعات طويلة، هل هذا مكرم

ذاك الفتى النابغ في كلية الآداب، الفتى الذي كانت تحلم به جميع الفتيات، وكيف

لا و هو متفوق، و يمتلك من الأموال ما يحقق لأي فتاة جميع أحلامها، علاوة على

أخلاقه التي كانت مضرب المثل بين زملاؤه و أقرانه، كيف لهذا الشخص أن يكون

هو من وضع تلك الخطة، ربما لو سمعت هذه الخطة لظننت أن من وضعها أحد

مستشاري تشرشل في الحرب العالمية الثانية، أو ربما وضعها تشرشل نفسه

- ساكت ليه يا مراد؟

- مش مصدق يا مكرم

- مش مصدق اللي حصل، و لا مش مصدق إني عملت كده

- الاثنين

- ليه يا مراد، كنت عايزني أفف اتفرج و إيديا مشلولة، ولا كنت عايزني

ليته ظل سرا

أبقى تاجر مخدرات، مراد أنا خسرت كل حاجة، أختي ماتت بسبب مصطفى
رشدي، أبويا كمان مات بسببه، يا راجل ده أنا لو كنت صرفت كل الفلوس اللي
معايا، بس عشان أنتقم منه كنت عملتها

رد مراد في حنق

- أنت عملت كل ده إزاي وإمتي

- إيه يا مراد محسني إنك مكنتش عارف حاجة

- ما أنا فعلا مكنتش عارف حاجة

- إزاي؟!.....! إذا كان أنا اللي قايلك تروح تبغ البوليس، و أنا اللي سلمتك

التسجيل اللي بيبي وبين مصطفى رشدي

- أيوا بس ما قتلتيش كل التفاصيل دي

- عشان أحميك.....! أنت كنت أقرب واحد ليا، ولو كان مصطفى رشدي أو

البوليس شكوا في حاجة مكنوش هيسيبوك، ولو غلطت أي غلطة مكنوش

هيرحموك، واحتمال كانوا يوصلوا لي من خلالك، عشان كده أنا طلبت منك تأدي

الدور اللي أنت ممكن تأديه من غير ما تكون محل شك، غير كده كان لازم أستعين

بناس محدش يتوقعهم عشان كل حاجة تمشى زي ما أنا عايز

صمت مكرم قليلاً، فوجد مراد لا يتكلم ولا ينظر إليه من الأساس

- إيه يا ابني مالك

- أنا مش مصدق يا مكرم فعلا

- لا صدق.....! إيه اللي أنت مش مصدقه

- مش معقول كل الناس بتبيع نفسها بسهولة كده

- مين اللي قالك إنهم باعوا بسهولة، أنا ضحيت بفلوس كتير و كتير جداً

- عشان أقدر أنفذ، أنت ما سألتش نفسك ليه حميد و محمود بالذات اللي أنا
اخترتهم عشان ينفذوا معايا الجزء الأخير
- عشان بتثق فيهم طبعًا
- مش بس كده....عشان حميد محامى، و محمود صايح و هما الاتنين
عارفين معظم الشغل الشمال بيتعمل إزاي
- بس مش معقول كل الناس فاسدة
- مين قال إن كل الناس فاسدة، إحنا اللي دورنا على الفاسدين عشان
يشتروا معنا
- نعم!!!!.....يعنى أنت اشتريت مهندس و العمال بتوعه، و موظف سجل
مدنى، و شخص عادى اشتريت اسمه، كل ده و تق.....
قاطع مكرم
- و ناس تانية كتير لعبت أدوار فرعية
- كمان!!
- طبعًا، بس زى ما قلتك إحنا اللي دورنا على الفاسدين، و بعلاقات حميد،
و بفهلوة محمود وصلنا
- ده أنت مسيبتش حاجة للصدف
- مينفعش يا مراد أسيب حاجة للصدف، دي كانت لعبة حياة أو موت
- كان نفسى أقوم أسقف لك يا مكرم، بس مش قادر أقف من كتر
الصددمات اللي إستقبلتها دلوقتي
- و تسقف لي أنا ليه، سقف لنفسك، أنت كمان عملت اللي عليك
- طب و أحمد راح فين

- أحمد عند أحمد
- أه...رجعته لعمه
- بالظبط...مش عايزه يعانى من أول حياته
- ووصية ليلي
- مين اللي قالك إني سيبتته، أنا سيبت نصيبه باسمي عشان يبقى ميراثه بعد وفاتي على الورق، الفلوس دي تكفيه بقية حياته، وعمه راجل أمين و هيحافظ عليها، وكمان هو تحت عيني طول الوقت عن طريق محمود، اللي مزعلني إني إتحرمت منه بقية عمرى، بس أكيد هتصرف و أشوفه في يوم من الأيام
- صمت مراد قليلاً، ثم أردف
- انت جايبنى ليه يا مكرم
- عشان عايز أشوفك، و عشان عايز أقولك على اللي أنت عايز تعرفه، و هبعت لك كل فترة تيجي لي هنا، هو أنا عشان برة مصر إيه مش هنتقابل خلاص.
- نظر إليه مراد نظرة لم يفهم مغزاها، إنها المشاعر المختلطة في صدر مراد، لا يدري إن كان كل ما حدث هذا هو الطريق الصحيح، أم إنه طريق الهلاك، لا يعلم إن كان مكرم ذكي حقاً، ام إنه أغبي من طفل صغير، لا يفطن إن كان هذا هو توفيق الله لرجل أراد أن يأخذ حقه، ام أنه عقاب الله الذي سيأتي على مكرم
- مكرم أنت مقتنع باللي أنت عملته
- كان عندك حل تاني.....لو عندك حل تاني إتفضل قوله، بس أنت ما هتقولش، لأنك لو كان عندك حل تاني كنت قلتة من زمان
- هي الفلوس جاتلك هنا إزاي
- متاخر شوية السؤال ده بس أنا هقولك

أنا قبل الحفلة بحوالي شهر بعثت كل العقارات اللي كنت بملكها، و الفلوس اللي في البنوك حولتها لحساب محمود ابن عمتي و هو حولها بدوره على حساب في بنك برة مصر باسم الراجل اللي أنا اشترت اسمه ده

- و طبعا أنت اللي سافرت عملت الحساب ده

- بالظبط كده

- أوعى تقولي إنه في اليوم اللي أنت اختفيت فيه

ضحك مكرم من جديد

- بالظبط كده، و طبعا مكنتش أقدر أبيع أي حاجة من أصول المجموعة

عشان كان الموضوع هيبقى مريب، فعملت توكيل لمحمود، هو يبيع الشركات و

المصانع و يحولي الفلوس على هنا، طبعا كل ده بعد ما طلعت ورث ليلي و كتبتة

لأحمد ابن أختي تحت وصاية أحمد عمه، عشان كده هو عمل لي تنازل عن كل

الممتلكات اللي إتصرفت فيها دي، هو طبعا مش فاهم أنا عملت كده ليه، بس كل

اللي كان فارق معاه إن حق ابن أخوه يفضل محفوظ بما إنه الوصي عليه، و طبعا

كان حقه محفوظ و بزيادة

- و ناوي تعمل إيه بالفلوس دي

- هابدأ بيزنيس جديد هنا، أنا بالفعل تعاقدت على مصنع جديد، أنا لسه

حى يا مراد، و كل اللي أنا عملته ده عشان أقدر أعيش بشكل طبيعي تاني

ساد الصمت قليلا، فأردف مكرم

- مراد...أنا دلوقتي مليش حد غيرك انت و ولاد عمتي، و مكرم ياسين بالنسبة

للناس مات، أنا بعنتلك عشان عايز أشوفك فعلا، و عشان أحاول أفضل مرتبط

بنفسي لأقصى حد، أنا خسرت كل عيلتي، صحيح انتقمت بس برضولسه لوحدي،

ليته ظل سرا

لا أبويا رجع، ولا ليلى هقدر أكلهما تاني، يا أخى خد كل الفلوس اللي معايا ورجعلي
 أبويا ولا ليلى ولا خالد ولا أي حد، أنا في فترة قصيرة جدًّا، حياتي انتهت تقريبا
 كادت الدموع أن تخون مكرم، لكنه دائمًا إعتاد أن يكون قويا، فهو في
 حياته كلها، لم يبكي أمام أحد حتى أمه

ساد الصمت طويلا هذه المرة، حتى قطعه مكرم
 - ممكن تقعد معايا الأيام اللي أنت جاي تقعددها و ما تفتحش أي حاجة ليها

علاقة بالماضي...ممكن؟

- إزاي؟!

- ممكن؟

لم يجد مراد أمامه غير اجابة واحدة

- ممكن



إنها الليلة الأخيرة لمراد، غدا في الصباح سيكون في المطار متجها إلى القاهرة،
 ثلاث ليالي قضاها بصحبة مكرم و حميد، كانت حقًا ليالي رائعة، فعلوا كل شيء
 يمكن أن يفعلوه، سهروا و لعبوا و أكلوا و تسامروا و ضحكوا، كل شيء إلا الكلام
 فيما مضى كما كان وعد مراد لمكرم، لكن كل شيء مهما طال لا بد له من نهاية، كل
 شيء كان جميلا، وها قد حان وقت الوداع

دخل مكرم إلى الغرفة التي استقلها مراد، مراد يضع حقيبته على السرير و

يضع ملابسه فيها،

بادره مكرم

- فكريا ابني و أقعد لك يومين كمان
- لا يا عم كفاية أوي كدة أنا ورايا شغل في مصر
- أه فعلا وراك شغل كتير
- لم يفهم مراد جملة مكرم الأخيرة
- أنت بتقلش
- لا والله أنا بتكلم جد
- آمال أنا ليه حاسك بتقلش
- لا أنا جد الجد كمان
- وأنت عرفت منين إن ورايا شغل كتير
- أخرج مكرم ورقة من جيبه وأعطاهها لمрад
- الورقة دي بتقول كده
- قال مراد دون أن ينظر فيها
- ورقة إيه دي
- ما أنت لوقريتها هتعرف
- بدأ مراد يقرأ في الورقة ولم تتغير ملامحه، فقط بعد بضع ثواني، ابتسم
- ابتسامة جانبية، قابلتها ابتسامة عريضة من مكرم الذي قال
- ها...عرفت بقى إن وراك شغل
- ده عقد بيع مصنع
- وبتهيألى اسم المشتري واضح قدامك
- انت خليت محمود بيع لى المصنع يا مكرم
- و العقد ناقصه توقيعك، اللي أنت هتكتبه دلوقتي، و من بكرة هتستلم

المصنع

- بس أنا مش همضي على العقد ده
أخرج مكرم قلم من جيبه وأعطاه لمراد
- لا هتمضي
ثم قال في إصرار أكبر
- هتمضي
- يا ابني ده كتير أوي عليّ
- ومش كتير عليّ اللي أنت عملته معايا ؟
أنا مش عايز أسمع منك أي كلام، أنا عايزك تمضي وبس
نظر مراد إلى مكرم نظرة ذهول و إعجاب مجتمعين، فهز مكرم رأسه محفزا
إياه على التوقيع
أمسك مراد بالعقد واتجه نحو مكرم و عانقه عناقا شديدا، لم يستطع أن
يمنع دموعه من النزول، هنا تكلم مكرم
- أنت تستاهل يا مراد، أنا لو اخويا من دمي ما كانش هيقف جنبك، ربنا
ما يحرمنى منك و ما يفرقناش إلا الموت
نظر مراد إلى مكرم، وما زالت دموعه تنساب من عينيه
- أنا مش عارف أقولك غير إنك اجمل حاجة حصلت لي في حياتي، بس
ربت مكرم على كتف مراد وقال له
- كمل شنطتك و انا مستنيك تحت
إتجه إلى باب الغرفة، ثم التفت وقال مبتسماً
- أه، و ما تنساش تمضي على العقد

هز مراد رأسه إيجاباً، فانسعت ابتسامه مكرم، ثم خرج من الغرفة عندما نزل مراد، إستقبله حميد، وأخذ منه حقيبته، واتجها معا إلى الخارج، كان مكرم ينتظرهما في حديقة المنزل، وكانت هناك سيارة في انتظاره لنقله للمطار عانق مراد كلا من حميد و مكرم ثم ركب السيارة متجها إلى المطار دخل حميد و مكرم إلى المنزل مرة أخرى، وجه حميد كلامه إلى مكرم بعد أن جلسا على الأريكة

- تعرف يا مكرم في سؤال نفسى أسأله لك من أول ما عرضت عليّ الموضوع بس كنت متردد، و دلوقتي بس عايز اسأله
- اسأل
- هو خالي فعلا كان تاجر مخدرات؟
- نظر مكرم نظرة ساخرة إلى حميد
- أنت شايف ايه؟
- ارتبك حميد بعد سؤال مكرم
- أنا شايف إنه لا؟
- ابتسم مكرم ابتسامه عريضة ثم قال في هدوء
- أنا هحكيلك

- بابا لا يمكن يعمل كده يا مكرم، رغم إن الواقع بيقول غير كده،
 لكن في حاجة جوايا مش عايزة تخليني أصدق.
 عموما في حاجة ممكن نتأكد منها
 - إيه هي؟
 - مذكرات بابا
 - هو بابا كان بيكتب مذكرات!!?
 - أيوا أنا مرة دخلت عليه لقيته بيكتب في حاجة زي أجندة كده، وأول
 ما شافني راح مداريها، ممكن لو وصلنا للأجندة دي، نلاقى فيها اللي
 إحنا بندور عليه.

- الغريب بقى إن لما لقينا المذكرات دي وفتحناها، ما لقيناها فيها غير آخر
 شهر في حياته بس، و كاتب فيه كل اللي حصل بينه وبين مصطفى رشدي
 بالتفصيل

- يعنى أنت كنت عارف إن مصطفى رشدي هو اللي ورا كل حاجة من الأول
 - طبعا، أبويا قابله و اتخانقوا مع بعض، و أبويا هددده إنه هيببلغ عنه،
 عشان كده مصطفى رشدي قرر يقتله
 - طب و هولييه عرض على خالي يشتغل معاه
 - لسببين، الأول إنه كان محتاج شريك لأن الصفقة كانت كبيرة و ما كانش
 هيقدر يشيلها لوحده، و الثاني إنه طول عمره بيكره أبويا من أيام ما كانوا شركة،
 عشان أبويا رفض يعمل معاه الشغل القدر اللي كان بيعمله

- طب وأنت مكنتش خايف إنه يقتلك
 - لا....لأني كنت عارف إني الاختيار الأخير ليه، عارف أنت لما تراهن نفسك،
 أهو مصطفى رشدي كان مراهن نفسه إنه هيخلي عيلتنا تشتغل معاه، لما أبويا
 رفض وهدده قتله، ولما أنا رفضت قتل ليلى
 ثم نظر إلى حميد نظرة سخرية
 - أظن دي فهمتها لوحدهك
 - فهمتها
 - بس دي كانت غلطة مكنتش عامل حسابها، كان لازم أعرف ان اللي قتل
 ممكن يقتل تاني بدم بارد.

بس من غباء مصطفى رشدي، قرر يكمل في عناده، وأنا لعبت على النقطة

دي

صمت مكرم قليلاً، فتكلم حميد

- ولقيت إيه تاني في المذكرات دي

- لقيت أخرج جملة كتبها في حياته

((أفضل أن أموت على أن أضيف إلى مالي قرشاً حراماً))

ثم بحمد الله

عم ميالو

رمياط

٢٠١٧/٩/٢٧

